



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



45. 1046.














**TRAGOEDIAE**  
**SELECTAE**  
**LATINORUM RECENTIORUM.**

---

INSUNT  
PETAVII SISARAS, MALAPERTII SEDECAS, ET GROTII  
CHRISTUS PATIENS AC SOPHOMPANEAS.



MONACHII, 1845.  
TYPIS J. G. WEISS.





***DIONYSII PETAVII***

**AURELIANENSIS E SOCIETATE JESU**

**S I S A R A S**

**TRAGOEDIA.**

---



## Argumentum.

---

Ereptus Deo vindice multis iam cladibus Israel praeceps iterum ruebat in scelera, cum et poenas rursus repossere Deo visum est. Res acta est per Sisaram regis Iabin fortissimum ducem, qui tanta vi Hebraeorum fines invasit, ut de iis conclamatum esse videretur. Audit interim suorum gemitus Debora prophetis, cumque vehementius commovetur, tandem Deo plena Baracum cum ingenti exercitu Sisarae obviam procedere iubet. Quod cum ille Debora comitante fecisset, tantum terrorem Chananaeis iniecit, ut et Sisaras de curru exiliens fuga sibi consulere deberet; qui cum tandem ad Iahalem profugisset, ab ea amice acceptus, reffectus lacte, eiusque pallio opertus est, ne ab hostibus reperiretur: ab eadem demum divino numine impulsa clavo per tempora adacto trucidatus est. Ita Israeli mulieris manu parta de Chananaeis victoria est. *Ex lib. Iudicum cap. 4.*

---

## **P e r s o n a e.**

***Michael Archangelus.***

***Ieriel Chananaeus.***

***Sisaras.***

***Barac.***

***Madian Chananaeus.***

***Debora.***

***Iahel uxor Haberis Cinaei.***

***Nuntius.***

***Chorus Judaeorum.***

***Chorus Chananaeorum.***

---

## Actus primus.

### *Michael Archangelus.*

Praepes Tonantis famulus, Abramo satae  
Custosque Michael gentis huc celsa poli  
Submissus arce venio. Consuetus labor  
Levare fessum gravibus aerumnis genus.  
5 Per me ille quondam ductor aethereo caput  
Radiatus igni, pecora dum pascit, rubo  
Candente missus monstra terrifica extulit  
Phariosque decies clade geminata petens  
Potente virga stravit. Ex illo sacer

---

V. 1—120. Προλογίζει Michael Archangelus exemplo Euripidis. Israelem, quem saepe praesentibus periculis solverat, Sisarae tyrannide statuit liberare. Versus sunt trimetri iambici acatalecti vel senarii, hoc modo :

— ' v — — ' v — — ' v —

V. 5. Moyses post XL dierum ieiunium facie cornuta ex consortio sermonis Dei conspectus est de monte Sinai descendens. Exod. 34, 29.

V. 8. Pharios i. e. Aegyptios, a Pharo insula.

- 10 Populus rubente sospes eductus freto  
Siccum per undas medius impressit pedem.  
Insolita Nereus horruit vestigia  
Frustraque tumidos spumeus volvens globos  
In se repressus haesit. Hinc per me impius,
- 15 Aperta celeri maria dum peragrat rota  
Pavidosque sequitur hostis a tergo premens,  
Praeceptis reductis fluctibus mersus perit.  
Exin per ampla spatia tractusque invios  
Sollicitus egi, flammeam attollens facem
- 20 Densaue rutilum nube subtexens diem:  
Stabileque pepigi foedus et gemino dedi  
Incisa saxo iura, qua celsis Arabs  
Sublime collis nubibus iungit caput.  
Micuere coelo fulgura et fremitu minax
- 25 Intonuit aether: stridulo emissus fragor  
Terribilis aere colle sacrato procul  
Gressus profanos arcuit. Lustra hinc quater  
Per gemina profugos inter arentes plagas  
Non fruge Cereris, non laborata dape,
- 30 Nec opima tellus sponte quos foetus parit,  
Sed rore vesco; qualis herbosis riget  
Pruina campis, pavi et exustis siti  
Emicuit icto gelidus e saxo latex.  
Post haec tot inter bella, tot cultu horridas
- 35 Animisque gentes, per tot errorum vices

---

V. 12. Nereus, deus marinus, pro mare.

V. 22. Arabs collis h. e. Sinai.

V. 31. Vesco antique i. q. pasco.

- Promissa quondam patribus in regna intuli.  
 Per me retortus amnis in sese vagas  
 Compressit undas: rursus et vetera horruit  
 Prodigia, medio limes impressus vado est.
- 40 Quid reliqua memorem? Victa quam late patet  
 Chananaea tellus: fracta, superata omnia.  
 Hinc qua tepentes proximus sentit Notos  
 Indomitus Amalech, regna ad usque fertili  
 Opposita Syriae, quaque tot clade urbium
- 45 Infame pelagus fluctibus salsis riget,  
 Allophylae ad oras gentis, his sedem tribus  
 Posuere bissex finibus: pulsi incolae,  
 Viduata populis oppida; huc sparsus tremor,  
 Quo bella posthac. Quid? quod imperio Ducis
- 50 Defixus orbe Phoebus in medio stetit  
 Et laxa cohibens frena suspensis diu  
 Haesit quadrigis, quinque dum campo sequens  
 Patente reges victor Isacides quatit?  
 Sed ista quorsum? quid iuvat bello efferas
- 55 Domuisse gentes, sede promissa frui,  
 Si sic futurum est? sponte si patitur iugum  
 Novoque toties premitur exitio genus  
 Tanti redemptum? Si leves metuit deos:  
 Et falsa cultu numina incesto colit?
- 60 Pro caeca nimium corda! pro vecors furor!  
 Infida soboles! Siccine excidimus tibi?

---

V. 46. Tribus bissex sc. duodecim Israelis.

V. 49. Ducis sc. Iosuae.

V. 52. Cf. Ios. 10.



- Sic pacta temeras iura? Sic verum abnuis  
 Coelo tremendum pariter et terris Deum?  
 Qui certa nutu sidera immoto regit?
- 65 Cui servit orbis? cuius imperio vagos  
 Fluctus coercent maria, stat nullo obice  
 Immota Thetys tumida convolvens freta?  
 Huic muta praeferas signa, quae fuso artifex  
 Conflavit auro, silice vel scabra exprimens
- 70 Supplex tetendit, qua modo effinxit, manum?  
 Queis lucis expers oculus, et patulas sonus  
 Nequidquam in aures funditur, nullo pedes  
 Gressu cientur, rigida nil palpat manus,  
 Clamorque nullus faucibus vastis meat?
- 75 I nunc, et alta coelitum sede advoca  
 Agmen profanum. Veniat excitus Baal  
 Pavidumque referens turpis Astarte pecus.  
 Cur vota cessant? Commodum illuxit dies,  
 Optata quo se numinis virtus probet.
- 80 An nulla inertes vota sollicitant deos?  
 Satis hoc superque rebus experti asperis,  
 Quid vana possint monstra? Cum premeret Syrus  
 Lothique post hunc stirpe cognata satus

---

V. 76. Baal, Bal, Bel (dominus) summum Chaldaeorum, Babyloniorum, Phoenicum et Carthaginiensium numen, Sol. Astarte dea Syra, cuius figura aut cornuta erat (ut Luna) aut in piscem desinens; quare Syri eius cultores piscibus abstinebant.

V. 82. Syrus sc. Chusan Rasathaim rex Mesopotamiae; cf. Iud. 3, 8.

- Moabenus Eglon? Sed pius prae sto fuit  
 85 Dextraque miseros vindice eripuit Deus.  
 Ceneus illum ductor, hunc ferrum manu  
 Utraque stringens me duce oppressum dedit  
 Ieminaeus Aod. Parta mox iterum salus.  
 Sexcena duro vomere allophylum inclytus  
 90 Samgar peremit capita. Tum ne sic quidem  
 Edomita plebis corda. Gentiles deos  
 Rursum et nefanda sacra furibundi appetunt.  
 Nec inulta ferre scelera contempto diu  
 Licuit Tonante. Saevus apprime statim  
 95 Chananaeus ultor sequitur. Arentes comas  
 Bis adulta decies falce deposuit Ceres  
 Totiesque fusa Libanus immaduit nive,  
 Immanis ex quo victa Chananaei iugum  
 Isacia proles patitur et iussa impio  
 100 Tributa regi pendit. Ast ille aerea  
 Armata falce plaustra concutiens rapit  
 Trahitque profugos. His super miseri gemunt  
 Seroque tandem gravibus edocti malis,

---

V. 84. Eglon rex Moabitarum.

V. 86. Ceneus i. e. Othoniel filius Cenez, Iud. 3, 9.

V. 88. Aod filius Gerae, filii Jemini, qui utraque manu pro dextera utebatur. Iud. 3, 15.

V. 90. Iud. 3, 31: Post hunc fuit Samgar filius Anath, qui percussit de Philistiim sexcentos viros vomere: et ipse quoque defendit Israel.

V. 95. sqq. cf. Iud. 4, 1. sqq.

- Quod restat unum, numen iratum prece  
 105 Lacrymisque placant: ille pactorum memor  
 Dubiisque praestans quam solet rebus fidem  
 Mihi bella mandat. Laetus imperium exequor.  
 Parum est tyranni colla servitio trucidis  
 Eripere. Victis maius hoc instat decus,  
 110 Hosti ut rependant paria nec cedant prius,  
 Quam opima rege spolia prostrato ferant.  
 Dux his salutis foemina, auctorem ut probet.  
 Neque hoc peractum viribus credat suis  
 Hebraeus. Adero: certa pugnantis regam  
 115 Tela atque inertes fortibus coeptis manus  
 Armabo propere. Prima disiectas fuga  
 Lapidotheris acies sternet: excipiet ducem  
 Somnoque pressum perimet Haberis Iahel  
 Generosa coniux. Agedum in exemplum para  
 120 Ingens opus scissoque nil levius mari.

---

V. 117. Lapidotheris h. e. Debora Lapidotheri uxor, prophetis.

V. 121. Chorus (Iudaeorum) queritur Israelitas tot adversis casibus Deo vindice ereptos a Sisara tam graviter premi. Metrum est Sapphicum minus, usque ad vs. 156. Inde sequuntur versus Sapphici, interposito hic atque illic Adonio. Versum Sapphicum

— u — u — u u — u — u

ter repetit sequente Adonio

— u u — u

*Chorus.*

Occidis partis spoliata regnis,  
 Isaci proles, vacuisque moerens  
 Urbibus saevo miseranda subdis  
 Colla tyranno.

125 Occidis per tot Pharaone merso  
 Monstra servatus populus, rubentis  
 Cuius ad nutum pelagi repressum  
 Constitit aequor.

Vidit impresso tremefacta Tethys  
 130 Calle siccata peditem per undas  
 Currere, hinc atque hinc metuente iungi  
 Gurgite cinctum.

Inde flammata per inhospitales  
 Nube deserti sitientis oras  
 135 Ductus infestus retudit secundis  
 Viribus hostes.

Roscidus vastis alimenta nimbus  
 Depluit campis; facilisque captu  
 Sponte se vulgi dapibus ministrat  
 140 Lapsa coturnix.

Fonte dein largo salientis haustum  
 Cominus lymphae laticesque puros  
 Praebuit rupes iterum potenti  
 Caesa flagello.

V. 129. Tethys, uxor Neptuni, pro mari.

V. 131. Metuente iungi h. e. dissociabili; cf.  
 Hor. Od. I. 3, 22. II. 2, 7.

- 145 Horruit flamma crepitante montis  
 Fumidus vertex, tonitruque mistus  
 Dispulit rauco lituus ferocem  
     Murmure turbam,  
 Iura cum saxo metuendus Ales
- 150 Duplici incidens dedit, et quaternos  
 Pervigil soles decies bicornis  
     Constitit Heros,  
 Quos dapis suetae laticisque totos  
 Immemor sacris didicit regendis
- 155 Utiles ritus, propiore gaudens  
     Numinis haustu.  
 Hoc duce armatas Arabum catervas  
 Stirpis ingressum profugae morantes  
 Non minax ferro iaculisve Moses
- 160 Fudit, at sola prece, dum reducto  
 Colle prospectans acies in altum  
 Hinc graves atque hinc subeunte palmas  
     Fratre tetendit.  
 Quin et incesto genitore natus
- 165 Concidit Moab: neque vatis illum  
 Lingua conducti pretiosa leto  
 Solvit instanti venerisque dirae  
 Blanda fraus iustis procerum piata  
 Caedibus. Perrupta sub haec Seonis

---

V. 149. Metuendus ales h. e. Michael archangelus.

V. 151. cf. ad vs. 5.

V. 157. Sc. Amalecitas, Exod. 17.

V. 165. cf. Num. 22. sq.

V. 169. Seon rex Hesebonis, Amorrhaeus. Deut. 2, 24. 30 sq.

- 170 Regna: tum pingui Basanaea gleba  
 Fertilis tellus. Iter hac peractum  
 Strage fumantique solo ruinas  
 Urbium Chami genus amnis ultra  
 Audiit ripas populante silvas
- 175 Acrius flamma subeuntis. Eheu!  
 Quantus horrendae miseris procellae  
 Imminet turbo! Chananaea quanto  
 Diffluet tellus hominum cruore!  
 Arma nequidquam nitidoque contra
- 180 Aere florentes acuis catervas.  
 Vasta nil moles iuvat aut sub auras  
 Moenium eductus labor et patentes  
 Amplius fossae, neque verberatum  
 Gurgite undanti latus ingruentes
- 185                   Arceat hostes.  
 Quippe promissas simul atque scisso  
 Amne Iordanis tetigere ripas,  
 Protinus celsas Ierichuntis arces  
 Arietis nullo volucrisque saxi
- 190 Turbine impactas litui canorus  
 Egit in terram fragor et per orbem  
 Ferculo gaudens praeeuntis Arcae  
 Pompa septeno revolata gressu.  
 Hinc Palaestinas volitans per urbes
- 195 Fama grassantis trepidos ruinae  
 Miscuit reges facilesque vinci  
 Stirpis Abramo genitae cruentis  
                   Praebuit armis.  
 Nec tamen pugna neque militari

- 200 Magna pars cessit superata ferro.  
 Quippe delectum genus ante densa  
 Nube crabronum volitavit agmen;  
 Quod truci stridore furens acuta  
 Cuspide hostiles cuneos abegit.
- 205 Quantulo vires hominum Tonantis  
 Corruunt nisu! Quid adacta totis  
 Tela bellanti potuere nervis?  
 Quid polo ac terris pelagoque in hostem  
 Robur effusum? Face quas ruinas
- 210 Ederet vindex trifida aut hiantis  
 Pondere terrae?  
 Quondam et exertis validus lacertis  
 Perculit diris inimica monstros  
 Castra, seu ruptis iaculata grando
- 215 Nubibus foeda quateret procella,  
 Sive anhelantes medio quadrigas  
 Sisteret Titan spatio diemque  
 Longius iusto traheret potenti  
 Voce suspensus. Nova regna tantis
- 220 Clara portentis adiit propago.  
 Sed ferox ultra retinere Princeps  
 Haud sinit gentis Bahali sacratae.  
 Pro nefas! tanti modo non redemptum  
 Concidit late genus. Heu! quid istud
- 225 Profuit iactasse decus suprema  
 Clade ruentes?

---

V. 202. Crabrones; v. Exod. 23, 28. Deut. 7, 20.  
 Ios. 24, 12.

---

**Actus secundus.***Ieriel Chananaeus.*

- Quo non potentes imperi ac decoris rapit  
 Flammatum ardor? Quot per aerumnas brevis  
 Usura sortis petitur! Alterius labor  
 Gradus est laboris. Triste et implicitum malum  
 5 Graviusque seipso semper. Adversi vices  
 Omitte fati: quaeque in ambiguo sitas  
 Fortuna opes convellit. Ad votum omnia  
 Cessisse fac facilesque pugnanti tibi  
 Favere Superos. Nulla non partis tamen  
 10 Sunt imperiis leviora per facinus mala.  
 Sed quod paratis, quamlibet culpa vacent,  
 Umquam fruendis tempus aut requies datur?  
 Secura lux est nulla, seu belli metus  
 Seu bella crucient. Aliud ex alio subit  
 15 Maius periculum. Saeva Lernaei lacus  
 Rediisse dicas monstra. Quam brevior via est  
 Aut cupere nihil, aut nosse cupiendi modum!

---

V. 1. sqq. Jeriel Ch. funestum belli exitum ominatur, et Sisarae suadere statuit, ut eidem finem imponat.

V. 3. Alterius laboris gradus est labor, alter alterum gignit.

V. 9. Quaevis tamen mala leviora sunt partis per facinus imperiis.

V. 15. Hydra renascentibus capitibus monstrosa ab Hercule caesa.



- Quid ante domitos aliud Isacidas Iabin,  
 Quam ut liber esset, petiit? Hoc votis datum est.
- 20 Tributa desiit ferre; dominantem excutit  
 Chananaeus. Hinc spes maior: ipsum liberi  
 Aggredimur hostem. Vincimus; turpem vicem  
 Referimus. Auxit gente bis sena suos  
 Sisaras triumphos. Sed neque hoc regi sat est.
- 25 Inferre gestit arma: vicinas quatit  
 Violentus urbes. Summa tum voti Moab  
 Ammonque visus. Moabum et Ammonem adiicit.  
 Neque hoc quidem contentus; ecce aliud parat;  
 Nova regna ferro quaerit. Accedit ferax
- 30 Votis Idume. Post Philisthaeum oppidis  
 Male quinque tectum invadit. Hac saltem tenus  
 Invisa sistant bella. Sed gravior redit  
 Iudaeus iterum, quaeque perpessus diu est,  
 Imperia subito renuit. Ah! metuo miser,
- 35 Quo fata vergant; dubia quo sese explicet  
 Fortuna. Nec quod opibus aut numero minor  
 In nos rebellat, hoc minus secum trahit  
 Sors haec timoris. Martis anceps alea est.  
 Nec semper iisdem infestus aut iisdem favens
- 40 Alterna reddit damna. Vicere antea  
 Posthac subacti. Bella nunc reparant statu  
 Claudenda forsán pristino: aut quidnam rear

---

V. 18. Iabin, rex Chananaeae, cuius dux militum  
 Sisaras. cf. Iud. 4, 2.

V. 23. cf. Act. I. 46.

V. 30. Idumaea.

- Quod tam secundis rebus audacem Israel  
Lacessit hostem, quamque nostro tempore  
45 Tam non suo quod ante sustinuit iugum  
Abiicere properat? Non tot insignem ducem  
Timuisse spoliis? Causa tentandi subest:  
Est aliquid. Haud se hic protulit temere furor.  
Nimis illa vereor numina, Aegyptus prior  
50 Quae tremuit et quae sensit ac nosmet diu  
Pertulimus ipsi. Bella tractari vetem?  
Hoc aequus ille capiat? hoc miles novi  
Cruoris avidus? Quippe districtus semel  
Vix premitur ensis, fors ubi inceptis favet  
55 Operaeque pretium est. Hoccine ut Princeps ferat?  
Nil in rebelles statuatur? At lenta potest  
Regnare dextra. Mitius gentem premat:  
Parebit et se sponte dominanti dabit.  
Nunc ira et hostis insolens victoria  
60 Tristisque egestas, quaeque et imbelles ciet  
Feras, abactae prolis irritat dolor.  
Sed temperanda haec odia. Nunc regem aggredi  
Decrevit animus, nostra dum in tuto manent.  
Nec me latet quam tumidus et sceptris ferox  
65 Difficile Princeps sana consilia audiat,  
Quam audita renuat. Ira ubi adversum trahit  
Mentem aut cupido, quisquis ad nutum loqui  
Didicit, secundis auribus tuto ingerit.  
Sed me salutis cura et obsequii fides,  
70 Vel si monentem pervicax famulum haud probet,  
Consulere patriae cogit: At saevus gradum  
Rebusque gestis alacer adproperat Sisar

Haberis hospes, quem Palaestinis gravem  
 Revocans triumphis senior Isaciis Iabin  
 75 Obiicere ducibus castra properantem iubet.

*Sisaras. Ieriel.*

*Sis.* Astris propinquum gradior attollens caput  
 Toto ille notus orbe; par superis Sisar;  
 Bello tremendus ductor et, quae pars meos  
 Haud minima titulos ornat, invictae arbiter  
 80 Domitorque gentis, quam nec acer contudit  
 Pharaon nec hostes mille, non populis frequens  
 Amalec, potensve Moabus aut pingues arans  
 Basanaeus agros, non Amorrhæi advenam  
 Fregere bella. Quin et oppressus Seon  
 85 Ogusque et Enaci mole terrificum genus  
 Hebraea sensit arma. Perrupta est freti  
 Adusque magni litus et Syriae plagas  
 Promissa regio: nube ceu rupta emicans  
 Pervadit ignis, qualis aut fracto rapax  
 90 Per plana torrens obice praecipitans ruit.  
 Nunc ille regum victor et rerum potens

---

V. 76. Sisaras rerum successu tumidus delere parat  
 Israelem. Jeriel frustra eum deterret.

V. 82. Amalec, cf. Act. I, 157. Moabus s. Moabitae, Basanaei et Amorrhæi populi australi et orientali Palaestinae parti finitimi. V. Num. 22. sq. Deut. 2, 9. sq.

V. 84. Seon, cf. Act. I, 169.

V. 85. Ogus, rex Basanaeorum de stirpe gigantum, Hebraeis Enaci. Cf. Deut. 3, 1. sq.

- Mea iura populus Marte perdomitus tremit.  
 Mihi victus uni est bisque iam capitis decem  
 Imposita pendit pretia. Nec sola fuit
- 95 Cum gente bellum: victus et gentis Dens.  
 Cui scissa iactat maria, quo terras duce  
 Penetrâsse ad istas fertur, hic nostris tamen  
 Impar trophaeis cessit et potior Baal  
 Captiva subigit numinis colla advenae.
- 100 Hoc hoc peregi, nulla quod longo dies  
 Extinguat aevo, nulla cui sese hactenus  
 Aequare divum facta, nulla hominum queant.  
 Phlegraea quamvis bella et excussos face  
 Trifida gigantes memoret aethereae potens
- 105 Dominator arcis, colle cum aggesto stetit  
 Animosa pubes tela centena manu  
 Iaculata totidem. Pars quota est nostri Mimas  
 Acerque Rhoetus decoris aut Siculo specu  
 Clausus Typhoeus? Nempe mortales deo
- 110 Vicisse facile est: vicimus superos genus  
 Mortale. Nec te nebride accinctum latus,  
 Implicita molli iacula tractantem manu,  
 Imbelle numen, conferam, extrema licet  
 Tellure victor regna subdideris novo

---

V. 93. Bis decem. Jud. 4, 3: Per viginti annos vehementer oppresserat eos (Israelitas).

V. 103. Phlegra, urbs Macedoniae, ubi gigantes in Iovem bellum orsi sunt, quorum tres hic nominantur.

V. 111. Nebride (*νεβρις*) h. e. pelle hinnuli cinctum sc. Bacchum, Indorum domitorem.

- 115 Sub sole posita, decolor fulvum bibit  
 Qua populus amnem. Quidquid opponas parum est  
 Victo Israeli. Nunc, quod in dominum ferunt  
 Nescio quid ausos struere nec dociles regi  
 Absente Sisara, summus anteactis labor
- 120 Iungatur. Huc me Marte distractum extero  
 Transferre Princeps arma quamprimum iubet  
 Malisque fractos premere, quo vetera exedant  
 Animosque praesens rapiat in sese dolor.  
 Proin de rebeli gente, dum ferrum calet,
- 125 Properanda poena est. Miles ad nutum subit  
 Mecum arma capere suetus, imperium sequi,  
 Tot vincere annos; victus aut numquam aut duce  
 Devictus alio. Signa vel contra deos  
 Ductore Sisara iussus extemplo feret.
- 130 Nunc ille praeda onustus hostiles greges  
 Post me catena victor imposita rapit,  
 Populosque iactans viribus fractos suis,  
 Quos dives Arabum collis oppositos tegit,  
 Graditur triumphi more. Condixi locum
- 135 Valle in propinqua, qua rapax currit Cison.  
 Nihil morae esse credo nec quemquam fore,  
 Sisarae ut resistat, cuius exanimis metu

V. 133. H. e. in australi Arabiae Petraeae parte sitos, vel Aegyptios. Cf. Act. 1, 22.

V. 135. Cison est torrens de Itabyrio (Tabor) monte cadens.

V. 137. Cuius metu exanimis (quisquam) nec fixis luminibus tela stricta feret.

- Nec stricta fixis tela luminibus feret  
 Contra feroces pavidus, in pavidos ferox.
- 140 Semel aggredi armis vincere est. Sed quid struat  
 Hebraea soboles, fare: cur tanto fuit  
 Revocandus opere miles? *Ier.* Imperium palam  
 Et pacta capitis pretia non ultra ferunt.  
*Sis.* Quae spes novis oblata consiliis movet?
- 145 *Ier.* Nihil malis iam deesse, quod gravius luant.  
*Sis.* Quid levius ante fuerat? *Ier.* His saltem modum  
 Sperare fatis: longa quod minuit dies.  
*Sis.* Milesne ad arma scriptus? an nondum coit?  
*Ier.* Et castra vallo cominus iacto insidet,
- 150 Qua celsum in auras culmen attollit Tabor.  
 Lectum omne gentis robur hac fortis tenet  
 Statione Debora. *Sis.* Digna degeneri duce  
 Plebs servituti nata. Vecordes tribus  
 Vilis coercet mulier. En qui se maris
- 155 Frenasse iactant spatia, qui mundi iubar  
 Ipsumque medio sistere in cursu diem  
 Vulgo feruntur, rore deciduo ferax  
 Quos nimbus aluit, nostra qui regna occupant,  
 Quorum arma utrique proximus sensit freto,
- 160 Hos saga nutu foemina imbelli regit  
 Et iura populis reddit. En laudum seges  
 Immensa Sisarae! mole vincendum ardua  
 Muliebre regnum restat. Ergo hostis pudet,  
 Quo turpe vinci est; vincere aut nullum decus

- 165 Aut rege minus est. Una victorem iuvet  
 Dirae ruina gentis. *Ier.* Haud culpes ducem,  
 Si certa noris: maior humana indoles  
 Coeloque propior. Qualis aut Cynthi iugis  
 Gelidique ripas propter Eurotae soror  
 170 Phoebea graditur. Illa sublati gravem  
 Humeris pharetram gestat et tota deas  
 Cervice supra est: gente sic illa eminet  
 Potens in omni mulier. *Sis.* In promptu est fides.  
 Praestare quantus inter ignavos labor?  
 175 *Ier.* Haud ista tales regna sensere advenas.  
*Sis.* Hoc hoste metuum? *Ier.* Docuit Aegyptus tamen  
 Quam sit timendus. *Sis.* Bis decem interea mihi  
 Famulatur annos. *Ier.* Pluribus Pharaos premens  
 Obtinuit. Hinc Chusanus et Moabi recens  
 180 Regnator Eglon. *Sis.* Fortis ex illo sciet  
 Quid inerte domino distet. *Ier.* Alieno sapit  
 Quisquis periculo, ne suo sapiat cavet.  
*Sis.* Parum hinc periculi est: Bella fac ausos, diu  
 Qui aut unde tolerant? Rara populas colit  
 185 Urbes iuventus; reliqua pars vacuis latet

---

V. 167. Humana est abl.

V. 168. Cynthus mons Deli insulae, ubi nata est Diana.

V. 169. Eurotas fluvius prope Spartam ex Maenalo monte prolabens.

V. 179. Chusanus, v. Act. I, 82.

V. 180. Eglon, v. Act. I, 84.

- Dispersa campis saxaque et sylvas laris  
 Inops cibique complet; exusta est seges  
 Et adusta flagrant arva. *Ier.* Quin vires dedit  
 Ipsum hoc dabitque, quod nihil genti est super,  
 190 Cui metuat aut cui parcat. *Sis.* At nondum periit;  
 Et hoc furori restat. *Ier.* In miseros nimis  
 Qui saevit, armat. *Sis.* Ne quid exinde ingruat,  
 Obstare facile est. Vasta disiectis dabo  
 Moenibus et ante quidquid intactum eruam.  
 195 *Ier.* Sic nulla per tot praemia aerumnas petis?  
*Sis.* Servire discent. *Ier.* Nempe quos nullos iubes  
 Esse, ut tui sint. *Sis.* Vacua sublato advena  
 Regna obtinebit dives exercens solum  
 Nostras colonus. *Ier.* Nilne te gentis movet  
 200 Terribile numen? *Sis.* Cuius infregi minas  
 Roburque domui? *Ier.* Cuius infrenis manum  
 Niliaca monstris horruit tellus decem:  
 Cum iussa liquidis turpis emersit vadis  
 Camposque textit rana; cum infestus cynips  
 205 Et avidus isto pulvere exsiliit culex;  
 Cum strage fudit pecora et infusus cinis  
 Horrenda sparsit ulcera; excepit vorax  
 Locusta. Quid vel stagna sanguinea loquar  
 Infecta tabe? quasque vel posses manu  
 210 Palpare tenebras? prole quid tandem domos  
 Seniore vacuas? Ille diductis fretum  
 Patefecit undis; ille mersas fluctibus

---

V. 186. Laris inops h. e. sine tectis.

V. 204. Cynips (iphis) musca canina.



- Involvit acies, terga dum incautus premit  
 Pharao. Propinquos adspice: hic veteris, Sisar,  
 215 Monimenta cernes cladis; hic quantas furens  
 Exercet iras disce, qua pugnat manu.  
*Sis.* Inanis iste terror: hunc vecors sibi  
 Ascivit animus. Turpe dum vinci aestimat,  
 Deum esse in hoste finxit. Et, verum ut putes,  
 220 Cessisse quantum est viribus numen meis?  
*Ier.* Ne crede victum. Cedere ad tempus solet  
 Quo gravius olim infestet. *Sis.* Ulcisci genus  
 Rebelle timeam? Sceleris ut nullas sui  
 Poenas Hebraeus referat? Hoc quidnam amplius,  
 225 Si victus essem, paterer? *Ier.* Id ne sis vide.

*Baracus. Sisaras.*

- Bar.* Magnanime Princeps, regna quem late tremunt  
 Chananaea, missi huc stirpis Isaciae duces  
 Non bella ut ante, iura vel victis truces  
 Metuenda ferimus. Pristinum invidit decus  
 230 Fortuna: quidquid restat ex illa, unicum  
 Miseris levamen, vota portamus tibi  
 Gemitusque. *Sis.* Sic vos regis imperium movet?  
*Bar.* Quod facere nequeas qui imperat, fieri vetat.  
 Ferri iubes tributa. Iussis obsequor.  
 235 Cedo unde iubeas? Qua peti parte imperas

---

V. 226. Barac (filius Abinoemi e tribu Nephthali)  
 victori Sisarae fit supplex, a quo tamen cum insigni fa-  
 stu reiicitur.

- Quod detur? Oppidisne, quae vestris ruunt  
 Adusta flammis? Avidus exhaurit domos  
 Populator et quod inde subtractum est sibi  
 Periisse reputat. Nec satis propere genus  
 240 Concidere nostrum queritur. An frugum satu  
 Vitisque, queis non saeva praedonum manus  
 Abstenuit? Ardent culta. Vix natas cremat  
 Virente culmo torridus segetes vapor.  
 Succissa passim vitis, evulsae arbores,  
 245 Suisque tellus strata seminibus vacat.  
 Ut abacta sileam pecora deque ipso boves  
 Demplos aratro, magna pars caeso iacet  
 Cultore sterilis. Irritus quosdam labor  
 Deterret, hosti serere dum soli piget.  
 250 His capitis addas pretia? Si vitam exigis,  
 Praestare possum: quidquid hanc praeter fuit,  
 Pridem abstulisti. Posce quod nondum tuum est.  
 Quid sponte miseros ludis? *Sis.* Haud quidquam  
 Mutare. Fas sit an nefas, fieri volo. [libet  
 255 *Bar.* Violenta numquam imperia perpetuo vigent.  
*Sis.* Sint vera saltem, donec etiamnum vigent.  
*Bar.* Iniqua saevus iussa qui cogit sequi,  
 Saepe aequa victus patitur. *Sis.* Abscede ocus  
 Frenosque recipe. Iussa ni peragis, feram  
 260 Haud verba contra. Perdam et aequabo solo  
 Vestri reliquias generis. *Bar.* Haud deerit suis  
 Regum ille domitor, cuius expavit manus  
 Aegyptus undis mersa diductis videns  
 Infesta profugis agmina; hoc freti auspice  
 265 Perstitimus. At te numinis tanti metus

- Subeat. Inultum nullus hunc contra tulit  
Facinus. *Sis.* Nihil me vana perterret dei  
Imbellis ira, cuius infractum mea  
Virtute robur cecidit. Hinc porro exigam  
270 Tellure adempta: quique iam vestris Baal  
Prope unus aris colitur, in reliquum genus  
Imperia penitus sparget. *Bar.* Averso prius  
Iordanis amne referet in geminos pedem  
Fontes relapsus. Ante conceptos sinu  
275 Fovebit ignes Tethys, infandum scelus  
Quam mente capiam, iura quam cultu impio  
Sacrata violem, pro quibus patriam velim,  
Natos, parentes, coniugem, vitam dare.  
*Sis.* At pars tuorum maior hunc templis deum  
280 Adscripsit, hac tu solus e turba sapis?  
*Bar.* Vesana plebes quolibet praeceps ruit  
Facilisque flecti est, quam metus, spes aut furor  
Aut imperantis nutus in partem rapit.  
His me remittam? stulta servilis sequar  
285 Arbitria vulgi? stabo vel tota unicus  
De gente: vitam rapere ab invito potes.  
Auferre mentem non potes. Mecum adiice  
Sentire quidquid Isaci e stirpe inclytum  
Supraque dubiae sortis erectum vices  
290 Pari ruinas pectore ingentes capit.  
*Sis.* Tantosne victum spiritus numen facit?  
*Bar.* Haud victus ille est, sponte qui vinci suos  
Patitur. *Sis.* Quid illum gentis eductae piget?  
*Bar.* Praestanda fuerant scelera. *Sis.* Cur hoste utitur?  
295 *Bar.* Ut perdat hostem. *Sis.* Nemo quem perdit beat,

- Bar.* Ut gravius olim caderet ex alto, extulit.  
*Sis.* Tot perdit annos? *Bar.* Serus ulcisci solet,  
Sed ira tempus pensat. *Sis.* Hunc quisquam colat  
Hosti faventem, quo suum perimat genus?
- 300 *Bar.* Tunc est timendus, cum favet sonti deus.  
*Sis.* Me potius, ut sic libeat ulcisci, oderit.  
*Bar.* Exigua quantis lucra pensantur malis?  
*Sis.* Si quem ille vestris posset aerumnis modum,  
Pridem attulisset. *Bar.* Gravior miseris salus
- 305 Aegre impetrata. *Sis.* Tristior votis diu  
Frustra expetita. *Bar.* Post tot adventu ducum  
Superata nostro bella, post scissum mare,  
Post regna tot perfracta, promissa genus  
In sede positum, cassa praesidia obiicis?
- 310 *Sis.* Temere ista vobis rumor affinxit vetus.  
*Bar.* Nondum liquet de auctore? Chusanum aspice  
Et amne duplici nobilem Syriae sinum.  
Ubi fortis Eglon? vel Philistaeus gravi  
Mactatus Anathi vomere? *Sis.* Addidimus satis
- 315 Aures loquenti: desine. Experiar deus  
Quid vester ille possit. *Bar.* Haud frustra scies.  
*Sis.* At te, superbo nostra qui fastu minax  
Ultro laccessis odia, plebeium genus,  
Dominumque terres, nullus exitio deus
- 320 Locusve rapiet. Tecta cultori suo  
Iniecta mox communis absumet rogos.  
*Bar.* Audere promptum est magna, difficile exequi.

*Sisaras. Madian.*

- Sis.* Ut quisque domitis parcit et iusto modum  
 Ponit furori lentus et decori timens,  
 325 Hoc sua periculo sceptrā gravioꝛe implicat;  
 Perdenda prorsus dubia. Quod regno expedit,  
 Fas imperanti est. Iura privatum caput  
 Legesque metuat. Lex sibi et recti arbiter  
 Dominantis animus: quidquid huic placitum est licet.  
 330 Hinc diva solium, fama si vera est, Iovis  
 Astraea, et illinc cana circumstat Themis,  
 Ut iussa quo se cunque rectoris dabunt,  
 Aequum hoc putetur. Fracta cum primum iugum  
 Hebraea nostro Marte progenies tulit,  
 335 Perire decuit penitus. Hinc nil iam sibi  
 Victor timeret. Sed neci oppressos dare  
 Tot immerentes piguit. Hoc illi puto  
 Timuere facinus. Regna cum scisso fugax  
 Aliena pelago turba perque Arabum plagas  
 340 Et inhospitalis spatia transmittit soli,  
 Cui tum pepercit? cuius abstinuit manus  
 Dirus cruore praedo? cui vitam dedit  
 Cum servitute. Strage populatim domus  
 Arsere eadem. Periit aetatis quoque  
 345 Discrimen his sexusque: seu sparsa oppidis

---

V. 323. sqq. Sisaram extrema Hebraeis minitantem  
 ambiguo Iovis oraculo terret Madian.

V. 331. Astraea dea iustitiae, et Themis dea  
 iuris,

- Involvit omnes flamma, seu captas volat  
Strictus per aedes ensis et teneram fodit  
Cum matre sobolem. Nec sat exhaustum mali est.  
Obarata circum moenia et iactu salis  
50 Moriente gleba marcescet infelix ager.  
Quae tam ferarum dira barbaries prius  
Cultore caeso bella cassosque impetus  
Tellurem in ipsam vertit? Hoc gentis fuit  
Iter; haec secundis rebus in sese dedit  
55 Exempla. Cur non victa quo vicit modo  
Rursum opprimatur? Cur quod huic in me datum est,  
Mihi in hanc negetur? iura, quae docuit, ferat.  
Servire contra placuit. Esto agendum. Duces  
Saltem occidissent. Cetera, ut quondam, gravi  
60 Distenta plebes opere servitium gemens  
Perenne traheret, ne quid in dominos vacet  
Moliri opesque recipere antiquas paret.  
Hos lenta moles teneat; hi strato aggere  
Vastam imminenti flumini obiciant moram;  
35 Aut dura fodiant marmora aut terra eruant  
Opes repostas. Moenium hos ingens labor  
Sparsos per urbes dividat. Tutum nefas,  
Hoc si nefas est, exequi ex usu imperi est.  
Nam quis per omne tempus obsequia integrae  
70 Praestare gentis possit? Invitos diu,  
Unde audeant si subsit, haud facile premas.  
Ergo haec rebelles pervicax motus ciens

- Servitia renuit. Nec suum in tempus ferox  
 Differetur animus: praecocem in nos impetum  
 375 Iamiam minax intentat. Et coeptum quidem  
 Porro ausa facinus pergat. Hoc voti caput,  
 Extrema regis odia ut in sese trahat, [fero  
 Dare cuncta pessum ut iubeat. *Mad.* Hac rursum af-  
 Quod parte metuas. *Sis.* Quid? *Mad.* Quod incerta  
 380 Ambage nectit. Quippe fatidicis Iovis [deus  
 Ut iussus adytis supplicem admovi pedem  
 Manifesta sortis signa venturae petens,  
 Una et sacerdos aderat: extemplo cavis  
 Vox illa latebris missa; meminisse horreo.  
 385 Bella acri Chananaei paras cum gente. Cavenda est,  
 Sic iubeo, iam passa iugum fortisque iuvenca.  
 Altera sed metuenda magis, quae priva pererrans  
 Pascua ab armento sese cum compare dudum  
 Segregat: has si tu vitaveris, auspice vinctes  
 390 Hebraeos Baale et regnis potiere petitis.  
*Sis.* Quaenam illa pestis gemina? *Mad.* Ni fallor liquet,  
 Ambigua quidnam fata venturum tegant.  
*Sis.* Ecquid? *Mad.* Cavere comparem iussit bovem,  
 Quae priva oberrans pascua armento fugit  
 395 Passim relicto. *Sis.* Quas mihi insidias canis?  
*Mad.* Haberis uxor nota Cinaei Iahel.

---

V. 385—90. Hexametri.

V. 396. Iud. 4, 11. Haber autem Cinaeus recesserat quondam a ceteris Cinaeis fratribus suis filiis Hobab cognati Moysi: et tetenderat tabernacula usque ad vallem, quae vocatur Sennim, et erat iuxta Cedes.

- Sis.* Quid deinde? *Mad.* Fortis mulier et quidvis manu  
 Audere prompta, compari dudum comes,  
 Secreta gente proxima nobis lares
- 400 Statione posuit. *Sis.* Quid meam in noxam parit?  
*Mad.* Ab hac timendum fata nescio quid monent.  
 Lapidotheris alia est. *Sis.* Convenit sexus quidem  
 Numerusque. Sed quod altera exitium dabit?  
 Ego inde quidquam verear? Est illa mihi
- 405 Cum stirpe foedus. *Mad.* Hoc mage insidiis locus,  
 Quo non timetur hostis. Ergo ullum putas  
 Cum gente fidei pignus inimica, effera  
 Stabile esse regi? Flamma se nivibus prius  
 Sociabit, ortus merget, occasus diem
- 410 Coelo reponet; ante Iordani Tagus  
 Miscebit undas: pace quam fida exteris  
 Iungatur audax populus. In praesens timor  
 Simulare et opibus colere potiolem iubet:  
 Mox, tempus ubi se dederit et sceleri locus,
- 415 Concepta promet odia. Nil prae se deos  
 Hominesque pensi (si palam tutum est) habet.  
 Animo vetusta repete, quot reges neci,  
 Quot regna flammis dederit. Arsere oppida  
 Cum cive pariter. Iunctus aetatis cruor
- 420 Undavit omnis, donec exhaustas fugax  
 Populator urbes stirpe complevit vaga.  
 Haec pacis olim foedera, has noster vices

---

V. 402. Lapidotheris, v. Act. I, 117.

V. 410. Tagus (Tajo) Lusitaniae fluvius.



- Chananaeus habuit. Disce quam servant fidem  
 Et quam merentur. *Sis.* Hactenus culpa caret  
 425 Cinaeus. *Mad.* At non, fors modo ad votum accidat,  
 Semper carebit. Prosperis rebus fides  
 Utcunque perstat. *Sis.* Paululum eventum iuvat  
 Pugnae opperiri. *Mad.* Quidquid extemplo potest  
 Impune peragi, saepe dilatum obfuit.

*Chorus.*

- 430 Heu quam difficile est posse suis modum  
 Votis ponere, nec plus licitis sequi  
 Nec divis nimium credere prosperis,  
 Dum curvat tumidos aura favens sinus!  
 Tunc quacumque datum est mobilis immemor  
 435 Fati nec dubias mente agitans vices  
 Expers consilii praecipitat furor,  
 Donec clam tacitis gressibus insequens  
 Iniecta Nemesis pessum adigat manu.  
 Dum ventis pelagi strata silentibus  
 440 Rident marmora, seu molliter adstrepens  
 Crispatur placidis unda Favoniis,  
 Vidit sepositi litoribus procul  
 Cultor iugeris et perpetuam ratus

---

V. 430. sq. Chorus (Chananaeorum) monet Chananaeos bellis victoriisque modum ut ponant. Metrum Asclepiadeum primum minus, versum Asclepiadeum secusque repetens: — — — v v — | — v v — v v  
 Cf. Senec. Med. Act. I, vs. 56. sq. Thy. 122—175. Tro. 374—411.

- Tranquillae faciem Tethyos, impigre  
 445 Mutavit patrios navigio lares  
 Ignotoque caput credidit aequori.  
 Verum bis Superis terque faventibus  
 Neptuni relegens terga liquentia,  
 Postquam impune ratem portubus appulit,  
 450 Mutati furias sensit inops maris.  
 Et longi pretium temporis abstulit,  
 Seu mersus mediis fluctibus occidit,  
 Seu rem naufragio perdidit et fidem.  
 Sic quos continuis invidiosior  
 455 Ad summum gradibus provehit et pares  
 Fortunae omnipotens coelitibus facit,  
 Cum semper similem, semper amabilem  
 Sperant, ulterius tendere fervidi  
 Alto praecipites culmine corruunt.  
 460 Duros Isacidas, coelicolum genus,  
 Per tot saeva ducum funera sedibus  
 Eductum Phariis, tot freta naufragis  
 Quondam sparsa, tuo sat, Chanaan, fuit  
 Spem votumque supra servitio premi.  
 465 His maiora sequi mitte. Quid obrutos  
 Rursum Marte quatis? perdere quid paras?  
 Ausurosque cies? Numinis advenae  
 Nondum experta tibi dextera, quam gravi  
 Hostes concutiat mole, tegat suos?  
 470 Hoc freti profugos auspicio lares  
 His fixere locis. Nil validus Seon,

- Nil prisca Aramidum stirpe satus Balac  
 Hos contra potuit tendere, nil Basan,  
 Nec vasto Enacides terribilis statu;  
 475 Bissena hinc populi per totidem tribus  
 Partita est regio finitimae latus  
 Praetentum ad Syriae quaque fretum urbibus  
 Clarum quinque manet, quas Superum furor  
 Flammis et pluvio sulphure perdidit.  
 480 Hac cum gente moves praelia, quae polo  
 Quaeque undis posuit iura furentibus?  
 Absiste. Heu! quid agis? Nullus in hos ducum  
 Impune arma tulit. Sponte necem oppetis  
 Rebusque properas exitium tuis.

---

### Actus tertius.

*Debora. Barac.*

*Deb.* Vos imperata facite et ignavos metus  
 Excutite: nihil auctore trepidandum Deo est.  
 Ille aderit et pro gente dilecta memor

---

V. 472. Balac Sephoris filius, rex Moabitarum.  
 Cf. Num. 22, 23. 24.

V. 474. Enacides, v. Act. II, 84.

V. 1. sqq. Debora Baracum Deo fretum iubet obviam procedere Sisarae, victoriamque Iahelis manu reportandam praedicat.

- Pugnabit ultro. Bella quis pro se Deo  
 5 Pugnante metuat? Pignus haud dubiae dabit  
 Salutis illa tot ducum spoliis ovans  
 Fatalis Arca, quaeque percusso leves  
 Expressit undas silice demerso potens  
 Pharaone virga. Pars erit laudum minor  
 10 Sublata generis ultima haec nostri lues.  
 Licet arma Sisaras contra et innumeras agat  
 In nos cohortes, quot sub autumnum cadunt  
 Excussa silvis folia, vel denso fugam  
 Trans aequora urgent agmine alituum greges,  
 15 Ubi prima gelidis incubat terris hiems.  
 Hoc nempe victos gravius exitium premet  
 Maiorque sese Numinis prodet favor,  
 Cui dubia parent fata, qui belli regit  
 Faciles habenas. Ille confisos sibi  
 20 Eripiet. Agedum segnis abscedat timor.  
*Bar.* Abest, nec ullos te duce horrescam exitus.  
*Deb.* Sed vetera cedant probra. Quae scelere est prius  
 Contracta poena, scelere deposito cadet.  
 Facilis precanti venia, cui venia est opus,  
 25 Id si amputetur. Adspice infensus suis  
 Quoties pepercit. Stricta cum quateret manu  
 Vibrante tela, supplicì evictus prece est.  
 Hac ille vinci gaudet. In poenam ruit  
 Invitus, ultro parcit. Irato Phinees

---

V. 29. Phinees divino commotus zelo flagitium  
 publice commissum expiavit gladio. Num. 24, 1. sq.

- 30 Extorsit arma. Vindicem gladium movens  
 Unus furori restitit. Quid? cum ignea  
 Fornace vitulus fusili in turpem deum  
 Conflatus auro est, seque vesanas ciens  
 Choreas nefandam populus in cladem induit,
- 35 Quam facile precibus cessit! An turbæ loquar  
 Sitientis alias murmur aut volucres novo  
 Questu expetitas? Una vox genti fuit  
 Quoties saluti! Nunc quoque, ut desit nefas,  
 Fuerit, supremi pacta si Regis valent.
- 40 Quacumque ritu dirus incesto Baal  
 Colitur, per omnes fana subvertant tribus.  
 Ferro recidant nemora. Nunc gentis iube  
 De more pavidum cedere ex acie genus.  
 Quicumque tectis nuper extructis venit,
- 45 Procul facessant. Vite si quisquam sata  
 Claudit recentem nec meti in vulgus sinit,  
 Quicumque thalamis miles uxorem novis  
 Despondit, abeat, ne quis extincto faces  
 Prior iugales tollat. Attonito metu
- 50 Ignavus hostem si quis armatum pavet,  
 Absistat illinc citius et bello vacet.  
 Properate. Matrum turba me supplex manet.  
 Hac comite superum vota concipiam patri  
 Affusa templo. *Bar.* Testis ille hominum sator,

---

V. 31. Cf. Exod. 33, 1. sq.

V. 35. Turbae sitientis murmur. Cf. Exod. 15, 24.  
 17, 1. sq. Num. 20, 2. sq.

V. 36. Cf. Exod. 16, 1. sq.

- 55 Me nulla nisi te bella sociata manent.  
 Si pergis una, rapior: abscedis, sequor  
 Belli fugaeque socius. *Deb.* Hoc precibus, Barac,  
 Tuis remitto. Nec tamen victoria  
 Potiere solus. Laudis hunc titulum minor
- 60 Praeripiet hostis, quamque vix credas, dabit  
 Finem huic labori mulier. Hac profugus Sisar  
 Dextra peribit. Video traiectum caput  
 Humique fixum. Tudite ferrato procul  
 Per utraque clavus tempora impactus sonat.
- 65 Exanime corpus cerno. Iam totos cruor  
 Inundat artus. Macte. Sic Superis proba  
 Populoque dextram. Pudeat exempli viros  
 Alacresque pugnam inite. *Bar.* Praegestit manus.

*Debora sola.*

- Tu nunc secundo placidus haec nutu rege
- 70 Pro te tuisque bella, quem colimus pii,  
 Cui sacra soli ferimus. Excutere imperas  
 Servitia? iussa facimus. Ad bellum vocas?  
 Paremus. Adsis unica oppressi salus  
 Populi ac levamen. Quanta circumstent vides
- 75 Nos undique arma, qua tuos acie petat  
 Chananaeus. Illos laxa vix tellus capit:  
 Angustus omnis campus. Hic rigida citas  
 Armat quadrigas falce praepetibus rotis

---

V. 69. sqq. Debora Deum precatur, ut Chananaeos opprimat.

- Equisque fretus. Ille Ithureum minax  
 80 Intendit arcum. Saevit hic iaculo; teres  
 Haic funda; gladium pars vel aeratam quatit  
 Dextra bipennim. Nostra te solum aspicit  
 Spes, sancte Genitor. Gente pro cara exsere  
 Dignum Tonante robur. Hoc Pharium ducem  
 85 Habes in hoste. Nil tibi fisso est opus  
 Pelago: minori stabit exemptus iugo  
 Populus; furori parce nec tota arripe  
 Virtute bellum. Stridulus denso culex  
 Tibi militabit agmine aut turpi loquax  
 90 Educta limo rana. Quid tela explices?  
 Cessent licet: strepentis ad sonitum tubae  
 Concussa sponte moenia in sese ruent.  
 His efferatam barbari in famulos ducis  
 Compesce rabiem. Causa nobiscum tibi  
 95 Communis illa est. Muneris vindex ades  
 Tui ipse. Regnis pellimur per te datis,  
 Per te occupatis. Pateris? et victor Baal,  
 Victum feretur Isaci Numen? Sines  
 Inultus ista? Surge. Nunc toto Deus  
 100 Clauescat orbe. Clade condiscant sua  
 Quantum Israelis Baale sit potior Deus.

*Iahel. Debora.*

*Iah.* Sacrata divis mulier, interpres poli  
 Fatigue vates conscia, ecquam perditis

---

V. 79. Ituraea regio Palaestinae petrosa ad radicem Libani montis. Ituraei sagittandi arte insignes.

V. 102. sqq. Debora laheli divina oracula exponit; eamque ad reportandam victoriam designari edocet.

Portas salutem? Votane adspexit Deus?

05 An temere in auras sparsa praecipites eunt?

*Deb.* Respexit; et vos, certa si Superis fides,

Regno impotenti solvet. In cursu est salus.

Fatale tempus instat. Haec nobis dies

Chananaea rumpet vincla. Delectas tribus

10 Per me secundo Numine excitus Barac

Ad bella cogit, quaeque Nephtalios arat

Cognata campos, quaeque Zabulonem colit.

Bis quina secum millia huc tacitus rapit,

Qui culta tereti plana despectat iugo

15 Galilaeus illinc collis, hinc rapido cadens

Abrupta cursu saxa devolvit Cison.

Sed ante Sisarae missus orator prece

Tentavit animum: iura famulatus gravis

Et acerba gentis fata captivae querens.

20 At ille, cautes qualis in medio riget

Immota pelago, pulsa vel quercus leves

Perfringit auras, robore immenso tumens

Nihil remittit; bella quin ipsum ferox

Contra Tonantem tumidus imperio gerit.

25 Vesana rabie corda sic vindex Deus

Duravit idem, caeca qui Pharii prius

Armavit odia regis et flecti dedit

Indocile pectus. *Iah.* Perge non aequum tuo

Placare populo Numen. *Deb.* Haud vanus labor,

---

V. 110. sq. Iud. 4, 10. Qui accitis Zabulon et Nephtali ascendit cum decem millibus pugnatorum, habens Deborah in comitatu suo.



- 130 Si patria repetat iura. Mutatis dabit  
Meliora, qui nunc opprimit sotes Deus.  
Nec tarda voti spatia. Prostratum dies  
Haec ipsa Sisaram debet ac leto datum.  
Nos bella et hostis, te decus belli manet. [des?
- 135 *Iah.* Egone hoc capessam? *Deb.* Dubia cur titubat fi-  
Nondum Tonanti creditur? *Iah.* Posse hunc puto.  
*Deb.* Ne velle dubita. *Iah.* Petere si fas est piis,  
Responsa, Vates, pande quae memoret Deus.  
*Deb.* Hinc procul referat pedem quisquis profanus et
- 140 Execranda sacra cultu colit et infames deos. [impio  
Vos, quibus dixisse fas est iussa summi Numinis,  
Mentibus reponite imis: magna res agitur mihi.  
Ut sacrato limini ardens supplicem gressum intuli  
Vota peragens gentis et opem coelitum rite advocans,
- 145 Ter solo profusa moestum deprimo ante aras caput  
Flebili voce ingemens pactique nobiscum fidem  
Foederis testor. Repente concita intremuit domus,  
Horrido concussa tellus ter fragore perstreptit,  
Frigidus per ima currens ossa pervasit tremor.
- 150 Tum sacris mugitus ex adytis truci sonitu emicat.  
Ante me subinde supera sede lapsus Aliger  
Aureas quatiens volatu praepeti alas constitit,  
Ore purpureo nitens: qualis corusca flammeus  
Nube tractus dissilit celerique percurrit face.
- 155 Maior exin homine mox aures meas pepulit sonus:  
Pone modum precibus, raptasque ad bella cohortes  
Instrue; sic Deus ipse iubet. Tibi muneris huius  
Mox cape Nephtalia comitem de stirpe Baracum.  
Ille aderit, qui me coeli submitit ab axe


- 160 Omnipotens genitor, Chananaeaeque vincla resolvet.  
 Ille acies contra atque hostilia castra suorum  
 Pugnabit pro gente animum viresque ministrans;  
 Falcatosque ruet currus; dux femina tantis  
 Rebus erit, coeptisque dabit tamen altera finem.
- 165 Haec ille: placidis inde subvectus polo  
 Diffugit alis, ocior ventis, levi  
 Somnoque similis. Dux ego his coeptis minor:  
 Tibi summa rerum parta. Quod superi probant  
 Invade mulier. Plura scrutari nefas.
- 170 Et ipsa, qua tu parte desperes, iter  
 Fata explicabunt. *Iah.* Commodo obsequiis manus  
 Vitamque et ipsa si quid est vita amplius.  
 Praei: capessam reliqua et auctorem sequar.

*Chorus.*

- Hominumne fata volvi  
 175 Nutu rear Tonantis?  
 An caeca vis rotarum  
 Moderante frena nullo

---

V. 174. sqq. Chorus (Iudaeorum) docet miseriarum omnium causam esse idolorum cultum, monet proinde Hebraeos, ut iis spretis verum Deum colant. Versuum genus est tetrapodia iambica catalectica  $\bar{v} \text{ — } 'v \text{ — } v \text{ — } \bar{v}$  vel versus Anacreonteus (dimeter ionicus acatalectus) hac forma:  $v \text{ — } v \text{ — } 'v \text{ — } v \text{ — } \bar{v}$ . Exemplo Senecae Medea vs. 849—878.

- Sus deque versat orbem?  
Hic ille mentis aestus  
180 Animis frequens recurſat:  
Dum te pio dolemus  
Gens Israele creta,  
Opis auxiliſque egentem  
Tot iam opprimi per annos,  
185 Tot cladibusſque frangi,  
Fruſtra Deum videntes  
Proavos Deique amicos  
Prae te duces ferentem.  
Ubi pacta tot ſtupendis  
190 Olim probata monſtris?  
Ubi coelitum potenti  
Cum Rege foedus ictum?  
Promiſſa quid ſecundis  
Iuvat attigiſſe regna  
195 Superis? Quid execrandae  
Paſſim vagante ferro  
Viduasse gentis urbes,  
Si ſic trahenda praeceps  
Stirps Abramaea quondam  
200 Fueraſ iugoſque victi  
Victrix premenda regis?  
Laribus procul paternis  
Proles abacta moeret,  
Ipsaſque dirus una  
205 Vacuat domos ſatelles.  
Squallet relictæ tellus  
Cererisſque fruge nuſquam,
- 

- Nusquam satu Lyaei  
Inopes alit colonos.
- 210 Quacunque culta agrestis  
Pubes opima vertit,  
Mox falce crebra adultas  
Segetes metunt quadrigae;  
Aut sparsus undique ignis
- 215 Rapidis adhuc virentes  
Flammis perurit herbas  
Sterilesque nudat agros.  
Has inter occidentis  
Populi graves ruinas
- 220 Ecquem suos amare,  
Quod providere Numen  
Rebus putes caducis?  
Imo haec acerba fatu  
Mala praesidemque terris
- 225 Memoremque adesse pacti  
Summum probant parentem,  
Qui non inulta carae  
Delicta gentis aequus  
Patitur levique sontes
- 230 Proprios parentis instar  
Monet increpans flagello.  
Mox deprecante poenam  
Culpa reo ferire  
Lentas manus coercet.
- 235 At quos severus odit,  
Hos pertinacis irae  
Laxis ruens habenis

- Violentus haurit ardor.  
Proin quidquid acta retro,  
240 Ventura quidquid aetas  
Tulit asperum feretque,  
Non tu Deo malisve  
Potes imputare fatis:  
Sceleri haec statuta merces.  
245 Huc huc satus nefandi  
Seges excitata crevit,  
Dum coelitem profanos  
Templis greges adoptas  
Et mille foeda monstribus  
250 Simulacra ceu propinquae  
Contacta labis haustu  
Spreto colis Tonante.  
Agedum tuis, quod instat,  
Poenis, Hebraea proles,  
255 Docili iugum subire  
Collo subacta disce.  
Tunc esse qui fluentis  
Mundi leves habenas  
Nutu arbitrante torquet,  
260 Meritisque digna lance  
Neutram in partem recliui  
Sero licet rependit,  
Documenta quae relapsis  
In peius ante rebus  
265 Dederas, dabis secundis.
-

## Actus quartus.

*Haber Ctnaeus. Iahel uxor.*

- Hab.* Si tempus unquam triste, luctificum, asperum  
 Nostraque dignum gente, dignum odio fuit  
 Laesi Tonantis; si qua pertaesum dies  
 Vitae prius conspexit et cupidum mori;  
 5 Haec ipsa demum illuxit. O Divum potens  
 Hominumque, quid nunc lentus et nostri immemor  
 Barbarica pateris sceptris captivas tribus  
 Atroxque domini ferre peregrini iugum?  
 Meruimus ista; fateor: haud temere tuus  
 10 In nos furor desaevit et noxae pares  
 Poenas reposcit. Sed quid hoc ipso Deus  
 Ab hoste meruit? Quaelibet per te exige  
 Supplicia: cur te hic spernat et vinci exprobet  
 Tumidaque inanes voce commendet deos?  
 15 Hoc scelere nostro levius? Huc iacula, huc minas  
 Converte potius, qua tuum nullus vocat  
 Celebratque nomen. Pereat infelix Baal  
 Baalisque cultor; gente dilecta abstine.  
 Te per Taraei nomen obtestor patris,  
 20 Carosque manes Isaci, et prole inclytum  
 Pulcra Israelem, perque legiferum ducem,  
 Pacti memento veteris. En lecta satus

---

V. 1—133. *Haber* suorum miseras deplorat, sibi que etiam timet: animat eum uxor, et meliora sperare iubet.

V. 19. Taraei patris h. e. Abrahami, cuius pater erat Thare. Cf. Gen. 11, 27.

- De stirpe populus gemina, quod dictu est nefas,  
 Bis lustra servit. Undique infestus solum
- 25 Populatur hostis; aret incultus siti  
 Heu! lacte quondam et melle distillans ager,  
 Sterilesque campos nulla convestit seges;  
 Nec laeta fructus arbor aut viridi foveat  
 Aprica colle vitis. Hic oleas metit
- 30 Adhuc virentes; ille crudas amputans  
 Destringit uvas: quaeque praedantes piget  
 Avehere, late squallidus torret vapor.  
 Opima soli terra cultori vacat.  
 Quid quod parentum rapta complexu ac sinu
- 35 Captiva proles trahitur et regis domum  
 Famularis implet turba? quam nunquam fuit  
 Peperisse melius. Gentis oppressae parens,  
 Nobis verendum Numen, ignotum exteris;  
 Si spes relicta est nulla, nec rebus datur
- 40 Miseris recursus, pereat extinctum semel  
 Quodcumque superest. Vindice flamma intona;  
 Imo adice si quid cladibus tantis potes.  
 Nam quid potes? Mortemne? Quis mortem abnuat,  
 Si sic trahenda est vita. Degeneres viros
- 45 Servire pretio lucis indultae iuvet:  
 Mihi turpe luce est gravius erepta iugum.  
*Iah.* Unanime coniux, desine imbelli Deum  
 Onerare luctu. Pressius fortes decet  
 Obiiti et undae ferre violentae impetum.
- 50 Adversa virtus robore indomito caput.  
 Haud est virile, dura si tollas, gradu  
 Perstare firmo. Placida cum nulli freta

- Venti lacesunt, nullus ex imo minax  
 Permiscet aestus; puppe quid portum integra  
 55 Tenuisse mirum est? Artis hoc specimen, graves  
 Superare fluctus posse, nec vinci malis.  
*Hab.* Haud ista pro me bella metuentem dolor  
 Privatus angit. Cernere incolumi licet  
 Patriam cadentem. Foedere hoc mecum manus  
 60 Chananaea iunxit, nostra ut in tuto domus  
 Et sortis extra damna communis foret.  
 Te magne testor generis Hebraei parens,  
 Non me ulla populi fata, non saevas vices  
 Fugisse patriae. Nullus ignavum timor  
 65 Ad haec subegit iura, sed gentis salus  
 Pietasque; dura sorte percussis opem  
 Clam rege volui ferre. Nec me consili  
 Hucusque pigitum est. Supplices quoties lare  
 Protegere fido licuit, insontes Iabin  
 70 Quoscunque saevus pressit? Innumeris fugam  
 Vox haec necemque repulit. Haud aliter suis  
 Praemissus istinc Isaci Pharium nepos  
 Flexit tyrannum, sede cum patria movens  
 Niliaca regna plebe natorum parens  
 75 Comitante petiit. Sed mali expertem licet  
 Aliena tangunt damna. Me summi fides  
 Numinis et Arcae cura captivae movet.  
 Illam profanis barbarus miles trahens  
 Lustrabit oculis? clara tot signis ovans



- 80 Monimenta pictis laetus appendet tholis?  
Et hoc tueri cogar? Hanc oculis feram  
Speciem? Quid ultra spiritum infelix traho?  
Ad quae reservor tempora? Hoc ipsum, pius  
Quod esse videor, foedere ex illo perit.
- 85 Iam nil meis prodesse nec tristes queam  
Levare casus. Funditus cuncta obruet,  
Ut me superstes nullus excepto pia  
De gente maneat. Me quid exceptum loquor?  
Eadem subibo fata; post alios cadam:
- 90 Hoc gravius aliis, clade quod tantum hi sua,  
Ego omnium unus concidam. Hoc solum nece  
Servare posset qualibet gravius nefas,  
Si patria Baalis sacra posthabeam focis.  
Huc me labinus saepe nequidquam prece
- 95 Pretioque trahere nixus. Elusi preces;  
Oblata sprevi dona. Nunc coget palam  
Vimque admovebit. *Iah.* O mihi luce hac magis  
Dilectę coniux, pectore invicto pati  
Quidvis prius consuesce, quam regi obaequens
- 100 In patria pecces iura: seu mortem inferat,  
Obeunda mors est; seu fugam intentet, fuge.  
Ad usque pelagi extrema. Tecum adeo comes  
Aut moriar, aut extorris hinc quovis ferar.  
*Hab.* O casta thalami socia! Macte animo: decet
- 105 Sic ire fata contra et intrepidum malis  
Firmare pectus. Mitte quam pro me geris  
Sollicita curam. Nostra, quemcumque exitum  
Fortuna dederit, stabilis et nullo fides  
Lapsura casu rumpet obstantes minas.

- 10 **Facilis mei iactura; nec tanti est se**  
**Patriae ruinas inter et stragem inclytae**  
**Reptare gentis. Iah.** Sic decet fortes loqui.  
**Hab.** Sic facere. **Iah.** Nunc te coniugem agnosco meum.  
**Hab.** Quid vis cruentus statuatur, excipiam metu  
 15 **Vacuus. Iah.** Breve est certamen: aeternum decus  
**Coelo repostum. Hab.** Sive per latera exigit  
**Ferrum tyrannus, sive per partes rapi**  
**Membra aut cremari iubeat, aequo animo feram.**  
**Iah.** Haec quamquam habere sic decet, prona est  
 20 **In melius et secunda nescio quid spei** [tamen  
**Mens agitat. Hab.** Utinam fallat hic qui animum timor  
**Sperare populi funus extremum iubet.**  
**Iah.** Quod quisque metuit, posse vix tolli putat.  
**Hab.** Imo hoc futurum, quod cupit, nimium putat.  
 25 **Qua spe salutem praecipis? Iah.** Quam tum Israel  
**Habuit, per undas calle cum sicco pedes**  
**Traiecit, aut cum squallidas Arabum plagas**  
**Permensus ista serus in regna appulit.**  
**Hab.** An tum pepercit? pars quota incolumis fuit?  
 30 **Iah.** Nec penitus irae indulsit; et quantum sat est  
**Demum reliquit. Premere quos odit solet**  
**Penitus, suisque parcere. Hab.** Ignoscat precor,  
**Scelerique tandem faciat et poenis modum.**

*Iahel sola.*

- Faciet. Superbo rege defunctos brevi**  
 35 **Ut sera sic non dubia respiciet salus.**

---

V. 134. Iahel felicem belli exitum sperat seseque ad omnia offert.

- Pius ille, vel dum saevit et memores sui  
Exercet iras. Culpa sanctorum graves  
Dedit aliqua poenas, nulla perpetuas dedit.  
Sic densa postquam nubila effuso diu  
140 Arcturus imbre solvit aut ponto iubar  
Mersura Pleias, foederis vindex polum  
Serenat arcus. Sic ubi hibernis furens  
Incubuit undis Auster et vastos tulit  
Ad astra fluctus, sideris gemini face  
145 Compressa ponunt maria. Sic gelidas tepor  
Vernus pruinas claudit. Hac vitae Deus  
Arbitria lege sancit. In partem nihil  
Utramque stabile est. Abiit. Haud equidem tibi  
Porro indicavi caetera. In dubio est fides,  
150 Quo fata vergant. Magna molitur Deus.  
Vel quanta nobis ore non falso canit  
Monstrante coelo Debora! Quae per nos brevi  
Praestanda memorat! Maius est victo tamen  
Sisara. Quid hoste maius est victo? Piget  
155 Quod illa in aures tacita commisit loqui,  
Quod quærere ultra vetuit. At si quid mea  
Habes in arte praesidi, haec quisquis regis  
Ventura Superum, te duce en casus adest  
Parata in omnes famula. Quem nostris fore  
160 Haec inter armis exitum ac votis putem?  
Commissa dudum praelia et toto reor  
Fervere campo: gestit eventum impotens  
Praevertere animus. Quis per aethereas modo  
Violentus auras turbo correptam vehat?  
165 Aut quis citatis praepetem pennis rapi

In media dederit castra? Pars utinam feror  
 Ut esse decoris aliqua, sic Martis forem!

*Chorus.*

- Contra Superos impia quisquis  
 Audax animis bella capessit,  
 170 Tandem esse Deum sentit et acri  
 Congesta luit crimina poena.  
 Rupit tumidi claustra profundi  
 Rapidasque solo miscuit undas  
 Iussa rebelles late effuso  
 175 Vastare freto caerula Tethys.  
 Tunc sepositi foedera mundi  
 Confusa ruunt. Altior hausit  
 Montana rapax culmina pontus  
 Summoque ferit sidera fluctu.  
 180 Subiecta graves silva carinas  
 Lentis tenuit pressa flagellis.  
 Stringit rigidas palmula quercus  
 Rostrisque secant nubila puppes.  
 Quid cum aetheria mole sub auras  
 185 Educta Babel stetit astrifero

---

V. 168. sq. Chorus Deo rebelles tandem poenas dare edocet, idemque Chananaeis eventurum praedicit. Versus anapaestici:  $\bar{v}\bar{v} \text{ / } \bar{v}\bar{v} \text{ — } \bar{v}\bar{v} \text{ — } \text{—}$ . Cf. Senec. Oed. 980—997. Herc. fur. 1063—1081.

V. 175. Tethys, v. Act. I, 129.

- Propiora polo culmina tollens?  
Male concordi foedere iunctos  
Mista artifices lingua repressit.  
Hinc fulminea face crebroque  
190 Disiecta ruit flamine turris.  
Quid Niliaci castra tyranni  
Rubro memorem subversa freto?  
Parumne dedit specimen fortis  
Lux illa Dei? quantove premat  
195 Tumidos hominum robore fastus?  
Heu quot populi cladibus illinc  
Extorta fuga est! Quot monstra tulit  
Gens Isiaco sacra iuvenco,  
Mox ubi densa nube profusus  
200 Leviora culex bella peregit,  
Aut ubi ranas laetisque graves  
Extulit arvis virga locustas!  
Cum nec medio nox spissa die,  
Nec sanguinea tabe fluentes  
205 Et mortiferi piscibus amnes,  
Nec quae tenues fusus in auras  
Horrenda cinis vulnera sparsit,  
Rigidum possent flectere pectus:  
Tunc laxatus graviora furor  
210 Impulit arma.  
Dira Pharias strage per aedes  
Bacchata trucis manus Aligeri,  
Quae prima patres fecerat aetas,  
Stricto hanc penitus messuit ense.

---

V. 198. Isiaco iuvenco h. e. Isidi sacra Aegypti

- 215 His tu, Pharao, perfide poenis .  
Saperes tandem contraque Deum  
Tendere iniquo Marte timeres!  
Furit ille, furit; rapidisque minax  
Fugitiva rotis terga fatigat.
- 220 Sed dum insolito tramite praeceps  
Divisa ruit per freta dumque  
Pelago fruitur non sibi aperto,  
Rubris periit mersus in undis.  
His te simili, Chananaea furens,
- 225 Contracta manent praemia noxa.  
Licet obliqua cuspidе adunci  
Volitent currus, nec terra tuos  
Equitum capiat peditumque globos,  
Licet Abramidum sacra propago
- 230 Iam bis denos serviat annos;  
Intacta licet gaza innumeras  
Abscondat opes; sub signa licet  
Tua conductus militet orbis:  
Tandem ultricis violenta feres
- 235 Pondera dextrae.  
Lux una mali prodiga tantas  
Evertet opes regnaque multis  
Fundata brevi subruet annis.  
Nondum hibernis imbris auctus
- 240 Nivibusque alto colle solutis,  
Aggere parvo clauditur amnis.  
Sed collectis tumefactus aquis  
Obiecta ruit claustra, superque  
Fuso campos gurgite mergit.

245 Sic sic scelerum compressa diu  
Poena nocentes acrior urget.

---

### Actus quintus.

*Nuncius. Iahel.*

*Nunc.* Maiora votis affero. Oppressus Sisar:  
Castris potitur noster, et toto fugax  
Campo vagatur hostis. Insequitur furens  
Foedaque victor strage desaevit Barac.

5 Pro se ille vindex generis Hebraei adfuit,  
Egitque pavidos fulmine horribico minax.

*Iah.* Quis ede Sisaram casus in praeceps dedit?

*Nunc.* Ut utrinque castris gemina collatis stetit  
Acies et omnem milite implevit locum,

10 Falcata primum plaustra Chananaeus locat  
In fronte Sisara; gravior in media pedes  
Instructus acie; terga veteranus premit.  
Hinc bina et inde cornua equitatus tenet.  
At noster illinc rarius laxis agit

15 Ordinibus agmen, per quod effusa impetu  
Innocua ruerent plaustra; firmatur levi  
Latus equite utrumque: dextra Nephtalius Barac,  
Media coercet Debora. Sic toto ruit

---

V. 1—57. Nuncius Iaheli narrat superatos esse a  
Baraco Chananaeos, fugatumque Sisaram.

- Campo iuventus; undique arrectis seges  
 20 Horrescit hastis aeraque adverso micant  
 Percussa sole: mixtus exoritur fragor.  
 Ceu nube densa gurgite ex alto strepunt  
 Raucae volucres. Inde ubi pugnae dedit  
 Inflata signum buccina, hostilem Sisar  
 25 Aerata frontem plaustra praecipitans quatit.  
 Fervet citatus axis et geminum metens  
 Utrinque falce carpit obliqua latus  
 Aperitque vastum limitem. Huc illuc fuga  
 Praeceptis Hebraeus ruere, turbatis eques  
 30 Instare Sisarae. Iamque nudatus pedes;  
 Iam terga dederat ala: cum tristes manus  
 Ad astra tollens Debora, gentilem Deum  
 Inclamat et, quo fugitis imbelles? ait,  
 Qua spe latebras petitis? Obversi acrius  
 35 Martem lacessunt. Ipsa per medios volans  
 Furibunda cuneos urget, hortatur, salit  
 Audax virago: moxque praeferri imperat  
 Fatale gentis ferculum, raucæ tubas  
 Perstrepere cantu. Constitit visa procul  
 40 Chananaeus Arca, seque lymphato induit  
 In amica cursu tela. Pars verso suos  
 Mucrone feriens caede cognata furit.  
 Hic missa ab hoste spicula expirans trahit  
 Iuguloque socio condit. Hic ferrum exigens  
 45 Alterius ense fixus a tergo ruit.  
 Super haec fragore piceus horrendo tonat  
 Ruptisque crebro facibus ardescit polus.  
 Quas densa grando sequitur, haud qualis solo



- Illisa vulgo crepitat, excussos putes  
 50 Volitare silices, funda quos torto rotat  
 Ibera fune. Strage quadrupedes iacent  
 Equitesque eadem. Tot simul domitos malis  
 Nephtalius urget ductor et late effera  
 Bacchatur ardens caede. Dat terga ilicet  
 55 Sisara, levique fervidis saltu rotis  
 Excutitur. Ego vix nuncium hunc vobis ferens  
 Per strata celerem corpora explicui gradum.

*Iahel.*

- At at. Timoris magna pars nostri excidit.  
 Confecta demum bella, devictum ferunt  
 60 Dare terga Sisaram. Vicimus: tandem Deum  
 Chananaeus esse didicit. Haud cuncta Israel  
 Mentitur. Agedum utrinque divulgum mare,  
 Alimenta coelo sparsa, fatalis neget  
 Prodigia virgae. Nunc suos iactet deos.  
 65 Habet. Tonantis ira quid possit, sacri  
 Quid cura populi, sensit. At nondum reor  
 Perfunctus illis gravius aerumnis luet.  
 Nondum omnis abiit poena: deest aliquid malis,  
 Quod esse nostrum fata testantur decus:  
 70 Nisi falsa memorat Debora. Sed pars hactenus  
 Probata veri; victus est bello Sisar:  
 Addenda porro reliqua. Praesagit mihi

---

V. 51. Ibera. Hispani antiqui funda insignes.

V. 58. sq. Iahel somnium suum exponit, in quo sibi  
 visa erat Sisaram ad se fugientem obtruncare.

- Nescio quid animus grande: nec quid sit scio;  
 Nisi quod peractis maius esse aliquid scio.
- 75 Vidi egomet atra nocte, cum lentus graves  
 Pressisset oculos somnus, attonitum ducem  
 Trepidumque ad istos fugere semermem lares,  
 Opemque frustra petere: quem stricto aggredi  
 Mihi visa ferro; moxque correptum caput
- 80 Hac abscidisse dextera. Hunc credam exitum  
 Servasse Superos, perque tot signa eloqui?  
 An ille qua non pudeat oppetiit manu?  
 An victus acie fugit? At fugiat. Cedo.  
 Quid tum? Necare hunc poteris? huic dextram in-
- 35 Suspensus haeret animus, et gestit tamen [feras?  
 Et facinus ingens pectore incenso capit.  
 Perii: quis iste concito huc cursu volat?  
 Sisarasne? Is ipse est: tecta properato petam.

*Sisaras. Iahel.*

- Sis.* Men' sequitur aliquis? Occidi: hic quisnam ve-
- 90 Nemo est. Quis aures hinc meas pepulit sonus? [nit?  
 An potius illinc? Quo ferar? quamam accubem  
 In parte fessus? Tutane haec sperem mihi  
 Perfugia? Certe hic foedere obstrictus manet  
 Cinaeus Haber. Fracta tantisper iuvat
- 35 Levare membra. Numquis hinc prodit foras?  
 Quis aede in ista est? *Iah.* Quis meas pulsat fores?  
 Hem! tune Princeps? *Sis.* Aegra praecipiti labant

- Defessa cursu genua. Sed si quid domi est  
Laticis, propina. Torret exhausto sitis
- 100 Humore pectus, ora nec voci patent:  
Mihi lympa nectar fuerit: hanc per te dari  
Animam fatebor. *Iah.* Tecta vix tantum licet  
Angusta capiant hospitem, hic lassus tamen  
Paulum acquiesce. *Sis.* Grande fors pretium mo-
- 105 Hoc insidebo limen, et partes feram [rae est.  
Oculos in omnes, ne quis inopinum premat.  
Tu perge. *Iah.* Propero. *Sis.* Quidnam opus facto  
Tectisne maneam? Forsan insidias struat: [rear?  
Introque Hebraeos revocet. Excurram via
- 110 Quod restat? Aegre languidos gressus traho  
Belli viaeque fessus. Insolitus labor  
Et Cereris urget avida ieiunum fames.  
*Iah.* Sinum recentis interim hunc lactis cape,  
Agreste munus. *Sis.* Suavior nullus sitim
- 115 Restinxit unquam potus. Utcumque aureis  
Odora pateris vina vel gemmis puer  
Blandus ministrat, fructus in luxu est minor.  
Sed si quis inter pascua aut stabulis equus,  
Insterne. *Iah.* Quo tam subitus? I nostris age
- 120 Succede tectis. *Sis.* Victor huc hostis brevi  
Aderit. *Iah.* Pavere absiste: praestabo tibi  
Quidquid pericli est. Nullus invita lares  
Nostros adibit; ne quis incauta, vigil  
His excubabo foribus. *Sis.* Evincis. Sequor.
- 125 Quid hocce? gressus haeret: incessu labat  
Pes dubius: omen vereor. *Iah.* Insuetum gravant  
Decursa pedibus spatia. Tantillum afferet

Vires quietis. Sedulo interea fores  
 Servate famuli. *Sis.* Muneris tute id cape  
 130 Sisaramque si quis quaerat, hac passis modo  
 Fugisse manibus finge. *Iah.* Securum dabo.

*Iahel. Chorus.*

*Iah.* Si quaeris anime facere quid rerum addecet,  
 Obsequere Superis! Ecquid in medios feram  
 Dedisse laqueos cernis? En tantis datus,  
 135 Tantis petitus advenit dies.  
 Patiere segnem? Non tuam patriae dabis  
 Superisque dextram? Fatane incassum excident?  
 Mendax feretur Numen? Aude aliquid Deo  
 Auctore dignum, nulla quod sileat dies;  
 140 Sexumque supera. Quid? nece infanda hospitis  
 Sacrata violes iura? rescindas prior  
 Cum rege pactum foedus? Ah! facinus preme.  
 Ergo ille abibit vivus? hanc manibus sinam  
 Effugere praedam? gentis hic nostrae lues  
 145 Et hostium ingens columnen et belli caput  
 Impune nostros dederit in casses pedem?  
 Sed ultum abunde Numen: est poenae satis  
 Fugisse Sisaram: fractus, afflictus, pavens  
 Supplexque nostris credidit tectis caput.  
 150 Hic, cuius armis inclytum cessit genus  
 Quaque adita tribubus terra bis senis patet  
 Cis fluvium et ultra, Marte pro Superi! iacet

---

V. 132. sq. *Iahel* *Sisaram* occidere statuit.

- Percussus uno. Parta iam patriae ultio est:  
Concede vitam. Cur malis prohibes frui?
- 155 Adimisque morte, mille cur mortes velit?  
Sed bella vereor. Regeret acceptam illico  
Cladem et furori frena laxabit dolor  
Pudorque stimulos addet: ut rigidos aper  
Traiectus armos frendet et pavidum truci
- 160 Per tela praeceps dente venantem petit.  
Accingere animo: forsán hoc magno velis  
Olim redemptum. Quid quod hoc ipsum sat est,  
Unde ille poenam expendat et ferrum imbuat,  
Quod fecit et quod voluit? An, si fors daret
- 165 Illi, occidissem? nusquam ego infelix forem,  
Nusquam Israelis nomen: huic, quoniam licet,  
Non paria referam? non meos, non me impetu  
Ulciscar uno? Caetera ut cessent, age,  
Linques inultum Numen? Ille, ille imperat,
- 170 Hoc qui futurum cecinit. An non hoc rear  
Cecinisse? Quid nunc maius extincto potes  
Astruere Sisara? Funus extremum impius  
Per me hostis habeat: saeva praerepto cadent  
Duce bella. Eatur. Fata decretum est sequi.
- 175 Quanam exequemur? Quod genus leti placet?  
Virusne dapibus misceam? an laqueo premam?  
Invade facinus sola. Femineos Sisar  
Iterum triumphos decoret. Inveni viam.  
Proviso rerum quid agat et teli genus
- 180 Scrutabor. omne. *Chor.* Video quo vergat furor.  
Mactare Sisaram statuit. Atque utinam Barac  
Fortisve adesset Debora! Tam laeta edere

Indicia gestit animus. O quantum ferat  
 Vox illa pretii! Sed gradu attonito redit;  
 185 Ceu, cum furentem pectore excepit deum,  
 Insana rapitur Maenas. Hic quorsum tudes  
 Clavusque? quid molitur?

*Iahel.*

## Excussi omnia:

Nihil repertum est, praestet hic teli vicem  
 Capitique adactus, qua necis praesens via est  
 190 Et mollis aditus, tempus affigat solo  
 Utrumque: captu facilis atque arcto iacet  
 Somno sepultus. Aperit insidiis viam  
 Fortuna. Iamiam invade. Proflantem audio  
 Toto soporem pectore. Extremum miser  
 195 Cum morte somnum iungat. Expavi, horruui.  
 Quo feror? Adire timeo: cor pavidum labat.  
 Rursum ardet ira: fortis incoeptum manus  
 Aggredere. Rapido huc agmen accelerat gradu.  
 Praeverte facinus: decoris hunc titulum rapi  
 200 Patiere? Belli sola quod superest cape.  
 Nunc morere et umbras cumula. In exitium pari  
 Leto feratur, quisquis in Superos movet  
 Nefandus arma. Tempora hac fixus manu  
 Humum momordit ore sanguineo Sisar:  
 205 Domus cruore sparsa scelerato madet

---

V. 188. sq. Iahel Sisaram clavo per tempora ad-  
 acto obtruncat.

Largoque corpus flumine exanimum natat.  
 Hac ille specie iaceat, ut leti modum  
 Subiiciat oculis Debora. Quin vestem aggere.  
 Fessum accubare dicam et illusos agam.

*Barac. Iahel.*

- 210 *Bar.* Quis nunc locus? quae latebra fugitivum tegit  
 Sisaram? Quis illum nemore secreto avius  
 Eripuit oculis callis? An frustra sequor?  
 Effare mulier. *Iah.* Lassus et somno gravis  
 Domi est relictus. Commodum occurri tibi,  
 215 Dum castra peterem. Fusus hic molli toro  
 Utramque in aurem dormit. *Bar.* Huic cesso manus  
 Iniicere. *Iah.* Propius gradere. Sopitum vides?  
*Bar.* O coelum et orbis spatia! quod monstrum in-  
 Clavo foratus tempora exsanguis Sisar [tuor?  
 220 Iacet cruore sparsus. O felix Iahel  
 Haberque felix! coniuge hic: coniux Deo  
 Tantum imperante facinus. Est certe Deus.  
 Nunc domitus hostis: nunc ferox cecidit Iabin  
 Cadente Sisara. Solus e tanta fuit  
 225 Metuendus acie: solus ut credam facit  
 Vicisse me peremptus. Haud, memini, semel  
 Fata haec eanebat Debora; feminea ducem  
 Dextra opprimendum. Macte longe animo viros  
 Praegressa mulier! *Iah.* Mene ego ut tali rear

---

V. 210. sq. Barac quem insequitur Sisaram a Iahelo obtruncatum reperit.

- 30 Honore dignam? Tantulum enixa est Deo  
 Adigente dextra. Solus hunc titulum ferat;  
 Per hunc subactus hostis: hoc potui nihil  
 Absente: sine me potuit. *Bar.* Exanimus caput  
 Ferro amputetur: parta muliebri manu  
 35 Praeferre celebri fercula haec pompae iuvat.

*Debora. Iahel.*

- Deb.* Quem saepe dubii Martis eventum Deo  
 Correpta cecini, peperit haec populo dies.  
 Sisaras tenetur. Pandite has laeti fores,  
 Prodite, iuvenes! Hanc date amplectar ducem  
 40 Nostrum et parentem. Lilia aspergam date  
 Violasque plenis manibus; accumulem rosis  
 Illustre sexus specimen. O nostrae artifex  
 Salutis! Habeo quod mihi Superum sator,  
 Tibi ego futurum prodidi. O! quam te Iahel  
 45 Memorem? Triumphos qua tuos voce exequar  
 Felix propago? *Iah.* Cuncta deberi tibi  
 Accepta fateor. Sola dispersas tribus  
 Ad bella revocas. Marte Chananaeas quatis  
 Acies secundo. Quid quod in partes trahis  
 50 Sublime coelum? Classico excitus tuo  
 Coniurat aether. Prima tu Divum sagax  
 Arcana retegis. Voce cunctantem cies,  
 Animosque subicis. Iussa nil praeter meum est

---

V. 236. sq. Debora et Iahel laetantur occiso Sisara  
 Deoque laudes persolvunt.



Implesse; facti gloria auctorem manet.

- 255 *Deb.* Quo rapior? ubi sum? Percitum sacro furit  
Ardore pectus. Viscera infusum altius  
Concussa spirant Numen. Impatiens Dei  
Agor. Hinc profanus si quis est, cedat procul.

*Canticum Deborahae.*

- Vos qui sponte caput duri ad discrimina belli  
260 Obiicitis, magnum laeti celebrate Tonantem.  
Imperio quisquis populos nutuque coerces,  
Audiat haec memorique animo mea dicta reponat.  
Isacidum decus et Divum cantare potentem  
Fert animus. Tu summe Parens cum celsa Seiris  
265 Culmina descreres opulenta feracis Idumes  
Arva petens, tremuit tellus concussa gravesque  
Effudere imbrem nimbi liquefactaque circum  
Decurrere iuga in praeceps, fluxitque soluto  
Colle Sina. Ex quo se soboles Anathaea Iahelque

---

V. 259. spq. Canticum Deborahae. Ex Iud. cap. 5.  
Hexametri.

V. 264. Seir, mons Idumaeae, quem incolebat Esau.  
Seir idem quod Esau (Gen. 25, 25.) hirsutus signifi-  
cat. Ios. Archaeol. 1, 19: 'Πεχώρησεν εἰς Σάειραν. ἐνταῦθα  
γὰρ ἐποιεῖτο τὴν διαίταν προσαγορεύσας τὸ χωρίον ἀπὸ τῆς  
αὐτοῦ τριχώσεως δασείας.

V. 269. Soboles Anathaea h. e. Samgar, filius  
Anathi; cf. Iud. 3, 31. I. e. inde a morte Aodi, quem  
secutus est Samgar, ad nostra usque tempora terra erat  
omnis infesta. Tesqua sunt loca deserta et inculta.

- 70 Extulit, haud quisquam vestigia certa tetendit  
 Consuetum per iter, lateque silentibus arvis  
 Per calles tentata via est et inhospita tesqua.  
 Hinc compressa virum virtus animusque resedit  
 Isacidum, excita est donec Lapidothis. Ab illo
- 75 Omnipotens nova bella ciet Martemque lacessit,  
 Oppida subvertens late portasque refringens.  
 At prius ecquis erat de tot qui millibus hastam  
 Spargeret aut clypeum adversos praeferreret in hostes?  
 Macti animo Hebraei proceres! Vos pectore toto
- 80 Complector. Vos, qui sponte haec discrimina adistis,  
 Vos celebrate Deum. Qui terga nitentis aselli  
 Scanditis et leges populis describitis aequas,  
 Quosque iuvant partae peregrina per oppida merces,  
 Nec tectis residere licet: laudate Tonantem.
- 85 Hic ubi confracti currus vastaque perempti  
 Caede iacent hostes, Domini sincera canatur  
 Iustitia inque suam facilis clementia gentem.  
 Per quam iterum leges redivivaque iura frequentes  
 Ceu quondam ad portas videt imperioque potitur.
- 90 Surge agedum, Debora, et dulci modulare trium-  
 Carmine. Tuque o Nephtalia de stirpe Barace [phos  
 Surge agedum; captiva trahens tecum agmina longo  
 Ordine. Reliquias populi regnator Olympi

---

V. 274. Lapidothis, v. Act. I, 117.

V. 277. Indicari videtur Iud. 5, 8. omnes Iudaeos  
 a Iabino rege armis fuisse spoliatos.

V. 289. Ad portas i. e. civitatum, ubi ius dice-  
 batur.

- Eruit et saevos bellando contudit hostes.  
 295 Dirus Ephrataeos Amalec Ieminaeque sensit  
 Arma: Machiraei robur iunxere potentes.  
 Quique Zabulonis fraterna ab stirpe creati,  
 Issacharisque genus, Deborah Baracumque secuti.  
 At reliquae cessere tribus. Divisa Rubenus  
 300 Arva colens quidnam inter oves caulisque resedit  
 Securus? Placidi interea trans alta quievit  
 Flumina Iordanis Galaad. Dan navibus haesit  
 Affixus. Portique aut litore tutus aperto  
 Stabat Aser. Soli patria pro gente Zabulon,  
 305 Nephtalidaeque acies in aperta pericula Martis  
 Obiecere animas, tereti qua culmine in auras  
 Arduus assurgit Tabor. Ubi castra profecti  
 Contulerant Chanaan duces, Tanachique per agros  
 Fusa Mageddonisque humentia culta tenebant,  
 310 Parcere non ulli dociles pretiumve pacisci.  
 Hos contra micuere polo delapsa sub auras  
 Fulgura, dispositaeque sua statione coruscis

---

V. 295. Ephrataeos sc. Iosua potissimum ac primum, deinde Aodum e stirpe Beniamini. Cf. Exod. 17, 13. Iud. 3, 15. 27.

V. 296. Machiraei h. e. tribus Manassis. Machir enim filius Manassis primogenitus.

V. 302. Galaad terram inhabitabant tribus duae, Ruben sc. et Gad.

V. 308. Tanach oppidum in tribu Manassis cis Iordanem.

V. 309. Mageddon planities, quam perfluit Cison.

- Ignibus in Sisaram venere ad praelia stellae.  
 Multa Cison volvit tumidis correpta sub undis  
 15 Corpora seminecesque viros, largoque cruore  
 Tinctus iit. Sed nos rapidum traiecimus amnem  
 Innocui. Fugientis equi prolapsa resedit  
 Ungula et excussi terram petiere magistri.  
 Dira Meroz terra! (Aligerum sic incipit unus)  
 20 Dira Meroz! Tene auxilio, cum staret in armis,  
 Non venisse Dei populo, nec castra secutam  
 Fortia delectumque locis ex omnibus agmen?  
 O felix una ante alias fortissima coniux  
 Haberis generosa Iahel! Tu fonte petenti  
 25 Exhaustos latices rorantia lacte dedisti  
 Pocula. Tu dextra tuditem clavumque sinistra  
 Arripis, et valido tempus cum robore utrumque  
 Traiicis. Ille solo afflictus largaque tepescens  
 Caede iacet, densaeque oculos clausere tenebrae.  
 30 Interea miseranda parens ululatibus aedes  
 Complebat, natique moram incusabat et, ille  
 Quonam abiit? dixit; cur matris gaudia differt?  
 Quadriiugo cur non patrias sublimis ad arces  
 Invehitur curru? Luctum excepere parentis  
 35 Uxorū pia turba. Harum sapientior una,  
 Pone metum dixit. Spoliis nunc forte potitus  
 Dividit hostilem praedam. Pulcerrima sorti  
 Eximitur virgo. Vario saturata colore  
 Texta legit teretique aptanda monilia collo.

- 340 Sic pereat, qui tete odiis exercet iniquis,  
Omnipotens Genitor. Sic qui te diligit, ortu  
Qualis in Eoo rutilat Phoebeia lampas,  
Splendeat atque aevo aeternum meliore fruatur.  
*Bar.* Adeste comites! sacra reddantur poli  
345 Votiva Domino. Rapite captivos greges.  
Victorque pompam miles ante aras ferat.

*Chorus.*

- Canite o iuvenum turba triumphos,  
Canite invicti bella Tonantis,  
Cingat viridis tempora laurus,  
350 Palmaque dextras victrix decoret.  
Tumidi rabies saeva tyranni  
Fracta est pariter, fessaque longo  
Hebraea iugo colla repente  
Lux una gravi pondere solvit.  
355 Valido fusas Marte cohortes  
Vidit ab alto vertice Tabor,  
Vastaque trahens caede cruorem  
Atro tumuit gurgite Cison.  
Dux illa ducum nobilis ausa est  
360 Admista viris arma virago  
Non feminea tractare manu  
Trepidusque fugam vertit in hostes.  
Te quoque canimus, decus Isacidum

---

V. 347. Chorus canit partam de Sisara victoriam.  
Versus anapaestici; v. Act. IV, 168.

- Et Nephtaliae gloria stirpis,  
60 Sisarae domitor, cuius Hebraeus  
Ductu allophylum castra cecidit.  
At te decoris pars magna, Iahel,  
Laudisque manet. Reddita per te  
Pax certa tuis. Duce sublato  
35 Tandem Abramidum pestis adempta est.  
Agedum patrio sacra Tonanti  
Cultu memores reddite, et aras  
Onerent nivei terga iuveni,  
Gratoque Arabum ture calescant.
-



***CAROLI MALAPERTII***

**MONTENSIS BELGAE E SOCIETATE JESU**

**S E D E C I A S**

**TRAGOEDIA.**

---





## Argumentum.

---

Nabuchodonosor cum Joachinum regno movisset, Sedeciam patrum Ierosolymis regem constituit: qui fisus deinde Aegyptiorum amicitia Babylonico foederi renuntiavit, contra quam Ieremias coram et Ezechiel Babylone captivus divinitus admonerent: nam partim impiorum procerum consiliis in transversum actus, partim (ut refert Iosephus) quod duorum Prophetarum vaticinationes in speciem pugnantes esse videbantur, salubria utriusque monita contempsit; ipsumque adeo Ieremiam male mulctatum in foedissimi carceris cloacam coniici vel curavit, vel permisit. Premebantur interea biennium totum arctissima obsidione Ierosolymae a Nabuzardano aliisque ducibus regis Nabuchodonosoris, donec peste fameque dirissima civibus exhaustis Sedecias occulto itinere, praemissis filiis et coniugibus, nocturna fuga urbem deserit, cuius illa ipsa nocte hostes potiti magnam partem, ut in nocturna invasione fit, succenderunt. Victor Nabuzardanus ut primum regem dilapsum sentit, magna celeritate insecutus e fuga retrahit, et Nabuchodonosoro Reblathis agenti vinctum cum filiis sistit. Rex ferus tristissimo spectaculo filios patre inspectante trucidari, mox Sedeciae ipsi oculos effodit et inde Babylonem deportari mandat.

---

**P e r s o n a e.**

*Sedectas.*  
*Nabuzardan.*  
*Ieremias.*  
*Nuntius.*  
*Armiger.*  
*Nabuchodonosor.*  
*Filii Sedectae.*  
*Chorus.*

---

## Actus primus.

*Sedecias. Armiger.*

- Sed.* Imbellis, excors, gentis opprobrium tuae,  
Quousque anhelum proditi ad labem imperi  
Gressum fatigas? siste; iam satis est fugae,  
Ignavus ut sis; aude age superbos retro  
5 Referre vultus; nullus a tergo est metus.  
Require Solymas, dubia qua montis iuga  
Vix pervicaci lumina obtutu notant  
Piceaque fumus nube praetexit diem.  
Sic fruire regno, fruire; sic regem inclytum,  
10 Caeloque teste strenue ignavum decet.  
Pudenda comitum turba, quid letum bene  
Manu merenti densa per Medum agmina  
Male obstitistis? turpis officii piget.  
Par est malevolo, quisquis ad probrum iuvat.

---

V. 1—198. Sedeciam initae fugae sero poenitet  
Versus trimeter iambicus acatalectus.

V. 6. Solymae et Solyma (sing. et plur.) i. q. Hierosolyma (orum) Cic.


- 15 Ruente Solyma non satis credo fuit  
Necis aut sepulcri; sola per nemorum loca  
Vilesque latebras quaerimus fato viam,  
Dignum leaenae pabulum, indigni hostium  
Oppetere dextra patriae et busto tegi.
- 20 Adeone dulce est vivere! miserum mori!  
Moriatur anime, dedecus nulla satis  
Morte eluendum: qua licet, nostro tamen  
Sanguine luatur; qui probri haerentem nequit  
Labem expiare, finiat sensum, ultima
- 25 Ferro secutus. Verte in infandum caput  
Huc arma miles. Quisquis e turba voles  
Patriae ruinas, liberum ulcisci necem,  
Perime nocentem; rara vindicta obtigit  
Tuta in tyrannum. Quisquis e turba voles
- 30 Referre meritis gratiam facilem meis,  
Perime volentem: sive crudelis mihi,  
Sive es benignus, commoda regi manum:  
Mortem rependi praemium aut poenam rogat.  
Adeste cuncti, adeste; quid frustra pii
- 35 Exhorruistis? arma, non gemitus peto.  
Servate lacrymas funeri, aut patriae date  
Per me ruenti! Vah pudor! nemo omnium  
Aut esse iustus ultor aut gratus volet?  
Ite, ite, fata quemque quo ducunt sua:
- 40 Quod quaero, promptum est: sentio qua pectoris  
Imi latebras cor mihi ignavum quatit,  
Illinc revellam lucis exosae moras.  
Me me ille nostris, si potest, poenis satur  
Parte e serena lentus adspiciat poli,

- 15 Qui probrum in omne legit Isacidum genus.  
 Nil fulminandum est, solus e tanto nocens  
 Populo supersum, certius telum hac manu  
 In me vibrabo. *Arm.* Magne rex, quis te dolor  
 Agit impotentem, vitae ut ingratus tuae  
 50 Deum lacessas? *Sed.* Ut lacessitus malum  
 Malus ipse perdat: diro ut aspectu levet  
 Caelum atque terras. *Arm.* Parce vesanis diem  
 Scelerare verbis, teque pietati refer.  
 Haec ipsa luimus scelera; delirant duces,  
 55 Plectimur Hebraei. Nempe si monitis fores  
 Vatum obsecutus, salva nunc staret Sion  
 Starentque Solymae. *Sed.* Quos mihi vates canis?  
 Oracla dubia nostra iam nutant fide  
 Pugnantque secum: vincla, Babylonem occinit.  
 30 Hinc Ieremias; inde Babylonem mihi  
 Unquam videndam captus Ezechiel negat;  
 Uterque vates, sortis auctorem Deum  
 Uterque iactat. *Arm.* Fateor, et dudum haereo  
 Mecum ipse fati dubius interpret tui;  
 65 Oracla sed quae clusa perplexis latent  
 Vocum involucris, ipsa per rerum explicant  
 Eventa sese: dum tamen sors fluctuat  
 Incerta, si dant fata, quaerenda est salus:  
 Nam cur salubris consili tantum piget?  
 70 Furor est apertum ruere in exitium palam.

---

V. 56. Sion summus Solymorum collis, in quo templum et arx regia.

V. 65. Clusa i. q. clausa. Cf. Senec. Troad. 817.

- Sed.* Pudor est inultum fugere. *Arm.* Sed si res ferat,  
Necesse; fortem tempori aptari decet.
- Sed.* Mori fugacem? *Arm.* Fugit hac David, pudet  
Sequi nepotem? *Sed.* Damno fugientem nepos.
- 75 Laudo Saulem mortis invictum metu.  
*Arm.* Parum interest, timore quo fractus cadas.  
Vitam Saul timebat, hoc victus metu est.
- Sed.* Probrum timebat, nemo magnanimus tulit.  
*Arm.* Adversa ferre nemo magnanimus negat.
- 80 Imbellis ille est, sponte qui vitam abiicit  
Lucemque durae sortis impatiens fugit.  
Sceleratus idem, carnifex dirus sui,  
Hoc parricida tetrior, quo tu tibi es  
Proprior parente, fortis esse animi reor
- 85 Durare contra quidquid est durum pati.  
Nec cedere retro, stare qua summus iubet  
Statione ductor laudis hoc verum est decus.
- Sed.* Magnifica verba, macte, cui Mavors calet  
Ventoso in ore, friget ad pugnam manus.
- 90 *Arm.* Hosti probata dextera est. *Sed.* Nobis pedes.  
*Arm.* Ardente Solyma, vertitur vitio fuga?  
Totam malorum Iliada, pestemque et famem  
Memorare cogis memori? at ingrato iuvat  
Memorare vel sic. Qui pedes laudas meos,
- 95 Equos requiris? fallitur quisquis putat  
Solymae relictos; sessor absumptum gerit  
Inusitato aenigmate sonipedem suum.  
Bis Aquilo galeam sparsit hiberna nive,  
Glacieque in una stupuit hastili manum
- 100 Haerere miles, bis sub aestiva cane
- 

- Animam aestuantem duximus: nondum satis  
Belli aut malorum est? fare, quid prohibes dolor?  
Quid anime refugis? fare et invitus tuos  
Luctus retracta. Tantuli e turba sumus
- 05 Magna relictis; querimur Assyriis hebes  
Ferrum tamen fuisse: cum patria iacet  
Sorte invidenda, quisquis hostili manu  
Animam profudit. Pestis et caelum nocens,  
Ignavi fata, fortium robur virum
- 10 Misere abstulistis: Solyia non uno fuit  
Vincenda ab hoste. Quidquid horreri assolet  
Pastus nefandi, dulce ieiunis fuit.  
Ipsa ipsa mater (conscium testor diem,  
Factum est, quod olim posteri factum negent
- 15 Aut execrentur,) dubia quem damnet neci,  
Dum coniugem inter, inter et natum stetit,  
Oblita matrem, Redde quodcumque es mei  
O nate, dixit; vixque tendenti manus  
Aversa iugulum pressit et cultrum impio
- 20 Defixit ictu: volvitur leto puer,  
Manatque tenuis corpore exsanguis cruor:  
Exceptus ille est, ne quid infaustae dapis  
Patri periret. Saepe ab incepto manus  
Scelere resistunt; saepe se infelix parens
- 25 In facinus urget. Perge, perfectum est nefas,  
Infausta genitrix; perge, quod restat pium est,  
Pascere maritum: dixit et ferro secat  
Medium cadaver, viscerum vellit fibras  
Adhuc calentem, moxque frustatim suos
- 30 Errans per artus, per lacertorum moras



- Indocta foedae membra lanienae amputat.  
Et quod malorum maximum in matre arbitror,  
Defossa geminis lumina in specubus rigent  
Negantque lacrymas, torva, sine sensu, furens  
135 Ut Baccha fertur; fervet undanti latex  
lactatque aheni membra; pars lento veru  
Stillat cruenta, subdit invitas parens  
Et hic et illic impio flammis rogo,  
Partem in remoto provida recondit penu,  
140 Et esse tanto in scelere frugalem placet.  
Epulae instruuntur denique: o fatum grave!  
Ultra Thyestem est aliquid, et Graium leves  
Vicinus Hebraei fabulas rerum fide  
Caelo pudenda. Crimine alieno nocens  
145 Ignarus illic lancinat natos pater,  
Nostri volentes: dumque praeclusae viam  
Fauces malique conscium pectus negat,  
Dum stomachus horret pollui infanda dape,  
Pietatis omnem pertinax sensum furor  
150 Evicit, utero mater invito suos  
Foetus regessit, et reluctanti viro  
Scidit epulandos. I modo, et fugam exprobra,  
Victasque Solymas, querere desertos lares  
Vix semivivis; proditum regnum voca,  
155 Alimenta quando pertinax nulla invenit  
Rabies edendi, ni tuos forsitan dares

---

V. 142. Thyestes, Pelopis filius, adulterio cum Aerope uxore fratris sui commisso infamis. Huic Atreus frater filios coctos apposuit.

- Natos coquinae. Sed quid hic vanis diem  
 Terimus querelis? fixa si penitus sedet  
 Mori voluntas, iungere et regno iuvat
- 60 Regem cadenti, facilis ad letum via est.  
 Redeamus illuc unde discessum est male,  
 Reddamur hosti, scilicet magno impius  
 Optarit emptum Medus, ut regem suis  
 Addat trophaeis, dubia quae merito facit
- 35 Hostis superstes. *Sed.* Num Sedecias potest  
 Cuiquam timendus esse? *Arm.* Si vivit, potest.  
 Ludum insolentem ludit et miros habet  
 Fortuna redivit, quosque defecit gradu,  
 Alterna visens rursus in stabili locat.
- 70 *Sed.* Opem sed unde rebus afflictis iubes  
 Sperare miseros? *Arm.* Unde speramus nihil.  
 Nec sic tamen iacemus, ut nullus queat  
 Erigere lapsos; mutuam pactus fidem  
 Socia arma iunxit, Pharia quem tellus colit
- 75 Late tyrannum; flectere huc cursum licet.  
 Parant amicos prospera, repossunt fidem  
 Adversa. *Sed.* Poscunt, fateor; at raro impetrant.  
*Arm.* Tentare liceat. *Sed.* Nempe Medi ut gratiam  
 Pharaon tyranni capite mercetur meo;
- 80 Pacis redemptae victima ut vilis cadam?  
*Arm.* Legunt quieti praesidia, miseri occupant  
 Quodcumque asylum. *Sed.* Cum mori tempus vocat,  
 Precario vixisse post regnum pudet.  
*Arm.* Matura quamvis fata nunc regi forent,
- 85 Non sunt parenti; coniugem, natos pater  
 Orbos relinques? hanc tenent iussi viam

- Carpuntque celeres; fida sed quoties virum  
 Coniux requirit? parva natorum manus  
 Tremente quoties ipsa cum silva tremens  
 190 Vultus reflectit, trepida quem pone audiat  
 Hostem an parentem? propera, ut adventu prior  
 Tueare inermes: sequere, qua multum tui  
 Via antecessit. *Sed.* Solus inflectit meos  
 Amor ille sensus: fateor hac victum trahis.  
 195 Pro misera pietas! cogis infelix patrem  
 Vitae perosum vivere, et fugam exequi  
 Mori obstinatum. Testor immitem Deum.  
 Non trepidus hostem fugio; vos, nati, sequor.

*Chorus I.*

*Filiis Prophetarum.*

- Impune pollicetur  
 200 Sibi impius futurum,  
 Quoties vibrare lentus  
 Trisulca tela differt  
 Hominum deumque rector.  
 Nullus memor nefandi  
 205 Fandique nostra curat;  
 Rapitur peritque iustus,  
 Premitur iacetque virtus;  
 Sceleri bene et scelesto est.

---

V. 199. sqq. Tetrapodia iambica catalectica:  
 $\bar{v} \text{ — } \bar{v} \text{ — } \bar{v} \text{ — } \bar{v}$ . Cf. Senec. Medea v. 849—878,

- Adeste et innocenti  
 210 Laqueum parate mecum:  
 Bona undecumque praeda est.  
 Sic impius: sed aequa  
 Qui lance cuncta librat,  
 Non surdus ultor audit.  
 215 Raro poena fugax scelus  
 Claudio deseruit pede;  
 Compensat gravitas moram.  
 Iustum rebus in anxiis  
 Vindex aetheris arbiter  
 220 Metu et fraudibus asseret.  
 Frustra faucibus imminet  
 Ductis impia factio:  
 Frustra ringitur invidus,  
 Caeco et murmure perstrepat:  
 225 Iras denso ut in agmine  
 Et longos apis asperat  
 Non iam mellea bombos;  
 Aut spinae et tribuli leves  
 Subiecto ut crepitant foco.  
 230 Frustra consilantium  
 Coetus pervigil excubant  
 Et linguas acuunt suas;  
 Serpens ut trifidis micat  
 Uno gutture sibilis.  
 235 Iustus propositi tenax  
 Frētus numine prospero

---

V. 216. Claudio pede, cf. Hor. Od. III, 2, 32.

- Cassos non timet impetus :  
Ut qui rupis in arduo  
Pastor vertice considens  
240 Insanum mare despicit.  
Astu callidus et dolo  
Doli prenditur artifex :  
Haeret implicitus pedem  
Plagis quas male tenderat.  
245 Haec quondam cecinit sacer  
Vates sub Solymae iugis  
Nervis dulce loquacibus,  
Verbis lene sonantibus;  
Subiectasque Sionio  
250 Valles reddere vertici  
Vocali docuit lyra  
Iessaei genus inclytum.  
Haec nuper Ieremias  
Tetro in specu canebat,  
255 Quo principum immerentem  
Retruserant furores;  
Medio e lacu monebat,  
Cum vix tenace limo,  
Cum vix olente coeno  
260 Toto emineret ore:  
Vel sic tamen rebelles  
Regemque principesque

---

V. 245. Cf. Ps. 35. 36. 51. 58. 61. 63. 72 cet.

V. 252. Genus i. q. filius. Cf. Virg. Aen. IV, 12  
IV, 25.

- Toto increpabat ore.  
Nunc aequus ille vindex,  
265 Suam suique vatis  
Ultus vicem, rependit  
Regi parem scelestis  
Ducibusque talionem.  
Fugitant paventque anheli  
270 Rex ipse principesque;  
Fugitant paventque frustra:  
Victor superbus instat,  
Iam iamque terga prendit.  
Dabunt, dabunt scelesti  
275 Captiva colla vinclis,  
Quae vatibus parabant.  
At unus ille retro  
Liber specu remissus  
Bis Solyma capta cernit,  
280 Et barbaros verendus  
Refulget inter hostes.  
Nusquam praesidio Deus  
Fallax destituet suos:  
Orbis concidat et chaos  
285 Rerum dissolvat decus,  
Illaesum caput erigent  
Inter fragmina mundi.
-

**Actus secundus.***Nabuzardan. Nuntius.*

- Nab.* Ut pedibus alas addit et vires timor!  
 Vix antegressos, longa et enectos fame  
 Sequimur Hebraeos, plus tamen cursu valent.  
 Hic dubia rursus semita in plures abit.
- 5 Vos, qua renascens vix bene affulget iubar,  
 Properate; maior turba, qua Pharium est iter,  
 Mediumque Titan pendulus librat diem;  
 Vos ite medii, abstrusa, defossa, invia  
 Lustrate celeres; vile non petitur caput,
- 10 Nec praeda tenuis; unicum monitos volo:  
 Servate regem, regiae et stirpem domus  
 Tenete vinclis, quos Nabuchodonosoro  
 Placet exhiberi; ruite, et in vulgus truces  
 Saevite reliquum. Sistite hic reliqui gradum,
- 15 Captemus auras undique, haud longe reor  
 Abesse Hebraeos. Nae meis si laudibus  
 Accedat unum, currui ut iunctum meo  
 Regem triumphi ferculum eximium traham;  
 Tum me beatum et caelitum excelsissimum!
- 20 Per gemina Phoebi lustra vix fractum Ilium  
 Asiaeque columen dirutum Argivi canunt  
 Aut mentiuntur; nec meae possint tamen

---

V. 1. sqq. Nabuzardan fugientem Sedeciam insequitur et capit.

V. 6. Pharium iter h. e. quod in Aegyptum ducit. Cf. Sis. Act. I, 8.

- Officere laudi: perfidae et nunquam satis  
Solymae iacentes hac iacent stratae manu.
- 25 Puditum est Pelasgae fraudis: ut fortes decet,  
Vicere Medi; quidquid ad regni caput  
Tot ante regum struxit insanus labor,  
Ferro recisum est: turrium immanes premunt  
Suos ruinae; facta per muros via est,
- 30 Quos qui iacentes videat, haud credat tamen  
Potuisse sterni. Qualis evictis furit  
Obicibus amnis, cum iugo montes fluunt  
Nivei soluto, miscet et caeli novas  
Imber ruinas; ille per campos vagus
- 35 Vetitos, per arva fertur et tumidum undique  
Diffundit agmen: talis horrendum intonans  
Miles per hostem caede molitur viam,  
Ferrumque et ignem stringit utrovis ferens  
Exitium. Hebraei morte non una cadunt:
- 40 Hunc flamma latebris pellit, ut stricto induat  
Mucrone pectus; ille dum ferrum timet  
Hostile, patriis eligens flammis mori,  
Mortem, sepulcrum quaerit, et domi invenit.  
Solyma ululatu tota femineo sonant,
- 45 Ipsosque terror paene victores subit:  
Congesta patrum decora, caelatas trabes  
Depascit ardor, reglam flammae ambiunt.  
Nec parcit ignis, parere ut victor velit.  
Non prohibet avidas flamma, non pestis mantis:
- 50 Medios per aestus, inter ardentes globos  
Semiusta miles spolia populator rapit.  
Quique obstinatae taedio victus morae



- Damna<sup>bat</sup> arma nuper, auro nuno gravis  
 Spoliisque onustus gestit, et geminis lubens  
 55 Ignoscit annis: gratius magno bonum est  
 Quodcumque constat, pretia commendat labor.  
 Sed quid moratur miles huc regem mihi  
 Pertrahere vinctum? salva si nostros fugit  
 Haec praeda casses, non satis victas reor  
 60 Mihi esse Solymas: contumax notum est caput,  
 Noti rebelles; rursus indomita parent  
 Cervice bellum: plebis ingenium ferae  
 Vel inde disce, liberis saturi suis  
 Fugiant parentes: quis vagus campis Geta,  
 65 Quis inhospitali Caucasos, aut mediis satus  
 Scythiae pruinis tam ferum potuit nefas?  
 At quem citato video praecipitem gradu?  
 Libet ire contra. Fare; quo res est loco?  
*Nun.* Dux magne salve! salva res, salva omnia.  
 70 *Nab.* Rex ergo captus? *Nun.* Captus. *Nab.* O laetum  
 Vivo, triumpho; sed rei gestae ex fide [diem!  
 Seriem recense. *Nun.* Dum feram hinc illinc vagis  
 Venamur oculis, forte decusso orbita  
 Notata rore est, qua pedum vestigiis  
 75 Iamiam subactam gramen attollit comam;  
 Dum ferimur illuc et datas praedae notas  
 Sequimur anhelis, sensit adventum prior  
 Rex ipse nostrum; sensit et vultum simul,  
 Simul arma flectens. Sistite o socii fugam,  
 80 Tenemur, inquit; non decet tergo viros

- Excipere mortem, pectus adversum date,  
 Ferte arma in hostem; sic miser frustra suos  
 Increpitat: illi densa per nemorum impigre  
 Dumeta reptant, quemque qua subigit timor.
- 95 Ut abesse socios vidit et nudum latus,  
 Infremuit amens: aggerat furias dolor,  
 Furiae dolorem; nec pudor turpes sinit  
 Captare latebras. Ergo non dubius mori,  
 Per tela et agmen pronus adversum ruit;
- 100 Suaque lacesens fata, fulmineum rotat  
 Ensem huc et illuc, quaque pilorum seges  
 Cuspidibus horret densior, cursum incitat.  
 Qualis cruentus inter Armenias leo  
 Deprensus hastas, asper et dirum infremens
- 105 Cervice totas excutit fulva iubas,  
 Strictoque nunc hos dente, nunc illos petit.  
 Nos, quando iussa non sinunt aliud tua,  
 Eximus arte vulnera, aut clypeo cadunt.  
 Miratur ipse indigna tam lentos pati
- 110 Impune ab uno, cominus nullum sibi  
 Conserere dextram; dumque violento imminens  
 Furore in ictum surgit, ingentem impetum  
 Aereiue triplices non ferens clypei moras  
 Dissiluit ensis, haesit ignotum intuens
- 115 Capulum atque inermem dexteram: at turba un-  
 Clamore in unum tota sublato volat [dique  
 Centumque frustra manibus obnixum premit.  
*Nab.* Facere imperata militis primum est decus,  
 Non quidquid ira suaserit, temere obvium
- 120 Truncare ferro: sistere ardentem impetum

- Vel inter arma, iamque libratam manum  
 Revocare ab ictu, cum tuba receptum canit:  
 Per iacta passim spolia, per fusas opes  
 Hostem irretorto lumine fugacem sequi,  
 115 Hoc militare est. Nunc et hoc nostrum reor,  
 Dispicere vestris paria quae meritis queant  
 Praemia reponi: faxy ne fraudi sient  
 Neglecta cuiquam spolia, dum sequitur ducem.  
 Quid vero regis liberi? an tutum tenent?  
 120 *Nun.* Iam puto tenentur: vix enim exiguo patrem  
 Spatio anteibant, ut fugaces prodere  
 Regis ministros mors prope admota impulit.  
*Nab.* Sapienter istud. Emica actutum in pedes  
 Qua te antecedit rumor, et nostro refer  
 125 Haec certa regi; Reblathis quantocyus  
 Victosque Hebraeos meque victorem affore.  
 At at propinquo tremuit armorum sono  
 Concussa tellus: militem agnosco meum.  
 Rex ecce trahitur vinctus.

*Nabuzardan. Sedecias.*

Infandum caput,

- 130 Rebelle, vecors, ergo sperabas meas  
 Evadere manus? Siccine? incensae ruant  
 Tuo igne Solymae, concidat regni status,  
 Regisque scelera populus immeritus luat,  
 Dum tu malorum machinator facinorum

---

V. 125. Reblath (Ribla) oppidum in finibus Palaestinae in septemtriones spectantibus.

- 35 Bustumque patriae, tota quem numquam satis  
 Solyma obruisset, subtrahis leto caput?  
 At si obstinate sederat nunquam iugum  
 Subire nostrum, quin prius dira omnia,  
 Pestemque et ignes et famem et bellum pati  
 40 Et cuncta ferre, ferre quae obsessus potest,  
 Post strata flammis Solyma, post pestem et famem  
 Cui te reservas deinde? quae regna altera  
 Perdenda restant? melius ardentem rogam  
 Patriae subisses funus extremum tuae:  
 45 Rex occidisses. Perditum an tanti fuit  
 Superesse, posthac ut tibi frustra invoces  
 Mortem relictam? vile ludibrium hostium,  
 Vivax miseriis tempus ut quaeras tuis?  
*Sed.* Quaecumque amarus ingeris victor probra,  
 50 Audire merui: fateor, et sero pudet.  
 Parum rebellis, contumax parum fui;  
 Res est inepta, facere perfidiae modum.  
 Post pertinaces hactenus belli moras,  
 Post tot meorum funera hoc unum dolet,  
 55 Vestro quod igne Solyma non nostro iacent.  
 Hac si deinceps stare non poterant manu,  
 Poterant perire: cuncta cumulassem prius  
 Quibus superbis spolia et ardenti super  
 Cumulo irruissem; trahere labentem omnia  
 60 Regem decebat. Nec tamen iactes tuos  
 Tantum triumphos; non tua victos premis  
 Virtute Hebraeos: Solyma consumpsit lues,  
 Tu diruisti: faciei et imbellis potest  
 Iactare flammas. *Nab.* Captus armatum improbo

- 165 *Lacessit ore? Sed. Qui mori lucrum putat,  
Lacessere hostem captus armatum potest.  
Nab. Procace lingua melior, armatus fugis,  
Pugnas inermis? Sed. Arma si reddi iubes,  
Manu refellam quidquid obiectas probri.*
- 170 *Nab. Hoc facere Solymis decuit. Sed. Et factum fuit.  
Nabuz. Cum prae se Hebraeos miles Assyrius canes  
Ageret fugaces. Sed. Persicas inter nurus  
Narrare captam forte cum Solymam voles;  
Adversa vestris tela vix aliquot bene*
- 175 *Tenuisse in urbe militum larvas refer,  
Quos sola macies, luridi et vultus color  
Faceret timendos. Nab. Facile frustrari impetum  
Hostilem ab altis turribus quivis potest,  
Et trahere bellum. Sed. Facile, si ignavi obsident.*
- 180 *Nab. Laudes sceleste pergis argutis meas  
Obterere dictis? faxo ut hic sidat tumor  
Et agere victum doctus assuescas malis,  
Caeca ut reclusus nocte, poedore obsitus,  
Tecum ipse statuas victor, an victus sies.*
- 185 *Sed. Fortuna miserum facere, non timidum potest.  
Exsilia, mortem, mille poenarum modos,  
Quamque his et illis esse peiorem reor  
Minare vitam, carcere et vinclis preme;  
Exstabit animus liber, invictus, suus.*
- 190 *Nab. Sicte esse iubeo liberum, invictum, tuum.*

*Chorus II.**Fittae Ston.*

- Eheu quantis mersit tenebris  
 Solyma iratus superum Rector!  
 Eheu quanto turbine vertit  
 Celsa aetheriae tecta Sionis!
- 95 Quae surgebant aemula caelo,  
 Nunc aequa solo culmina fumant.  
 Dum prona suo frena furori  
 Laxat, avitae nil memor aedis,  
 Sacra profanis culmina miscens,
- 100 Una obvolvitur cuncta ruina.  
 Regibus olim condita priscis  
 Monumenta patrum subruit ultor;  
 Celsis positas montibus arces,  
 Moenia fossis collapsa suis,
- 05 Planum Assyriis constravit iter  
 Nobile regum; regnique duces,  
 Fortia bello pectora, Medo  
 Dare ludibrium pertulit hosti.  
 Ipse ipse animos fregit Iudae.
- 110 Ipse ipse animos surgere Persis  
 Dedit et robur numine dextro;  
 Cum praecipites agitant nostros  
 Moenia circum, dum cuncta metunt  
 Obvia ferro; ceu flamma leves

---

V. Chor. Ex cap. 2. Lament. Ieremiae. Dimeter  
 anapaest. acatalectic:  $\overline{uv} \text{ ' } \overline{uv} \text{ _ } \overline{uv} \text{ ' } \overline{uv} \text{ _ }.$

- 215 Agitata notis haurit aristas.  
Fuit ille, fuit tutela suis:  
Nunc crudelem versus in hostem  
Tela infenso dirigit arcu,  
Nervum adductis cornibus urget.
- 220 Figit medium, mediumque fugit  
Pectus arundo morte relicta:  
Quemque, ut forma et robore praestat,  
Primum ignavo destinat orco.  
Quas continuit pressitque diu,
- 225 Irarum omnes fundit habenas;  
Ignis ut arcto fornice clausus  
Furit effracto fornice victor.  
Non quassa iacent ariete Medo  
Moenia Solymae; murum hostili
- 230 Turresque manu Deus armipotens  
Vertit ab imo: Deus ipse tuos  
Iuvenes leto mersit acerbo et  
Totam opplevit cladibus urbem.  
Quod sibi quondam penetrale sacrum
- 235 Proprio voluit iure dicatum,  
Hosti cessit praeda profano:  
Ut disiectis sepibus hortus,  
Quem foedarum ruit ingluvies  
Vertitque suum. Nil sacra movent
- 240 Otia, festum et sabbata damnat:  
Capita Superis proxima, regem et  
Nihilo Mystam rege minorem,  
Ludum Assyriis dedit opprobriis.  
Vix nota suis ara sacrificis,

- 45 Nunquam externo violata pede,  
Pervia cuique est. Atria ovantum  
Undique plausus sacra volutant,  
Ut cum festo carmine nuper  
Personat aedes: at nunc alios  
50 Impia pangunt agmina cantus.  
Nec praecipiti nos mente Deus  
Dedit exitio; digerit olim  
Haec fata sciens, neu nostra putes  
Temere verti: librata suo  
55 Aere pependit linea, Solymae  
Dum tecta solo funditus aequat,  
Dum celsa cadunt moenia et ipsum  
Quod celsa tegit moenia vallum.  
Defossa suis aerata latet  
30 Porta ruinis; solido vectis  
Fusus aheni, sera non uno  
Obdita ferro, contrita iacent.  
Soliti portis iura sub altis  
Reddere procures nunc illa timent,  
35 Quae dat victrix iura libido.  
Heu ubi sanctae regula legis?  
Ubi fatidicum carmina vatum?  
Populo nullus ventura canit,  
Aut sua vanus somnia narrat.  
70 Rigidis tecti corpora villis  
Iacere senes, tepido crinem  
Cinere sparsi; prohibet nullus  
Hoc de Solymis sumere victor.  
Virgo pudica laniata genas,



- 275 Virgo solutas lacerata comas,  
Patriae sese in pulvere versat.  
Tabida longo lumina fletu  
Acies sensim tenuata fugit;  
Intima torquet viscera luctus,  
280 Felleum amaras iecur in lacrymas  
Abit effusum, terramque rigat,  
Dum tot in unam congesta diem  
Mala ploramus: cum depositi  
Solymae propter compita passim  
285 Pueri dulces linguunt animas,  
Pressoque infans ubere frustra  
Moritur primo in limine vitae.  
At quibus aetas grandior os iam  
Vocemque dedit, Heu ubi panis?  
290 Heu ubi, mater optima, vinum est?  
Miseri clamant; voceque in ipsa  
Defecta calor membra relinquit.  
At si qua pio natum exanimem  
Fovet amplexu, gremio hic matris  
295 Animam reddens colla reclinat.  
Quibus assimilem tua fata Sion?  
Quibus exemplis relevare parem?  
Miseri miserum hoc solamen habent,  
Similis socios memorare mali.  
300 At nemo tuis cladibus usquam  
Aequando tulit. Premeris toto ut  
Obruta ponto, nec opem in tantis  
Quisquam aerumnis ferre laborat.  
Quis ferre tamen (fac velle) queat?

- 05 Somnia vates delira tibi  
 Cecinit blandus, nimiumque favens  
 Scelera obtexit: nemo salubres  
 Gemitus movit, quibus infensum  
 Provida posses flectere Numen.
- 10 Tibi Niliacis affore ab oris  
 Spondebat opem, tibi Chaldaeas  
 Marte secundo pellere turmas;  
 Sed spe miseram lusit inani.  
 Nunc qui Solymae collapsa videt
- 15 Tecta viator, manibus plausum  
 Geminis tollit motansque caput,  
 Illane Solyma est nobilis, inquit,  
 Tot populorum regia nutrix?  
 Illane ocellus mundique decus?
- 20 Inhiant patulis rictibus hostes,  
 Acuunt pressis dentibus iras  
 Stridentque feri, sibila vibrant  
 Anguis ad instar. Celeres, aiunt,  
 Currite socii, rapite incensas
- 25 Avidi Solymas, vertite ab imo.  
 Quantum Isacidum est, Medum agminibus  
 Quantula praeda est? En illa dies  
 Ultima Hebraeis, festa Assyriis  
 Tandem illuxit. Bene habet: votis
- 30 Lucem adspicimus mille petitam  
 Per tam longi taedia belli.  
 Quaecumque Deus tibi fata, Sion,  
 Sanxerat olim, quae praesaga  
 Fuerant vates mentē locuti,

- 335 Nimis heu veris rebus adimplet.  
Nescius ulli parcere saevit  
Durus in omnes, gaudere tuis  
Dedit immitem cladibus hostem,  
Celsumque tua stare ruina.
- 340 Taciti cives patriae e busto  
Timidis caelum questubus implent.  
Et tu miserae nata Sionis  
Funde perennes oculis rivos;  
Non nocte tibi, non luce tibi
- 345 Requiem indulge; madeant geminae  
Usque assiduo pupulae ab imbri.  
Nec te pigeat nocte silenti,  
Vigilum quoties nocturna dabit  
Buccina signum, duro corpus
- 350 Tollere strato serasque Deo  
Dicere laudes: nivis in morem  
Vere solutae Domino coram  
Cor funde pium; tolle pudicas  
Cum voce manus et sparsa viis
- 355 Iuvenum memora corpora totis:  
Pietate Deus tangitur ista.  
Adspice caelo pater Abramidum,  
Aspice quam tot caedibus urbem  
Viduam linquas. Ergone placet,
- 360 Quae membra manu mollia finxit,  
Eadem truncet sua discerpens  
Viscera mater? Penetrale sacrum  
Proprio Mystae sanguine foedant,  
Proprio vates; num forte iubes

35 Cruor ille tuas imbuat aras?

Puerum obscoenae sparsa volucres

Corpora tundunt; inhumata senum

Membra superstant: ferro pariter

Iuvenes trunci et nubilis aetas

70 Stravere vias. Heu saeva dies!

Semperque tua nobilis ira!

Funesta dies! quae communi

Regnum exitio regemque tulit;

Dum tu venia flecti indocilis

75 Sternis similis cuncta furenti.

Ut sacra Deum festa quotannis

Populi circum turba frequentat,

Non secus hostes coiere mei,

Nimium celeres tua iussa sequi.

30 Cinxere meos aggere cives,

Nemo ut vigiles fallere tecto

Tramite posset, nemo furoris

Immune tui servare caput.

Quae tot alebam regia mater

35 Gremio natos laeta superbo,

Orba, infelix, qua voce parens

Deinde vocabor? Barbarus hostis

Aetherque nocens et dira fames

Vario hauserunt funere ad unum

30 Cara relictæ pignora matris.

**Actus tertius.***Nabuchodonosor. Ieremias.*

- Nab.* Quem, Phoebe, nostro cernis imperio parem,  
 Quacumque Nereus incolit terras sinit,  
 Seu retegis orbem melior et primis novus  
 Occurris Indis, spatia seu mensus poli  
 5 Currus Ibero tingis emeritos freto?  
 Iam ter rebelles ferre ter domiti sciunt  
 Victorem Hebraei; posuit Aegyptus minas  
 Sociasque vidit ruere et aequari solo  
 Quieta Solymas. Genere mortali altior,  
 10 Par gradior astris; omnis aut unum adspicit  
 Dominum subactus orbis, aut unum timet  
 Lacessere hostem; foedus Assyrium ultimi  
 Hominum repossunt lege qua victi solent.  
 Caelum est relictum: dignus est nostris labor,  
 15 Dignus trophaeis. Iuppiter posthac mihi  
 Certare solus ausit, et nisi abdītus  
 Caelo lateret, si pedem liceat pedi  
 Conferre, vincam. Memet habuisset ducem  
 Terrigena miles, qui gravi Pindum iugo  
 20 Imposuit Ossae, tertium ad superos gradum  
 Struxissem Olympo. Quid deum turbam moror?  
 Si sunt tamen di: Iuppiter caelo imperet  
 Ventosque sensus domitet expertes, meum est  
 Regnare vivis: imbribus caelum obtegit,

---

V. 1. sqq. Nabuchodonosor victoria elatus adversus Deum insolescit, Sedeciae insultat et dira quaeque minatur.

- 25 Tegam ipse telis; gravior at nubes cadet  
Quam concitaro: fulmen incertum vibret  
Non deligenti saxa diffringens manu,  
Timidosque inani territet populos sono:  
Non haec trisulcum dextra, sed telum vibrat,  
30 Quo destinatum certius figit caput.  
At te quis animi devium exagitat furor  
Recutite Iuda, numen ut toties meum  
Demens lacessas? moveram regno duos  
Reges paterno: tertium indignum aetheris  
35 Vitalis haustu, Marte bis fractum meo,  
Solio locaram; rursus intumuit ferox,  
Residesque in arma compulit populos: luat,  
Luat scelestus; sentiat quidquid grave  
Iratus audet victor, aut victus timet.  
40 Quaerit rebellem, quisquis ingratum male  
Sceptro reponit. Nempe si invisum genus,  
Natos, parentes ultor extinxem prius,  
Non deinde toties aliud ex alio serant  
Bellum nepotes: perfidos nasci puto,  
45 Ut nemo doceat: nulla tam fixa inditur  
Natura soboli, nulla tam certo obvenit  
A patre rebelli liberis hereditas.  
Bene est: tenetur tota cum catulis fera;  
Nullum relinquam stirpis infandae super.  
50 Huc pertrahantur. At quis e contra gradum  
Taciturnus infert vestis ignotae senex?  
*Ier.* Rex magne, vatem sponte captivum adspicis,  
Cui dira Solymae excidia, cui totam dedit  
Seriem malorum nosse regnorum Arbiter.

- 55 Ni mens fuisset laeva, fatorum minas  
Pridem imminutum potuit admonitu meo  
Vitare Iudas: potuit; at tumidi duces  
Inauspicata tela sumpserunt manu.  
Traxere bellum, cuius Assyrium quoque  
60 Misereret hostem; plusque poenarum tibi  
Volens pendit Solyma, quam possis ferus  
Exigere victor. Pace sed dici hoc tua  
Liceat: Suorum scelere, non vestro Sion  
Excisa ferro est: alibi regnorum decus  
65 Huc ferat et illuc aura fortunae levis;  
Nostri ille Rector, cuius aeterno omnia  
Nutu feruntur, imperi ad clavum sedet  
Rerumque taxat moribus nostris modum.  
Te, quem secundo bella successu efferunt,  
70 Animos feroces premere, moderari impetum,  
Memoremque sortis esse communis decet.  
Suis ruinis Solyma quem tumidum facit,  
Tumidum domaret melius; hoc Babylon loco est,  
Unde illa cecidit: quique momento obrui  
75 Imperia nosti victor, ipse mox tuo  
Docere id ipsum victus exemplo potes.  
Nec mille forsán ducibus aut annis moram  
Facies duobus: fata quam paucis Deus  
Tam lenta dixit? una nonnumquam dies  
80 Funere triumphos mutat, et famulo ducem.  
Haec tu memento; quoque fortunae altius  
Te laeta tollit, levius afflictos preme:  
Deum faventem metue, nec tutum puta  
Efferre cuiquam contumax caelo caput.

- 85 *Nab.* Sua cuique dextra est, quod deum populi vo-  
*Ier.* At illud unde est quod tuam dextram vocas? [cant.  
*Nab.* Mene ergo terrae filium aut fungum putas?  
 Non sunt parentes? *Ier.* At suae parentibus  
 Dextrae fuerunt; unde? *Nab.* Quem captas senex,  
 90 Regem ansophistam? *Ier.* Neminem est animus meis  
 Captare verbis; nec tamen nostrum arbitror  
 Palpare reges. Rex es; at te hominem decet  
 Meminisse eundem: purpuram et regni notas  
 Natura nescit, quae sinu nudos dedit  
 95 Nudosque recipit. *Nab.* Iure nascendi pares  
 Fortuna post discrevit. *Ier.* An sorte haec regi,  
 Nutune potius mentis aeternae putas?  
*Nab.* Fortuna magnum est numen, aut nullum reor.  
*Ier.* Fortuna nullum est numen, aut caecum puta.  
 100 Non deligenti dona si spargit manu,  
 Cur colitur aris, nulla quae merita adspicit?  
 Frustra es colendo, demereri cum nequis.  
 Sin merita prudens pensat et votis favet,  
 Fortuna non est. *Nab.* Fata, fortunam voca, aut  
 105 Quodcumque tandem volvit humanas vices,  
 Nisi ille potius, quem sibi quivis manu  
 Sancire poterit, ordo factorum manet.  
*Ier.* Aequumne fuit, summus ut rerum parens,  
 Quae cuncta sapiens condidit, casu sinat  
 110 Neglecta ferri, ut quidlibet temere audeat  
 Libido inulta? num tuo morem hunc velis  
 Regno obtinere, regis ut nullo metu  
 Legumque nullo quisque quod lubitum est nefas  
 Designet ultro? *Nab.* Quid si et hoc mundi decus



- 115 Temere coisse nobiles censent Magi?  
Cur sorte nequeat, sorte quod natum est, regi?  
*Ier.* Sublime flammis mille qui appensas videt,  
Stabilique caelos rite volventes vice  
Lunae labores; solis eximium iubar
- 120 Nunc alta scandens spatia radiati aetheris,  
Nunc capita gyro nostra propiori legens,  
Libransque toti lance bis iusta diem  
Noctemque mundo; cernere haec inquam potest  
Ostenta rerum, credit et caecum chaos,
- 125 (Magis ipse caecus) cuncta dum miscet, sinu  
Forte omnia extudisse? Pars mundi quota est  
Vestra illa Babylon, quam tot artificum manus  
Vix condiderunt? nemo, quae certa undique  
Ratione constant, esse fortunae putat.
- 130 *Nab.* At ille Olympi si quis est rector polum  
Habet, habeatque; dum tamen terras sinat  
Nobis regendas: sorte divisum mihi  
Non invidenda cum Iove imperium feram.  
*Ier.* Mundi ille rector, qui tibi superbas dedit
- 135 Frenare gentes, hoc tributum regibus  
Imperat, honorem et Numinis laesi metum.  
Reges timendi gregibus imperitant suis,  
Maior minores territat reges Deus.  
Tute ipse nostrum carcere et vinclis premis:
- 140 Sibi perduelles non domet reges Deus?  
*Nab.* Nequit rebellis esse qui nulli fidem  
Obstrinxit. *Ier.* At qui condidit, cunctos sibi  
Obstrinxit idem. Lege non alia sumus.  
Quis cum parente pactus in manum venit,

- 145 Dicto audientem filium et frugi fore?  
Dei et parentum nascimur: non vendicat  
Mancipio abactum filium ut praedam pater.  
*Nab.* At enim parentum nota maiestas palam,  
Et nota regum, facere si iussa abnuis,
- 150 Vindex potestas: quod coli Numen iubes,  
Si nemo novit, si scelestis integrum  
Addit, et utrosvis fulminum afflatu petit?  
*Ier.* Documentum in ingens regibus Hebraei sumus,  
Quam certa Superi damna neglecti ferant.
- 155 Nec tibi superbo cuncta si ad votum fluunt,  
Sic fuerit olim: vindicem agnosces Deum.  
Saepe ille seram, sed gravem poenam exigit.  
*Nab.* Longinqua narras; tempore accepto interim  
Utamur. *Ier.* Ecquod tempus acceptum vocas,
- 160 Cum polliceri crastinum nemo audeat?  
*Nab.* Cane ista Hebraeis: numina et vates mihi  
Timent minari: si meis quisquam audeat  
Obstare votis, obruam Mystas suis  
Deosque templis. *Ier.* Obrui putris queunt
- 165 Ludibria trunci, stulta quae Persis colit:  
At ille noster qui tenet caelum Deus  
Nusquam tenetur clausus et nusquam deest;  
Mortaliumque fata, regnorum vices,  
Non fortuita caecus ex urna movet;
- 170 Sed mente longe provida rerum modum  
Metasque ponit. *Nab.* Regna, regnorum status,  
Martem secundum, vota in hac posui manu.  
Precario regnatur, ubi capiti imminet  
Maior potestas. *Ier.* Qui Deo subdi abnuat,

- 175 Regnare longum non potest. *Nab.* Possum, abnuo:  
Testorque nullos esse qua regno Deos.  
Abscede vates: trahitur en vinctus mihi  
Rex perduellis.

*Nabuchodonosor. Sedectas. Filius Sedectae.*

- Tene ego infandum caput  
Aspicio? sed quo perfidum cultu decet.  
180 Hac spe paterna sceptrum moderari manu  
Dederam immerenti, bella ut ingratus mihi  
Hostis reponas? *Sed.* Fateor, ingratum tenes,  
Sontem, rebellem: dira suppliciaingere,  
Ferrumque et ignes; mille per mortes neca.  
185 Nil deprecabor meritis: at talem quoque  
Aliquid rogare liberum infelix manus  
Cogit parentem; parce puerorum indoli,  
Et quos tenellae primus aetatis decor  
Subducit irae, victor indignos puta  
190 Quorum cruentes sanguine ultricem manum.  
Non illud oro, pristinae ut sortis decus  
Nomenque teneant; liberis hanc spem meis  
Perfidus ademi: patere, quod captis sat est,  
Servire miseros, nobili et vinctos iugum  
195 Accipere collo. Regibus nemo hoc neget.  
Sic tibi superstes vivat illa spes domus,  
Aliusque solo nomine Evilmerodach  
Virtute reddat, reddat et vultu patrem;  
Partisque populos addat imperiis novos,

---

V. 197. Evilmerodach, rex Babylonis, qui Ioachinum regem carcere liberavit eoque usus est familiarissime.

- 200 Si quos relinques. *Nab.* Arma qui nuper ferox  
 Solymis rotabat, verba quam blandus iacit!  
 En tibi trahuntur liberi; amplexu, osculis  
 Lassare; sic te decuit agnosci patrem.  
*Fil.* Pater heu! pater mi! *Sed.* Filii heu digni patre
- 205 Feliciores! quid tenellis compedes  
 Tentare rigidas manibus incassum iuvat?  
 Heu vana pietas! *Fil.* Heu pater! miser heu pater!  
*Sed.* Ite, ite nati, Principis pectus feri  
 Mollite lacrymis: vestra sollicitum salus
- 210 Habet parentem, nil meas poenas moror.  
*Fil.* Miserere Princeps, vinculis patrem exime.  
*Nab.* Procul amoveto, lictor, invisum genus.  
 Pereant scelesti. *Sed.* Sceleris auctorem tenes  
 Reum, fatentem: parce turbæ innoxiae,
- 215 Nisi si in parentem ~~crimini~~ pietas datur.  
*Nab.* Iam sunt nocentes, perfidi, si sunt tui:  
 Tollantur hostes. *Sed.* Hoc capit nomen puer?  
*Nab.* At capiet olim, Solyma cum generis memor  
 Recidiva ponet: pertinax amor hic patris
- 220 Consulere natis ante Chaldaeos suis  
 Penitusque belli tollere sementem admonet.  
*Sed.* Cessat leonis, hoste prostrato, furor;  
 Lacerat cadaver si qua de vulgo fera est.  
*Nab.* Prostratus hostis saepe vires integrat.
- 225 *Sed.* Non sic iacemus Isacidæ, ut cuiquam timor  
 Possimus esse. *Nab.* Surgere, qui vivit, potest.  
*Sed.* Victorem in omne lenitas vulgus decet;  
 Quid regem in ipsum? *Nab.* Nempe qui rex non foret,  
 Nisi hoc dedissem. *Sed.* Regibus fuero satus;

- 230 Hoc non dedisti. *Nab.* Fateor; hoc habeas tuum,  
Quod perfidorum perfidus regum es nepos:  
Cavere nostrum est ne qua damnatum genus  
Soboles propaget, semper ut minoribus  
Perfidia placeat maior, et inausa audeat.
- 235 *Sed.* Quos iam rebelles (velle fac) rursus queant  
Tentare populos? Quantulum Isacidum fames  
Pestisque reliquum fecerant, flammae et furor  
Inimicus hausit: nulla tam grandis senem  
Aetas redemit; feminam nullus pudor,
- 240 Nisi forma placuit: vix satis leti capax  
Per vulnus infans matris occubuit suae,  
Nascendo moriens. Sed quod indignum hactenus  
Possit videri, pugna nocturnis tegit  
Commissa tenebris; fecit hoc tincti semel.
- 245 Ferri libido, fecit incensus dolor.  
Non facile frenos ira, non Mavors capit.  
Quodcumque tandem est, militum fuerit scelus;  
Adhuc cruentum nulla te absentem potest  
Fecisse caedes. Nunc ubi armorum impius
- 250 Resedit ardor, tollere puellos potes,  
Miles quibus pepercit, et miles furens?  
*Nab.* Hoc est quod alta luce victorem pudet,  
Quod adhuc inulto nulla vindicta obtigit.  
Atrox, cruentum si quid admissum hactenus,
- 255 Id noster animo miles indulsit suo;  
Mihi nil litatum est: nunc meum tempus vocat  
Furere furorem. Lictor, haec monstra abdito  
Specu reconde, pauca dum mecum exigo,  
Poenamque Hebraeae quaero perfidiae parem.

- 30 Impune ut abeant, nec mihi meritas luant  
 Poenas Apellae? nulla tam indecorem dies  
 Arguerit umquam, tamque non memorem mei.  
 Bene est: petebat liberis parci suis:  
 Pater hic tenetur; qua dolet, ferrum exigam.
- 35 Parentis oculos morte funestet sua  
 Invisa soboles. Numerus angustus meo  
 Tres sunt furori, fateor: at quotquot potest  
 Mortes timere, videat; et geminis statim  
 Luminibus orbus imprimat visum nefas,
- 70 Animoque deinceps semper infelix suos,  
 Luctus revolvat. Hic placet poenae modus.  
 Sibi superstes funus extendat suum,  
 Careatque luce vivus; et quidquid potest  
 Auferre cuiquam Parca fatalem colo
- 75 Fusum recidens, vita viventi auferat  
 Misera, per omnes tracta poenarum modos.  
 I ferrum et ignes, lictor, i mortes para.  
 Me regiae intus iam dapes dudum vocant.

### *Chorus III.*

#### *Filii Prophetarum.*

- 30 Crederet quisquam? Superis honores  
 Invidet vecors hominum libido:  
 Suppares Divis pudet ire reges.  
 Altera exsurgit Babylone moles  
 Iamque vicinis minitatur astris,  
 Et novi caelum quatient Gigantes.

---

Chorus III. Versus Sapphici interposito hic atque illic Adonio.

- 285 Ille vastator Solymae, cruore  
Ebrios nostro Nabuchodonosor  
Pascitur thuris nebula, Deosque  
Pinguis omenti procul a vapore  
Aemulus arcet.
- 290 Parce terrarum Superumque rector,  
Parce, si culpam satis hanc luerunt,  
Parce, si nondum satis eluerunt  
Aliger primi sceleris repertor,  
Dum tuis certat titulis superbus,
- 295 Quique, quos unquam genuit nepotes,  
Ante damnavit male cautus Adam.  
Illicet diae nitor ille lucis,  
Candicans caelo rutilus novello,  
Sede ab excelsa ruit ultimisque
- 300 Squallet inferni tenebris barathri.  
Iste fatalem violare morsu  
Ausus autumnum vetitosque doctae  
Arboris foetus, miser esse primus,  
Plusque quam vellet didicit malorum.
- 305 Noxa non uni stetit una magno,  
Posteris dentes hodieque ab illo  
Dentiunt morsu metuuntque tangi.  
Creduli quondam vitio mariti  
Feminae ad fraudes patuisse narrant
- 310 Pyxidem aerumnis gravidam malisque,

---

V. 308. Epimetheus sc. deceptus donum Pandor  
nuptiale aperuit.

- Inde morborum incubuisse terris  
Agmen et totum tenuisse mundum.  
Haec fide vates memorent Pelasga  
Et coli ad lumen celebrent aniles :  
315 Eva Pandoram facit innocentem  
Et capi blandae facilis maritae  
Uxorius Adam.  
Tempore ex illo miseranda proles  
Nascimur matrum prope parricidae,  
320 Voce testati gemituque primo  
Omen infaustum genitalis horae.  
Terror Alcides Nemeae ferarum  
Si fuit quisquam, fuit ille quantus  
Quilibet nostrum: modo natus infans  
325 Quaesiit lucem, et genuit reperta  
Luce misellus.  
Scilicet cunas puer inter arctas  
Guttur elisit tumidum colubris;  
Maximum credo facinus patravit  
330 Et suo dignum Iove, noctibusque  
Nequiter iunctis bene cum papillas  
Uberum pressis tenuit labellis.  
Nec superborum potiora nostris  
Iura natales habuere regum:  
335 Sint licet festi populo, fuere  
Flebiles nato miseraeque matri.  
Qui modo aurata radias corona  
Squallidus gemmis, populisque circum  
Sceptra moliris metuenda centum:  
340 Qui pedum irato quoties sub ictu



- Succutis terras tremulumque mundum,  
Ferreos armas sonitu maniplos,  
Qui datos caelo temerare rerum  
Terminos audax subicis carinis  
345 Montium saltus equitique tutum  
Per freta insternis tabulata pontem:  
Pone quos circumdedit apparatus  
Sortis alternans favor inquietae,  
Et tuis pollens opibus superbi;  
350 Qualis a partu tenerum rubebas,  
Fascia qualis puer obvolutus  
Cura pendebas gerulaeque pondus,  
Qualis ignotas vagus inter umbras  
Sutilis cymbae referes Magistro  
355                   Ordine naulum.  
Tutius Princeps animi modestus  
Subdit aeterno sua sceptrum scepro,  
Numinis castas veneratus aras.  
Hinc caput rerum pius auspicatur,  
360 Gratus huc laetos iterum refundit  
Exitus: seu cum domito triumphans  
Hoste festivas vehitur per urbes,  
Seu toga clarus studiis beatæ  
Pacis indulget fruiturque parto  
365 Civium tutus animis suorum.  
Impotens regno Superumque temtor,  
Quem iuvat toti populo timeri,  
Horreat cunctis metuendus omnes.  
Excubent quamvis vigilum catervæ,  
370 Haereant denso lateri cohortes,

Nulla securos vehet hora soles,  
Nulla tranquillos feret hora somnos.  
Qui tot incedit comitatus armis,  
Vix fide incedit comitatus una.

- 75 Saepe qui regum genua advolutus  
Dextera prensat, diadema fulvum  
Respicit limis; inhiatque sceptro,  
Qui manum blandis terit usque labris.  
Immemor sortis nimis ille nostrae est,  
90 Qui tot incertis homines rotari  
Casibus cernit, renuitque demens  
Cedere caelo.

- At cuius ictu proximae stridunt fores?  
Quis ille vultum moestus et fletu gravis,  
85 Atro verendum cinere conspersus caput,  
Nimiumque nostri similis? impexum manu  
Mentum revellit; squallidam spargit comam;  
Diversa iactat brachia, adductis sonat  
Pectus lacertis, vestium abruptis sinus,  
90 Hoc more nostro: pectus appressum pilis  
Intus cruentis horret. Hebraeus palam est,  
Quicumque miser est. Tantulum huc secedite,  
Propiusque moesti verba captemus senis.
-

**Actus quartus.***Ieremias. Chorus.*

- Ier.* Supreme rector cuncta qui nutu moves,  
Eritne tandem gravibus aerumnis modus?  
Eritne per te? Solyma, Davidis labor  
Totque inde regum, pulvis et tumulus iacent;  
5 Nos praeda trahimur, bisque dispersis nova  
Exilia mandas: spatia sed terrae negant.  
Non unus hostis spolia de nobis tulit,  
Non una Medus; trita Babylonem via est,  
Et trita Memphim: sola Iudaeis negat  
10 Iudaea sedes, cetera exsulibus patent,  
Nullumque Hebraeo vilis venit caput.  
Meruimus ista fateor, et si quid potest  
His esse gravius; fecimus caelum nocens  
Diri nepotes; melior at Patrum tibi  
15 Memoria subeat. Abrahae imperiis fides  
Probata duris, castus Isaci timor,  
Et tot Iacobi pectus invictum malis.  
Pietate avita patere natorum scelus  
Obliterari. Stirpe si excindi ultima  
20 Placet Israellem, quis tuis meritos dabit  
Aris honores? quis tuas laudes canet?  
Ammoniusne perfidus? nostris ferox  
Medus ruinis? fuerit incassum via  
Medium per aequor, aggeris structi modo  
25 Ubi mare gemina fronte marmoreum stetit?

---

Act. IV. Narratur caedes filiorum Sedeciae, et Sedeciae ipsius excaecatio.

- Chor.* Qui sic repente fixus obtutu silet  
Senex in uno? totus horrescit comis,  
Animamque pectus vix anhelantem capit.  
Hand dubia vatis signa iam pleni Deo.
- 30 *Ier.* Quid me furore concitas iterum sacro,  
Aeterne genitor, mentis alienum meae,  
Tuae capacem? Quae, quibus vates canam?  
Quae fata restant? aliquid extremas potest  
Ultra esse flammis, nec satis Solymae iacent?
- 35 Utinam occidissent totae, et hoc saltem darent  
Fata in supremis unicum aerumnis bonum,  
Nihil timere. Sola metuendum mihi  
Facitis tyrannum parva natorum cohors  
Capti parentis. Pro ferax scelerum dies!
- 40 O magne Rector quid novi monstri obiicis!  
*Chor.* Averte in hostes omen infaustum, o Deus.  
*Ier.* Nihil ominamur, providi ut vates solent,  
Olim futurum: video et intersum malis.  
Geruntur intus; tota res luce et palam est.
- 45 En ille Superum temtor et bello insolens  
Nabuchodonosor, Regis exuvias mei  
Davidque ab alto purpuram ostentat toro.  
Frontem tiaras noster, et sacrae comam  
Cinxere vittae: geminus hinc illinc ducum
- 50 Discubuit ordo: spolia Solymorum micant  
Et hic et illic; ipsa quae pictis premunt  
Aulacae lectis, nostra distinxit manus;  
Et quae superbis fixa regalis domus  
Parietibus haerent, monstra calcati maris,
- 55 Mersosque currus, bella, mystarum tubas

- Muris timendas, mille prostratos duces,  
Et facinus omne gentis Hebraeae canunt.  
Merum sacrato, pro nefas! auro rubet;  
Vile in profano est: miles hoc quivis bibit.
- 60 En ecce Ductor memorat armorum vices,  
Et castra parvo tota metatur mero  
Victasque Solymas: hic Sion nuper stetit,  
Tulitque caelo proximum e terris caput.  
Relligio gentis unica hic templum fuit.
- 65 Saepe hac rebelles, prima dum valli darem  
Praesidia circum, cominus pugnam parant,  
Audentque signis serere collatis manum.  
Illic sepultae rex per ambages viae  
Iam luce dubia profugus e terra exstitit.
- 70 Sic bella pingit; calice mox toto impiger  
Falsisque Solymis proluit madidum caput.  
Io, triumphos, ceteri assensu fremunt,  
Geminantque plausus. *Chor.* Lacrymas socii date  
Gemitusque contra, plangite infaustum diem,
- 75 Et tota nostris Reblatha lamentis sonent.  
*Ier.* At at nefandae ferculum coenae dabit  
Dignum satellites. Agite, sic mensis quadrent  
Primis secundae; sanguinem hae sitiunt dapes.  
Vinctus Sedecias trahitur; et totus quidem,
- 80 Miseri parentis liberi stipant latus  
Densantque pavidi. *Chor.* Magne regnator poli,  
Miserere tandem, vultu et afflictum aspice  
Iudam sereno; parce, per si quid tibi  
Umquam parentum dulce nostrorum fuit.
- 85 *Ier.* Vix misera gressum cominus pompa intulit

- Verusque Hebraeus ante simulatum stetit,  
Assiluit iste, qualis e Gangetico  
Ieiuna lustris tigris ad praedam volat.  
Ardent minaces ore truculento genae,  
90 Exundat ira pectus, et largo insuper  
Baccho tumescens igne non uno furit.  
Nec multa fatus, voce violenta intonat  
Ferrum satellites: moxque devotos neci  
Lumine pererrans, caede quem prima imolet  
95 Patris dolori dubitat, et peragi nefas  
Iuvat ordinate. Macte, consilium capis  
Dignum tyranno; subiit extremos patri  
Servare luctus, ipsa quos aetas minor  
Et blanda pietas altius cordi imprimant.  
100 Sedet ille trunco fixus, hoc ritu suas  
Spectare mortes placuit, et toto frui  
Luctu quietum; dirimit hinc illinc breve  
Spatium misellos, impares numerus facit;  
At pro duobus dexter assistit patri  
105 Aetate fratres Iosias vincens duos.  
Lictor puellum quisque correptum tenens,  
Ferro et parata pendet in vulnus manu,  
Spectatque nutum. Lancinant totidem neces  
Iam cor paternum, totque vix unus capit  
110 Animus timores; Iosias totum hinc rapit,  
Rursum minores inde sollicitant duo:  
Dividere patrem vellet affusum tribus.  
Violenta ceu cum maria discordes agunt  
Feruntque Zephyri, cedit atque instat sibi  
115 Instabilis unda; nauta cui faciat pedem

- Incertus aurae, vela in ancipiti tenet.  
Iterum efferati regis indomitum prece  
Lenire pectus genitor infelix parat,  
Positoque natos poplite advolvi iubet.  
120 At ecce Iosiam supplicem frustra semel  
Pudet fuisse; decora maiorum puer  
Pictosque vultus cernit, et faciunt suo  
Animos nepoti. Liber ad manes tibi  
Genitor praeibo; sed decus spreti feram  
125 Mecum tyranni. Dixit, et iugulo necem  
Hausit sui securus, eductum cruor  
Ferrum secutus vulnere ingenti fluit,  
Donec recepta morte procubuit solo,  
Humique fesso lumine requirens patrem  
130 Vidit tyrannum: vidit, et moriens quoque  
Vultus retorsit. Tristius letum haec facit  
Pietas parenti: nititur frustra suis  
Pugnax catenis, pectus insano gemit  
Ferri sub ictu, vincula quod unum sinunt.  
135 Hinc trepidus infans, territus fratris nece,  
Lictoris ipsa veste contextit caput:  
Marmaricus ut cum perculit totas leo  
Cum nemore caulas, audiit fremitum pecus,  
Minorque tauro turba congeminat latus:  
140 Carnificis illinc alter observat manum  
Strictumque ferrum, conscius fratrem sibi  
Unum anteire. Spectat et longo impius  
Rex scelere gaudet; neve disiunctus parum  
Primi secundus obruat sensum dolor,  
145 Dispensat iras lentus, et spatio necem

- Doctus tyrannus quamque distinguit suo.  
 Ergo ut paternos tantulum primus furor  
 Remisit artus, fecit et luctus novi  
 Animum capacem; proximum caedi imperat  
 150 Adicique fratri. Barbarum quamvis sonum  
 Sensit puellus, seque ab incauti manu  
 Rapuit ministri, turba currenti favet:  
 At ille parvo facile trepidantem gradu  
 Secutus, ense penitus in tergo abdidit.  
 155 Gemino puellus flumine aspergit solum,  
 Et utrimque moriens pronus in patrem cadit.  
*Chor.* Pro facinus atrox, dirum et aspectu horridum?  
*Ier.* Tepido paternos sanguine implentem sinus  
 Exanimis ipse genitor amplexu ultimo,  
 160 Vincisque circum corpori affusis premit.  
*Chor.* Miserande genitor! *Ier.* Stricta quod nequit ma-  
 Frigentis oculos osculis claudit suis, [nus,  
 Et ore presso spiritum abeuntem legit.  
 Odere tandem triste convivae nefas,  
 165 Quin ipse Solymae clarius victor gemit,  
 Palamque diro parvulos praedam dolet  
 Monstro stitisse: vellet incolumes fugam  
 Tenuisse, vellet morte defunctum levi  
 Toto parentem conditum regno tegi.  
 170 Solus furori barbarus constans suo  
 Terret gementes; hostis est, cui hostium  
 Aegre est recidi penitus invisam indolem.  
 Ignave lictor tertium hoc monstrum nece.  
 Ictum parabat ille, cum parvas manus  
 175 Oculosque contra trepidus obtendit puer:



- Vicitque pietas, et novo monstro stupet  
Mucrone stricto lictor ad caedem piger:  
Nec blandus infans, nec ferum pectus movet  
Lictor patronus: precibus accrescit furor.
- 180 Ut cum medullas hausit et corpus sacer  
Depastus ardor ossibus vacuis furit,  
Iam medici et omnis asperat tactus malum;  
Intus revulsis torridum fibris iecur  
Quas biberit undas, urit et gelido amplius
- 185 A latice vires Stygius accendit vapor.  
Sic dira rabies, impia, intractabilis  
Regis cruenti saevit, et pectus ferum  
Ardet magis magisque furiarum impotens.  
At tibi necandos lictor imbellis tuos,
- 190 Si renuis istum, liberos, inquit, dabo.  
Vix dum coacta carnifex totam manu  
Mortem tenello pectori infigit satis,  
Facinusque et ipsum cum facit, damnat nefas.  
Ast ubi cruento tres videt sparsos solo
- 195 Cruentus ipse, nec novas mortes timet  
Iam genitor orbus; pectus oppressum diu  
Furiasque et omnes laxat irarum impetus  
Dudum paratos: vincla nequidquam excutit  
Arctatque motu; ringitur, frendet, fremit,
- 200 Opprobria diris miscet, et quidquid ferum  
Insanus animo suggerit promptum dolor.  
Hostes laccessit, fata, nec caelo impius  
Superisve parcit: mille nunc ignes vocat  
In se aut tyrannum; nunc remolito chaos
- 205 Hiare mundo, seque et infandum caput

- Ulterius Erebo, Tartari ad finem ultimum  
Vivos videntes ruere, nec dubitet prior  
Trahere sequentem. Risit indignans minas  
Amarus hostis, luminum et geminas faces
- 210 Capite revelli voce violenta imperat.  
Ultro ministros noster irritat probris:  
Adeste barbari; adeste (si convicio  
Emenda mors est) belluae, atque his addite  
Funeribus unum; facitis? et puerum neces
- 215 Audetis ultra? adeste, et invisum diem  
Eruite; parte moriar hac saltem mei,  
Quae tot suorum funere implevit patrem.  
Unum oculi, et illud esse postremum volo,  
Torvi tyrannum aspiciate, et obliquos mali
- 220 Hirquos rotate; barbari vultus notas  
Odiumque menti figite aeternum meae.  
Nec plura fatus, praebeuit firmum caput  
Ad utrumque vulnus; lictor hinc illinc premens  
Unguem sub ipsos orbium infodit specus,
- 225 Oculosque ab ima funditus sede extudit  
Tum quoque feroces. Perstat indomitus furor:  
Vacuique vultus igne truculento micant.  
Vinctis solutus vellit haerentes genis  
Fibras, et alta luce vestigans diem
- 230 Gaudet tenebris: sanguine implevit manum  
Taboque late regias spargens dapes  
Ipsam et tyrannum. Quod tibi, si qua id tamen  
Iustitia caelo curat, his dignum Deus  
Factis reponat; caecus hanc unam velim
- 235 Aspicere lucem. *Chor.* Siluit et sensim sibi

Vates relictus excutit membris Deum.

O dura nimium fata! cui monstro, o Pater,  
Exterminandos placuit Isacidæ dari!

*Ier.* Misella turba, quid tuas clades graves?

240 Anteire lacrymis funera atque uno malo

Bis esse miserum, me iubet solum Deus.

Quid ante tempus fata luctumque occupas?

Non sunt tamen futura, quæ coram geri

Loquebar absens; facta nunc, facta ultio est:

245 Ite, ite celeres, quotquot infaustæ Sion

Natæ supersunt, facite mox tota excitæ

Ab urbe coeant, regii ut stirpem tori

Donent sepulchro: quæ iacent, sparsos legant

Parentis oculos, marmore ut clausum pari,

250 Quod licuit unum, filii hoc habeant patria.

Abiere: quæ nunc prima, quæ demum miser

Postrema plangam? fumat, et lapsæ vetus

Querela Solymæ est! polluit templi intimos

Hostis recessus; ordo Pontificum sacer,

255 Rex ipse, regum prole cum tota perit;

: Captiva turba est. Regis elati minis

Par sit potestas, cardines mundi ultimos

Bello fatiget, nec suo perstet loco

Immune caelum. Magne regnator Deum,

260 Tam lentus audis scelera! tam lentus vides

Reges superbos! ceteri an quidvis patrant

Impune nullo numinis laesi metu,

Solique Iudæ dextera trisulcum gerit

Vibratque telum? Comprime, ah! vocem dolor,

265 Et ore dignos impio questus doma.

- Ante, ante placidi mille violatum est prœbris  
Nomen parentis, foederi illusum sacro,  
Truncis litatum, iuris infractus vigor,  
Fas omne pulsum. Iustus Israel Deus;  
270 Cum plectit et cum parcit, ex aequo bonus.  
Maiore scelera nostra taxavit modo;  
At scelera nullum nostra servarant modum,  
Nec te, superbo capite quae terres deos,  
Insana Babylon, mitius fatum manet.  
275 Divina si quid caelitus veri canunt  
Responsa vatum, si quid ad modulos lyrae  
Auctor futuri certus atque idem inclytus  
Iessaeus armis, muta pendebunt tuis  
Nablia salictis, quando victoris soli  
280 Fluenta propter pascet Assyrium gregem  
Captivus hospes; forsán et nuper suam  
Pecus ipse ducet. Patrium frustra melos  
Cantare iussus, quale, dum Sion stetit,  
Solymis sonabat, occinet festa tibi  
285 Pro voce gemitum: Siccine, heu! sacra extero  
Prodamus hosti? deerat hoc unum malis  
Cantare miseros: ante dediscat suas  
Mea dextra chordas, ante lingua torrido  
Haerens palato vocis officium neget,  
290 Obliviosa quam mihi mente excidant  
Solymae penates inclytum et templi decus,  
Quam mihi madentes ulla lux tergat genas,  
Nisi quae Sionis moenia et templi obrutas  
Restituet aras. Tu tamen caelo arbiter  
295 Qui cuncta cernis, reddere protervae vicem

- Memento Idumae, voce quae nuper meos  
Stimulabat hostes, Vertite ex imo omnia;  
Eruite vel quod terra defossum tegit.  
Nec tibi, meretrix magna, quae fastus meos  
300 Fastu premis maiore, vindex desuper  
Dormit severus. Aderit, o! adsit dies,  
Victorque felix, paria qui nostris tibi  
Remetiatur praemia, et pueros sinu  
Raptos parentum frangat ad saxum impius,  
305 Matremque nato spargat exanimem suo.

*Chorus IV.*

*Filiae Ston.*

- Si pectus gemitu, brachia planctibus,  
Si rivis oculi sufficient novis,  
Extremam sociae dicite naeniam,  
Dum funus patriae condimus ultimum.  
310 Huc moestae facies squalor et orbitas,  
Funesti huc gemitus, huc iterum dolor  
Postremumque veni. Non solitis placet  
Cor figi stimulis; subde animo faces,  
Quas nec continuis pupula fletibus,  
315 Nec lapsu minuat temporis orbita.  
En nudat tibi pectora solvimus,  
Et crinem patriae pulvere sordidum.  
En quae multiplici funere lividas  
Sulcavere manus vulnera per genas,

---

Chorus IV. Metrum Asclepiadeum primum.

- 20 Irritata novo sanguine perpluunt.  
Ploratus oculi quod datis, est leve.  
Nil flendum solitis perpetimur modis:  
Salsas vulneribus vergite lacrymas,  
Et mixtim geminum per laceros mihi
- 25 Vultus flumen eat. Sistite lugubrem  
Hic pompam, comites, caraque pignora.  
Molliri tepidis vulnera fletibus,  
Componique decet parvula, dum calent,  
Docta membra manu: sindone cum deest
- 30 Qua regum tumulto corpora contegas,  
Infelix pietas, pondus inutile  
Peplum barbarico stamine diditum  
Et fluxam cidari detrahe carbasum:  
Cui tanto miserae comimur ambitu?
- 35 Nimis heu clari generis soboles,  
Heu certa nimis! accipe Princeps  
Quae prima tibi lamenta damus,  
Quae prima ferunt verbera planctus.  
Accipe Iosia, qui aetate duos
- 40 Anteis fratres, qui morte duos:  
Te suprema voce ciemus  
Solymis sero nate tuendis,  
Cito formosae nate parenti.  
Misera heu mater! nimis in luctus
- 45 Fecunda tuos, quae te regio,  
Quis victor habet? Misera heu mater!  
Seu tua nondum funera sentis,  
Seu nota gemis: quis sollicitae  
Animum possit fallere matris?

- 350 Captiva parens, orba, infelix,  
Vidua vivi coniugis uxor,  
Quos hic gemitus, quae verba dares,  
Si tantus habet sua verba dolor?  
Vos, o comitum turba dolentum,  
355 Ite ad planctus, explete vices  
Dum mater abest; ite, sed illis  
Quibus ipsa parens viribus ite.  
Innuba quantum potis es virgo,  
Animo totam concipe matrem.  
360 Innuba quantum satis es virgo,  
Paribus matrem redde querelis.  
Occidis eheu! occidis eheu!  
Tantum ad luctus ostense tuis  
Puer infelix: quem spectabant  
365 Sceptra secundum, mors spectabat  
Impia primum. Tibi Davidis  
Fortia populi gesta vovebant,  
Salomonis opes, losiae castos  
Superum cultus, dignos solio,  
370 Dignos proavi nomine mores.  
Superi vanas risere preces,  
Zephyrique leves vota tulerunt.  
Occidis eheu! occidis eheu  
Puer infelix! tecum omnes  
375 Spes sub gelido marmore claudis.  
Ades o nostri gaudia nuper  
Splendorque chori, virgo puelle:  
Huc castus ades, nec turpe sinus  
Tibi virgineos tetigisse puta.

- 30 Ades, et lacrymis implere meis,  
Dum vulnus hians saniemque premo.  
Heu vulnus atrox! quo vita tibi,  
Quo nostra omnis gloria fluxit.  
Altum heu vulnus nimiumque patens!
- 35 Oblitus eras in quem fureres  
Dire satellites, pueri quando  
Impete tanto ruis in iugulum.  
Formose puer, patere intonsus  
Per colla fluens lactea crinis,
- 40 Non doctus acu, sed lege sua  
Notos sese crispet in orbes.  
Ora parentum confusa notis,  
Lumina blandae matris amores,  
Lumina celsae frontis honorem,
- 45 Claude aeternis claude tenebris.  
Niveum roseis iunge labellis  
Propius dentem, strictius aequo  
Ora tetendit ultimus ardor.  
Tende sub imum brachia pectus,
- 50 Sceptroque habiles belloque manus  
Ad funebrem flecte decussim.  
Sic compositum quodcumque tui est,  
Iosia, ignoto redde sepulchro;  
Patrium Assyrius diripit hostia.
- 55 Sed sic compositum condite Iosiae  
Quod mortale fuit: non violabilis  
Pars nostri melior, vulneraque et necem  
Tristesque inferias spiritus effugit.  
Nequidquam solito carmine praeficae



- 410 Affantur positum corpus, et impio  
Decertant animum iungere funeri:  
Manes innocuos inter et Abrahæ  
Exceptus patrio est parvulus in sinu,  
Securusque feri Nabuchodonosor
- 415 Aevum laetus agit.  
Nec turpi Iosias occubuit nece;  
Quem non rex animi terruit impotens,  
Elati tumidus nube supercili,  
Non pendente minax vulnere carnifex.
- 420 Alio Iuctus vertite vestros,  
Alio planctus; sua iusta tulit  
Lacrymasque puer de tribus unus.  
Qualis cupido sectus ab ungui  
Flos yeris honor (quem virgineae
- 425 Carpsere manus, dum quaeque sibi  
Sertum arguto pollice nectunt)  
Cui sua nondum forma recessit,  
Cui sua sensim forma recedit,  
Nec enim tellus iam mater alit:
- 430 Talis vestros pueri vultus  
Nunc candor habet, cedensque genis  
Decor extremus quiddam solito  
Plus more micat; ceu supremo  
Natura parens munere funus
- 435 Dignata novos afflet honores.  
Scilicet istae timor armato  
Meruere manus esse tyranno,  
Vix bene balba voce parentum  
Pappare infans nomina doctus

- 10 Scilicet olim bella moveret,  
 Patriae quaerens ubi forte locus,  
 Sortisque memor quam nosse nequit.  
 Si tamen aequum tollere censes  
 Quidquid possit metui quondam,  
 15 Et idem iustum tutumque putas;  
 Evilmerodach reliquamque tuae  
 Spem tolle domus: hac lege licet,  
 Metui possunt; nempe Assyrius  
 Rex Sennacherib (dignus ab illo es  
 50 Tertius heres) iugulum natis  
 Dedit incautus; quasque colebat  
 Cernuus aras, victima maior  
 Sanguine sparsit.

Parcite longis turba querelis:

- 55 Fugit ardenti levis hora rota,  
 Nec nisi furtim licet esse piis.  
 Conferte suos Iosiae fratres,  
 Donaque tumulo mittite raptim,  
 Qualia deceat mittere captas;  
 60 Non quae Solymis stantibus olim  
 Traheret pompae regius ordo.

- Parvi o manes, puri o manes,  
 Umbraeque nihil lucis egentes,  
 Laeti ad plures ite Isacidas;  
 65 Ite, et proavos visite reges.

Nihil ad funus conferre pius  
 Genitor potuit carius istis:  
 Oculi nostrae sidera gentis,  
 Geminis pulsi sedibus orbes,

- 470 Quorum ad nutus proceres nuper  
Populique omnis turba tremebat,  
Ultima nostri fercula adeste,  
Non parva tamen fercula luctus.  
Cardine verso crepuere fores:  
475 Adest tyrannus, et quidem irato gradu;  
Adhuc tumescit: ite diversae, aviae,  
Et cara celeres pignora in tuto abdite.  
En barbarorum tota carnificum manus,  
Comitatus illo dignus, e foribus ruit.
- 


### Actus quintus.

*Nabuchodonosor. Sedectas.*

- Nab.* Bene est: abunde est. Solyma nunc tandem ia-  
Sic perfidorum decuit Isacidum ultimas [cent.  
Spes quoque recidi, regiam ex imo domum  
Subruere: flecti quod nequit, frangi potest.  
5 Nunc anime regnas; nunc tibi nemo hostium  
Abiit inultus. Pudeat irarum deos.  
Nostris deinceps Graecia excluso Iove  
Adolebit aris; dicet Alciden suum;  
Cana nitentes populo impedit comas,  
10 Regumque dextra stipitem ultorem geram.
- 

Act. V. Sedecias oculis effossis foras producitur, et  
Babylonem amandatur.

- Unam tamen deesse vindictae queror  
Laudem beatae: fuerat haec populo palam  
Manus probanda, non domi occluso male  
Perdenda virtus. Lictor huc vivum trahe  
15 Regis cadaver, sanguine natorum et suo  
Vulnere cruentum; Reblathis spectaculum,  
Rebelligibusque nobile exemplum dabit:  
Audire miseri cominus questus placet.  
Vos facite regem nemo vicinum indicet,  
20 Caecisque totae gressibus pateant viae.  
*Sed.* Quis cespitanti cogit incertum gradu  
Properare ductor? trahito quo lubitum est, sequor,  
Vel ad tyrannum. Quisquis es tamen, precor;  
Ne filiorum membra proculcem parens,  
25 Carusve sanguis lubricum fallat pedem.  
Violare furor est, ipsa quod tuto in loco  
Natura posuit; fallor? an tetri specus  
Iter est ad umbras carcerisque antrum mei?  
Illuc eamus: caecitas capiti impio  
30 Parum alta nox est. Quid male hic superas domos  
Fumus luesque oberro? quid manes meos  
Et insepultas vivus exequias traho  
Mihimet parentans? reddite sepulchro suum,  
Aut rupis altae condite abstrusum specu.  
35 Non ille primis solibus pateat locus,  
Non ille seris; quid mihi impendat diem  
Perdatque Phoebus? Nocte non una obrutus  
Liberior illic questubus vitam exigam,  
Et iusta genitor liberis solvam tribus  
40 Forsan inhumatis; lacrymas oculi negent;

- Melius inanes sanguinem volvent genae.  
Nunquam coire patiar hac venas manu.  
Scrutabor ungui vulnera, et saniem extraham;  
Non alius imber hos magis luctus decet.
- 45 Heu me! per ipsas urbis ingredimur vias.  
Sentio, videmur: verba, quod possum, audio;  
Tandemque nostris aliquis ingemuit malis.  
Seu Medus ille est victor, et duro quoque  
Vel ab hoste pietas exprimit luctus suos;
- 50 Sive est Hebraeus, voce qui timida ingemit,  
Spectatque trunci triste simulacrum ducis;  
Sive hunc et illum miseret, utrumque alloquor.  
Mihi dare gemitus parcite, haud pro me queror.  
Dies ademptus, et patri ingesta orbitas,
- 55 Sed tum videnti: vincla, carcer, servitus,  
Vindicta levis est; ferre quod merui, fero.  
Nil ille lacero moveat e vultu cruor:  
Meus est: nocens est: alius hanc vestem imbuit  
Patriumque nati sanguis infecit sinum:
- 60 Innocuus aliquid iste virgineum rubet  
Lacrymisque dignum: caecus hoc etiam scio.  
Captiva turba, filiae heu! quondam Sion,  
Lamenta, lacerum crinibus vulsis caput  
Vestrosque planctus filii insontes petunt,
- 65 Non pater iniquus. Perferam hanc molem mali,  
Clarisque nimium rebus evolvam miser  
Perplexa nuper fata: praestabo fidem  
Utrique vatium, pone victrices rotas  
Cum pars triumphi magna Babylonem invehar.
- 70 Sed non videbo; luce ab amissa hoc erit
- 

- Solamen unum. *Nab.* Macte divinum caput,  
 Oracla funde. *Sed.* Ludimur? an aures mihi  
 Violavit illinc hostis infandi sonus?  
 Non ludor; hic est bellua: irarum novos  
 75 Suffigit animo redditus stimulos dolor.  
 Fit omne rursus et recrudesceat nefas.  
 Regum tyranne, seculi exitium, lues,  
 Conviva miles; fortis ad puerum necem,  
 Sed patre revincto; sceptrum quid foedas manu?  
 80 Non tibi vetustum nobili a stirpe est genus,  
 Tellure natus regum incestas decus.  
 Solymam tui vicere, post pugnas tuum est,  
 Puerum cruore ludere, et strata super  
 Bellare mensa. *Nab.* Quis mei indicium facit?  
 85 Luminibus orbi forsitan Apellae vident?  
 Sed. Visu carentem cetera ut lateant satis,  
 Tu non latebis; coge membratim mori  
 Reliquos per artus, omne quo voces meant  
 Iter recide: non tamen sensum tui  
 90 Abstuleris umquam. Absiste qui noctem hanc regis,  
 Solus sagaci nare deprendam feram,  
 Frangamque morsu. *Nab.* Quin tibi procacem prius  
 Linguam hanc revelli iussero. *Sed.* At vultu satis  
 Tuam tacens mutusque barbariem loquar.  
 95 *Nab.* Moriere. *Sed.* Quis me compotem voti facit?  
 Non est tyrannus; moriar: o laetum diem!  
 Te, te vel umbra Tartari erumpens specu,  
 Te pater inultus prole cum tota petam:  
 Stygiamque vibrans propius ac propius facem  
 100 Sequar usque et usque: nulla nox animum tibi

Faciet quietum, nulla securum dies.

*Nab.* Umbras minare, spectra quae caeci vident,  
Dum tibi superbo colla prosubigam pede,  
Vivumque vivus ipse post currum traham.

105 Curate famuli, tota Babylonem ocyus  
Pompa ut sequatur; iste praetentans viam  
Baculo senili, currui adiunctus meo,  
Diadema victi praeferat regis notam.

*Sed.* Ibo, ibo, magne ductor, et fortem manum,

110 Clarumque facinus hisce testabor notis.  
Adeste populi, quosque sublimis videt  
Mundi Bootes cardinem ignavum premens,  
Et queis perustum verticem Phoebus rota  
Propiore crispat. Nullus haec taceat dies;

115 Totisque saeculis audiam infelix pater,  
Dum tu tyrannus. Adsit, et vindex notet,  
Quo te minorem gerere detrectas, Deus,  
Suumque servet liberis epulum tuis.

---

***HUGONIS GROTH***  
**CHRISTUS PATIENS,**  
**TRAGOEDIA.**

---





## Interlocutores.

*Iesus.*

*Chorus Iudaeorum mulierum.*

*Petrus.*

*Pontius Pilatus.*

*Caiphas.*

*Iudas.*

*Turba Iudaeorum.*

*Nuntius prior.*

*Nuntius alter.*

*Chorus Romanorum militum.*

*Iosephus Arimathensis.*

*Nicodemus.*

*Iohannes.*

*Maria Mater Iesu.*

---



## **Actus primus.**

*Jesus.*

O qui futurae sortis immense arbiter  
Rerum potente fata moliris manu,  
Supreme mundi genitor, et genitor meus,  
Mundo prioris, omnia aequavi hactenus  
5 Imperia factis: si quid ulterius iubes,  
Paratus asto: cuncta quae timeo feram:  
Hac lege veni. Quem tamen finem gravi  
Statuis labori? Nulla me vidit dies  
Secura: crevit ipse dum fertur labos,  
10 Maloque patuit semper in peius via.  
Paterna summi templa deserui aetheris,  
Nec natus exul, pauperem pressi casam  
Stabulique prima turpis incunabula  
Male notus infans: parvus, infelix, miser  
15 Iam dignus hostis rege Iudaeo fui.  
Nondum annus alter ierat, aetati parum,  
Nimium tyranno; dirus Ephratias nurus  
Orbavit ensis: turba puerorum cadit,  
Dum quaeror unus, meque dilapso fuga

- 20 Cruentus error perdidit tantum nefas.  
Centum per orbem cognitus miraculis  
Patrem probavi. Livor adversum furit,  
Et ipsa virtus peius Herode nocet.  
Pater, quid istud? semper agnoscor tuus,
- 25 Semper recusor. Persa me coluit magus,  
Et ante parvos iacuit infantis pedes,  
Suoque Mithrae praetulit sidus meum.  
At Abrahami gens ab aeternis tibi  
Seposita saeculis, priscaque Isacidum domus
- 30 Excussit omnem mente degeneri Deum.  
Hinc contumaces bella Pharisei movent  
Pietate fallax turba: at hinc in me trahit  
Legum magistros dira pontificum cohors:  
Illinc profani secta Sadoci minax
- 35 Regalis aulae purpura invisum premit.  
Fidei quid ultra restat? ad nutus meos  
Natura rerum cessit et fassa est Deum.  
Undae liquentis ebrios potus bibit  
Galilaea pubes, depuli alienam famem;
- 40 Meam subegi: bisque vicanos dies  
Ieiuna nullis ora violavi cibis.  
Inter secantes dextera crevit Ceres:  
Satiatus ingens populus, et toto tamen  
Plus et relictum; flabra compressit notus,
- 45 Et aestuantis ira detumuit freti.

---

V. 27. Mithras summum Persarum numen, Sol.

V. 34. Sadoci secta i. q. Saducaeorum (h. e. Iustorum.)

- Durata siccos unda transmisit pedes.  
Ferule morbi virtus et membris grave  
Arti negatum cedere humanae malum  
Vox medica vicit, longa caligo fugit,  
50 Meaeque coecus dexteræ debet diem.  
Auditur ille qui nec audivit prius,  
Silentiumque rumpit in laudes meas.  
Quid illa sanctis semper adversa et Deo  
Hostilis Erebi dira pallentis lues  
55 Non pulsa nostris legibus mortalium  
Habitata linquit pectora et vocem tremit?  
Post opera tanta non satis Christo fuit  
Prodesse vivis, victor ingenti manu  
Fregi silentum regna et inferum chaos.  
60 Terris et astris et triumphato mari  
Restabat orcus: per sepulchrales specus,  
Per operta terris iura et umbrarum domos  
Imperia misi, funeris laceri calor  
Animavit artus: mortis expulsum gelu,  
65 Retroque in auras manibus patuit via.  
Renatus ipso vivit ex tumulo cinis,  
Meumque munus spirat, at Mors arctius  
Regnare iussa, nec solens damnum pati,  
Queritur retexi fata, nec census sui  
70 Constare numerum, pro tot umbrarum grege  
Egomet reposcor victima horrendæ neci.  
Ergone tristis hora venisti tamen,  
Qua pereat orbis auctor, et letum premat  
Vitæ datorem? ruit in exitium meum  
75 Ferale tempus, quæque nunc umbrat polum

- Nox, dum citatos agitat astrorum choros,  
Breves fugacis invidet vitae moras.  
Quaecunque tandem vim parat capiti meo  
Sors dura, parcat trahere, ducentem sequor.
- 80 Impensa generi post tot humano mala,  
Post frigus, aestum, lachrimas, luctus, famem,  
Accedat unum, moriar: alienae reus  
Culpa peractus spiritum fessum exuam,  
Castusque terras tingat ingratas cruor.
- 85 Iam vaenit ingens anima, iam mortem meam  
Mercatur atrox infulatum factio,  
Scelerique pretium dicit. Exacta est mei  
Bona pars laboris: omne praesensi malum,  
Et quicquid atra nox tegit vidi tamen.
- 90 Mens ante corpus pendet, horresco nefas,  
Pressumque venis sanguinem exsudat timor.  
Quo priscus ille cordis abscessit vigor  
Diumque robur? feror in aerumnas, feror.  
Heu morte dura durius mortis genus,
- 95 Animique tristis languor, an totus perii,  
An spes salutis restat? Atque utinam patrem  
Liceat precari. Lachrimis certe meis  
Nihil negare solitus aliquantam mali  
Partem remittat, fas sed aeternum Dei,
- 100 Et praestitutus ordo venturi vetat.  
Tot ante saeculis fixa totque oraculis  
Cantata vatum nescit in finem ruens  
Flecti voluntas. Sed quid infernae moror  
Calcere echidnae virus, et torti vagum
- 105 Draconis agmen terere sublimi pede?

- Primi parentis morte sanandum est scelus.  
Morbum furentem sanguinis largus mei  
Piabit imber. Gaudeat dira nece  
Genus superstes: gaudeat mortalium  
110 Quodcumque busto restat, et gentis piaae  
Cineres sepulti, viximus viventibus.  
Moriatur in commune. Non possunt meae  
Perire clades, cuncta debemus mala  
Promissa terris, vincula et flagra et crucem,  
115 Titulumque sacrae mortis, et fastidium  
Gentis superbae. Turbine infesto tonet  
In me parentis ira, dum parcat meis.  
Ne pereat orbis, pereor: terrarum omnium  
Succedo poenis. Quisquis extremum colis  
120 Utriusque Phoebi littus, aut recta face  
Aestiva medius regna quae torret dies,  
Quique in remota noctis immensae plaga  
Glaciale plaustri sidus Arctoi vides,  
Favete sacro, poscor aris hostia,  
125 Et maius agno Pascha, nostro sanguini  
Donabit iras caede placandus pater.  
Iam plena sacrum Luna post vernaee citat  
Aequata lucis spatia: plus aliquid die  
Dies tamen videbit et perdet diem.  
130 Excors Iuda, tu licet valida manu  
Venias Quiritum cinctus et noctis metu  
Adversus unum, non tuis capior dolis:  
Prodis scientem: sponte festino mori.  
At vos magistro lecta socialis cohors,  
135 Adhuc fidelis turba, post festas dapes



Lymphasque heriles, mystico carmen sono  
 Sacrate: dumque ad nota properamus loca,  
 Ubi multa tacitis leniter suspiriis  
 Respondet arbor, quas ego ad sedes vocer,  
 140 Quae lex amoris, quam favens vobis Deus,  
 Audite euntes, interim vigiles meam  
 Durate noctem: cedat ex oculis sopor,  
 Caelo supremas donec admoveo preces.

*Chorus Iudaeorum mulierum.*

Iam vehit praeceps per aperta noctem  
 145 Mundus, et pronae properant tenebrae  
 Auream coelo redhibere lucem,  
 Non tamen ductor celeris choreae  
 Phosphorus clarum revocavit agmen,  
 Mane nec primi roseum rubentis  
 150 Buccina signum crepuere nostrae.  
 Nos apud magni penetrare templi  
 Noctis insomnes vigilamus horas,  
 Discat ut sanctis precibus piatum  
 Crastinam pectus celebrare Phoeben,  
 155 Qua iubet fruges meminisse raptas  
 Memphidos regi metuendus exul.  
 Hoc sacrum totas viduabit urbes,  
 Quaque Iordanes toties novatos  
 Ambitu certat satiare cursus,  
 160 Quaque se ripis negat et solutus

- Stagna piscosae sibi miscet undae.  
 Ire miratur Solymam colonos  
 Dactylis foetum nemus et fragrantis  
 Balsami ferrum fugiente vena,  
 165 Unde non longe lituis avorum  
 Sponte concussi cecidere muri,  
 Monsque nimbosum caput aequat astris  
 Conscius fato senis irreperti.  
 Perdidit cives prius orbe merso  
 170 Cepheos regnum, sacra fabulosae  
 Dercetus mutans meliore ritu.  
 Huc Palaestinas properare gentes  
 Vidit Azotus geminaeue Iamnes.  
 Non Idumaeos Caparorsa clausit,  
 175 Non suos Lyddae tenuere muri,  
 Non decem princeps populis Damascus,  
 Non brevi nobis sociata regno

---

V. 167. Mons sc. Nebo.

V. 170. Cepheus rex Aethiopum.

V. 171. Derceto, gr. Δερκετώ (οὐς) i. q. Atergatis  
 vel Astarte. V. Sis. Act. I, 76.

V. 173. Azotus (Asdod) urbs Philistaeae maritima.  
 Ἀζωτός. Iamne (Iabne) Ἰάμνεια, Ἰαμνία, oppidum Phi-  
 listaeae maritimum.

V. 175. Lydda (Diospolis) oppidum Palaestinae, regni  
 Israel.

V. 176. Damascus urbs Syriae ad Chrysorrhoam  
 fluvium.

- 146  
*Impii nutrix generis Sebaste.*  
*Venit et dictus populis dedisse*  
 180 *Prima scriptorum monumenta Phoenix,*  
*Quem Tyros regum pretiosa luxu*  
*Edit in lucem genitrixque Sidon.*  
*Venit et siquis Syrus inter amnes*  
*Audet intactos violare pisces,*  
 183 *Nec vagae numen metuit columbae:*  
*Belus et quorum vada concolori*  
*Turbidus vitro lavat, et vetustis*  
*Finium bellis dubitatus Arnon:*  
*Et quibus limo vada sulphurato*  
 190 *Pestifer donat lacus; hic inertes*  
*Spiritus nullos patiuntur undae.*  
*Non tulit pinnas pelago natantes,*  
*Non tulit remos mare verberatum.*  
*Odit hoc omnes animas profundum*  
 195 *Et vetat mergi, nec odore quicquam*  
*Saevius vastum minitatur aequor.*  
*Ille depastus segetem veneno*

---

V. 178. Sebaste, ante Samaria, urbs provinciae nominis eiusdem.

V. 183. Mesopotamii. Cf. Sis. Act. I, 76. Vagae numen columbae i. e. Venus Cypria vel Astarte.

V. 186. Belus, fluvius Palaestinae, Ptolemaide in mare influit.

V. 188. Arnon fluvius in finibus Palaestinae in meridiem spectantibus, Moabitis inter et tribum Rubeni fluens et in mare mortuum incidens.

- Praeripit messes: abit in favillas  
 Omnis autumnus: cinis hausit arva,  
 200 Nequa non olim meminisset aetas  
 Vindicem flammam, piceoque coeli  
 Imbre damnatas periisse gentes,  
 Cum sale infelix mulier gelato  
 Sensit in saxum riguisse venas  
 205 Impie caros miserata muros.  
 Misit aeternam sine prole gentem  
 Littus Essenum, quibus una virtus  
 Foeta commendat viduum cubile.  
 Omnis in culpa Venus: omne lucrum  
 210 Aequa paupertas; nimis o beatus,  
 Qui suum nunquam numeravit aurum,  
 Publico tantum vigil; ille nostris  
 Maior aerumnis, vitiisque maior,  
 Lege communi socialis aulae  
 215 Postulat partem famis et laborum.  
 Quot fugis sparsos in utrumque solem  
 Posteris, sero patris Abrahami  
 Colliget vesper: tamen heu triumphi  
 More solennem feriemus agnum.  
 220 Ipsa libertas semel ut recessit,  
 Quam dies primus dedit Azymorum,

---

V. 207. Littus Essenum, sc. Iudaeorum secta caelium, Nilum praecipue accolentium. Non procreabant, sed educabant aliorum filios et divitiarum contemtores omnia habebant communia.

V. 220. Libertas sc. mulierum exeundi proficiscendique Hierosolyma.

- Non redit, quamquam iugulo petita.  
Pars tenet Batti steriles arenas,  
Corniger gentes ubi fallit Ammon:  
225 Pars, ubi Nili Macetes ad amnem  
Victor aurorae stetit; an tacebo  
Carcerem nostri generis vetustum  
Coctili cinctam Babylona muro,  
Culta vel Tauri, dominumve Tybrim?  
230 Quisquis extorris decora alta gentis  
Nescit oblitus, neque saecula confert  
Immemor, longa mala mollit usu.  
Iustius sortem queritur malignam,  
Qui domi servit; miserae tenemus  
235 Semper Aegyptum, patriamque nunquam.

---

V. 222. Iugulo h. e. victima.

V. 223. Battus, Polymnesti filius, ex oraculo Delphico coloniam in Libyam deduxit.

V. 225. Macetes sc. Alexander M. victor aurorae i. e. orientis, conditor Alexandriae urbis.

V. 229. Culta Tauri sc. vel Beli Babyloniorum vel Apis Aegyptiorum vel Molochi Ammonitarum.

---

**Actus secundus.***Petrus.*

- Inimica nostro Romuli pubes Deo,  
Profaniorque turba sacrifici gregis,  
Quaeque innocentes non refugistis manus,  
In me venite vincula; en ultro reum  
5 Vereque sontem; quicquid est actum hactenus,  
Merui videndo: si quid est ultra mali,  
Merui timendo; me petenti non face  
Vincenda nox est, non Latina unum in scelus  
Miscenda templi cum satellitio manus,  
10 Non dux emendus, perfidoque amplexui  
Ponenda merces: dabitur hoc gratis caput.  
Huc huc adeste: stabitis, nec turbine  
Collapsa subito terga percutient solum.  
Dabo retorta sponte nodis brachia,  
15 Et ipse plagis vultus occurret suis.  
Saevire iam vacabit; an solae placent  
Cum scelere poenae? segnis est vester furor  
Nisi in immerentes? ratio constat criminum  
Utrinque: vobis, facta quod fateor mea;  
20 Mihi, quod negavi. Iudices sancti, quibus

---

V. 3. Construe: Et vincula, quae non refugistis innocentes sc. Christi manus.

V. 7. Me qui quaerat, ei non face opus est, non praestolanda nox est.

- Iurata testes venditant mendiacae,  
Audite facinus. Gente Galilaea satus  
Terras reliqui mariaque, ut Iesum sequar.  
Proles Tonantis vera res mortalium
- 25 Haeres paterno missus imperio regit,  
Adestque caelo liberator patriae  
Captivus ille vester, et sceptri potens,  
Quem iudicastis; impium agnosco genus,  
Ferosque mores stirpis et proavos truces.
- 30 Sic providae quietis et fati reus  
Benignioris, impias fratrum manus,  
Et dira pavidus ora respexit puer,  
Qui mox vocanti Nilon impositus solo  
Utrisque saevam depulit terris famem.
- 35 Sic lapsa ab astris mella et aetherias dapes  
Pertaeza fixis rupe Sinaea patrum  
Seditio castris praetulit Mosi Pharum  
Et servitutem; nemo vates entheo  
Impune per vos corde concepit Deum:
- 40 Sed nemo inultus. Memphis, et rabies locis  
Inclusa vastis, inque se armatae tribus  
Adeo exciderunt; mox peregrini iugi  
Mutata toties iura, et Assyriae domus,  
Aquilaque Magni, rupta cum templi sacra,
- 45 Mediaque victor aede Romanus stetit.  
Peiora restant; haec ministerio manus  
Utinam placeret; vertere infidas libet

---

V. 37. Pharum pro Aegyptum. Cf. Sis. Act. I, 8.

V. 40. Memphis urbs regia Aegypti inferioris.

- Sedes, et omni sueta sceleri viscera  
Eruere ferro. Testor infaustum nemus,  
50 Cui luctuosas Christus affudit preces,  
Quaesisse caedem, mixtus ut vestro Cedron  
Iret cruore; tela compressit mea,  
Cui tela tenui, verbaque exemplo iuvans  
Sanavit hostem. Pavidus, ut partem sui  
55 Sine se iacentem sensit, huc vertit faces,  
Visaque Malchus aure, vindicta minax,  
Et saeva quatiens vincula, incurrit manum  
Notam medelis: tactus aufugit cruor,  
Rediitque trunco pristinum capiti decus.  
80 Nocuisse Christo profuit tantum. Sed o  
Scelerata turba, vulneranti parcitis,  
Trahitis medentem. Tu quid omnes per reos  
Te, Petre, differs? si magistrum vindicas,  
A te inchoandum est. Ille tu semper ferox,  
85 Cunctas lacessens pectore invicto minas,  
Primos ad ictus, cumque fortuna, fugis.  
Rebellis et desertor et fluxa fide  
Quid non patrasti? Robori quisquis suo  
Spes credit altas, nec dolos animi timet  
70 Frustra placentis, perfidis sed viribus  
Incumbit, huc respiciat, exemplum grave  
Sortis caducae, quamque sint fragili loco  
Humana: primos usque sed punit suos  
Error superbos. Quid meis restat malis;
- 

V. 51. Cedron torrens inter Hierosolyma et montem olivarum fuit inque lacum Asphaltiten incidit.



- 75 Abominando scelere foedavi dapes,  
Potus et undas; hocne, quod tantum nefas  
Iurare potuit, ore gustavi impio  
Veneranda mensae sacra? Pro pietas, et hos  
Ergo fugaces Christe lavisti pedes?
- 80 Quis me nivosis despuens Libani iugis  
Gemino citatas capite Iordanes aquas  
Satis piarit? Tunc Callirhoes liquor?  
An vos alumnum poscitis patrii lacus?  
Non ipse Nereus, quem super Nilus ruens
- 85 Caerulea turbat ore septeno vada;  
Non illud olim quod stetit proavis fretum  
Rubente crimen abluat fluctu meum.  
A me petendus imber. Heu cessant adhuc  
Lamenta? lachrimis contumax vultus fluat.
- 90 Sic sic eundum est; verberare illiso sonet  
Crudele pectus; hi decent ictus manum.  
Miserande debes haec tuis Cepha malis:  
Quid das magistro? non ferunt luctum parem  
Quae facio, quaeque patior; ut totam occupet
- 95 Nox ista vitam, seque flendam per meos  
Dispenset annos, spiritus medios tamen  
Gemitus relinquet, nec satisfaciet malis,  
Interque luctus anima deficiet suos.  
Iam fletis, oculi? flere vos decuit modo,
- 100 Tunc cum precandi tempus: at vos languide

---

V. 82. Callirrhoe fons aquae calidae prope mare mortuum versus occidentem.

Captos veterno vetitus oppressit sopor :  
 Certe, priusquam staret hostile ad forum,  
 Ac ter negantis ora respiceret reus,  
 Alesque lucis crimina occineret mea.

- 05 Quae me recondet regio? qua moestum diem  
 Fallam latebra? quaero nigrantem specum,  
 Qua me sepeliam vivus, ubi nullum videns,  
 Nulli videndus lachrimas foveam meas.

*Pontius Pilatus. Cataphas.*

- Tarpeie superum rector, et magni pater  
 10 Mayors Quirini, quosque nunc melius colit  
 Urbs domina rerum, gentis eversae Phrygum  
 Prisci Penates, quando contingit mihi  
 Vestras ad aras trahere votivos greges;  
 Ubi tecta coelo paria et auratas trabes  
 15 Gemmis rigentes, quaeque plausu personat  
 Populus subactis iura, qui populis dedit  
 Theatra, cernam, teque terrarum arbitrum,  
 Magnanime Caesar; sive praesentem colit  
 Tua Roma supplex, proque toto quem dedit  
 20 Te poscit orbe, seu togatis coetibus  
 Te molliora regna Teleboum negant;  
 Ego nunc amicis heu procul, patria procul,  
 Honestus exul iubeor invisam polo  
 Frenare gentem, quae superbo nomine

---

V. 121. Teleboae (*Τηλεβόαι*) populus Acarnaniae, cuius pars postea Capreas Italiae insulam incolebat, Tiberii Caesaris latibulum.

- 75 Abominando  
Potus et un-  
Iurare po-  
Venerar  
Ergo  
80 Quis  
Ge  
S
- humani tegit,  
damnat, et falso metu  
abiurat deos.  
nolle: non patitur regi  
error et discors sibi,  
turba iactavit iugum  
vinci quam domari nescia.  
nostra, testor et fas et fidem,  
fluxit Hebraeas cruor:  
proterva gens et insociabilis  
audet; regna tractantes manus  
ratio saepe et invitas docet.  
visum quid sacerdotum velit  
turba, quorum trepida relligio sacro  
nostris pollui tectis timet.*
- 140 Quis ille, quem tot vincla totque homines premur  
Ipso verendus ore nec fontem ferens?  
Tu fare Solymi Caiapha princeps chori:  
Quae nuntiatis scelera, quod fertis nefas?  
Cai. Custos Latinae pacis, a summo duce
- 145 Nobis secundum nomen, adduxit sacer  
Reum senatus; scimus, haud nostrum putas,  
Obiicere poenis posse non meritum caput.  
Sed hic, magistra quos vetustas edidit  
Ritus, retroque longa defendit dies,
- 150 Convellere ausus intulit mores novos:  
Nec illud almae sedis arcanum timens,  
Templo ruinam cantat, et plenis Deo  
Minatur adytis. Septimae lucis sacram  
Turbat quietem; fasque de coelo datum,

- 35 Totumque Mosem legibus calcat suis.  
Nec stetit in illis: sidera incessit furor  
Summumque numen, plebe cum vili satus  
Palam Tonantem vindicat patrem sibi.  
Haec sunt, piari morte quae vates iubet,  
60 Qui iura tabulis scripsit in geminis decem.  
*Pon.* Postquam ira belli mater atque auri fames  
Artes nocendi reperit, et placidos suo  
Praestare poterat nulla securos quies,  
Infirma per se vita communi metu  
85 In foedus homines traxit, alternam docens  
Opem pacisci: moenia amplecti domos  
Coepere: maius inde praesidium bonis  
Subiere leges: poena respondet suae  
Aequata culpa: rexit ad auctorem malum:  
70 Iustitia ab ipso crimine exemplum petit,  
Damno rapinas ulta, caedem sanguine,  
Ut facere metuat quisque quod metuit pati.  
Maiora poenis peccat humanis, Deum  
Quisquis lacessit: magnus hunc vindex manet  
75 Quem laedit: ipse fulminanti dextera  
Tremendus orbi cur suas mortalibus  
Mandaret iras? esse nec datur impio  
Impune: vecors mentis attonitae pavor  
Exagitat illum: sentit ipsum quod negat,  
80 Et cogitur timere vim non creditam.  
Non peragit unus tale supplicium dies.  
In hoc iubetur vivere, ut nomen necis,  
Necique siquid restat, horrescat diu:  
Sin patria quiddam iura diversum sonant,

- 185 *Commissa vestrae vocis arbitrio luat.*  
*Cai.* Quamvis, avorum placita quod nobis manent,  
Donum fatemur esse Romanum, tamen  
Omnis redacta iuris est nostri necem  
Citra potestas; tu, cui magnus suas
- 190 Tradit secures gentis Ausoniae pater,  
Ius imperi tuere. Quem trahimus reum,  
Modo iam relictæ sede natalis soli,  
Ubi servat unda Caesaris nomen tui,  
Haec usque ad urbis tecta populorum agmine
- 195 Stipatus ibat, vulgus in bellum ciens,  
Nefasque clamans liberam Latio premi  
Gentem tributo; carminis magici nefas  
Stygiumque foedus astruit fraudi fidem.  
Nihil quietum patitur: excantat rogos,
- 200 Et ipsa turbat busta ferali sacro:  
Queis capta monstris turba novitatum sequax  
Dominum salutat, illius laudes canit,  
Praefertque eunti nobilem palmae comam.  
His ille studiis fretus addicit sibi
- 205 Possessa quondam sceptræ Davidis domo.  
Motu ex rebeli, qui nisi caedes viros,  
Flammae penates, vastitas agros manet,  
Cum iustus in nos saeviet Romæ dolor?  
Unum perire satius, an populum, putas?
- 210 Quin hic piæ omniump culpæ datus  
Cruore gentis redimat exitium suo.  
*Pon.* Ambigua prudens causa consilium expetit.  
Intro est eundum. Vos foris, quando libet,

Restate; vinctum milites sistent, ubi  
 15 Auditus a me iura pro factis ferat.

*Chorus Iudaeorum mulierum.*

Solymae turres regnumque vetus,  
 Cui victa tulit terra tributum,  
 Quae Niliaci finibus Isthmi  
 Procul Assyrium tendit ad amnem,  
 20 Cum procubuit tibi fuscus Arabs,  
 Mirata tuas cum venit opes  
 Decolor ustae regina plagae:  
 Tua certarunt foedera magni  
 Ambire duces, celsa Canopi  
 25 Qui sceptrata tenent, et Chaldaei  
 Late domini gentis Eoae,  
 Virtusque mari Sarrana potens:  
 Nunc heu quali sub servitio,  
 Nihil, externis nisi praeda, iaces!  
 30 Uni tellus desponsa Deo  
 Quoties quoties mutavit heros,  
 Ex quo auspiciis non coepta bonis  
 Nova creverunt moenia templi,  
 Populusque inter vincula natus

---

V. 216. Chorus constat dimetris anapaesticis acatalectis.  $\overline{\text{uu}} \text{ ' } \overline{\text{uu}} \text{ — } \overline{\text{uu}} \text{ ' } \overline{\text{uu}} \text{ —}$ . Cf. Senec. Oed. 980—997. Sed. Act. II, 201 sqq.

V. 224. Canopus urbs Aegypti inferioris ad ostium Nili.

V. 227. Sarra antiquum nomen Tyri.

- 235 Secum rediens sua fata tulit!  
Scelus Antiochi patrumque nefas  
Sedet in nostra cervice, sedet.  
Aetas quid enim dira refugit,  
Quae caelestis potuit flammae  
240 Prima silentes spectare focos,  
Fusoque suum sanguine fecit  
Sacra iratum meritura Deum?  
Ergo Ionios scelerata hominum  
Commenta deos turis acervo  
245 Placans iacuit nostra iuventus?  
Fratrum post haec tempora caedes,  
Toxica manibus mista maritis,  
Matrumque dolos, et quae nemo  
Credere posset, Iudaea tulit.  
250 Bis Romanis cessimus armis,  
Bis victores nostros victor  
Perculit alter: dominis tantum  
Fortuna levis, nos iam toties  
Transit eosdem.  
255 Deerat nostris hoc nempe malis,  
Iuga cognatos diversa pati,  
Dum pars Italas metuit virgas,  
Partes alias regnat uterque  
Fratrum proavis domita nostris

---

V. 236. Scelus Antiochi (Epiphanis) sc. profanatio templi ac religionis.

V. 258. Herodes tetrarcha Galilæae, et Philippus tetrarcha Ituraeae et Trachonitidis regionis. Cf. Luc. 3, 1.

260 Ortus Idume.

Tu spes lapsis unica rebus,  
Columen patriae, genus Abrami,  
Quem fatidico pius ore parens  
Sperare suum iussit Iudam,

265 Quem regis avi nablia cantant,  
Vindex populi tibi sacrati,  
Clausure tuos non frangenda  
Pace triumphos, tunc cum leges  
Feret unius Iudaea tuas

270 Inter famulas libera gentes,  
Quando nobis, quando toties  
Promissus ades?

Si nos vatum, quorum miseris  
Constat multa iam clade fides,

275 Nunquam in laetis carmina fallunt,  
Non tu longe. Per te sancti  
Limina templi, per iuratum  
Patribus nomen, quod lingua loqui  
Nostra veretur, consanguineos

280 Respice luctus; propera, propera,  
Sancte precamur, votisque piis  
Tandem praesens disce vocari.

---



**Actus tertius.***Iudas. Caiphas.*

- Quicumque puras scelere servatis manus,  
Me fugite longe; fugiat et qui non nisi  
Credenda peccat. Iste vultus polluet  
Etiam nocentes. Vos quibus fas et nefas  
5 Discreta, quos non tota migravit fides,  
Quibus est amicus, filius, frater, pia  
Quos mentis ullo nomine affectus tenent,  
Occludite aures; nesciat commercia  
Tam dira mundus; solus hoc norit nefas  
10 Qui vendidit, quique emit. Ubi nunc pontifex,  
Ubi dicta sacris turba, digni qui suis  
Mactentur aris? Impium cerno gregem,  
Quo peius aether me videt demto nihil.  
Audite vocis praesules notae sonos:  
15 Gratis loquemur: sive testem quaeritis,  
Habete verum: sive sontem quaeritis,  
En confitentem; prodidi vobis ego  
Animam immerentem; prodidi sanctum caput,  
Plusquam magistri; scelere non possum manus,  
20 Praeda levabo: munus ad dominos redit:  
Habete lucro perfidi pretium doli.  
*Cai.* Meritone culpes temet ac peragas reum,  
Te stabit intra cura; nec nos crimina  
Aliena tangunt: nec tibi partas opes  
25 Recipimus: a se nam cruentos respuit

- Quaestus sacrato gaza Corbonae sinu.  
*Iud.* Hoc fas et aequum vestra si pietas docet,  
 Probare facinus, execrari praemium,  
 Ibo ibo ad aras, et nefando munere  
 30 Templum impiabo; nil ibi frustra. Deum  
 Pro me precabor: vos sed ut culpa pares  
 Par poena teneat; debita haud ultra moror  
 Supplicia: dirae mortis ad nigros specus  
 Dux ille vester praeceo, vos aequum est sequi.  
 35 Coeli imperator, si nec ignavus vides  
 Humana, nec te fulmine armatum truci  
 Frustra timemus, terra quid meruit tua,  
 Quod tale monstrum portat, aut Sol, quod videt?  
 Si vetera credi genera poenarum iubes,  
 40 Accedat unum; littus eripiant mihi  
 Demissa coelo maria: me fluctus premant,  
 Et fiat hominis poena quae mundi fuit.  
 Liquefacta taedas astra sulphureas vomant,  
 Quantumque coelo est ignis, hoc una caput  
 45 Feriat ruina; quinque non tantum nefas  
 Fecere populi; pandat arcanos sinus,  
 Et inferorum claustra magnum iustius  
 Non ulta Mosem terra. Iam quicquid mali est,  
 Tuus in minora scelera consumsit furor.  
 50 In vindicando filio lentus pater,

---

V. 28. Corbona i. q. oblatum, donum. Cf. Marc. 7, 11.  
 Matth. 27, 6.

V. 45. Quinque populi, cf. Gen. 14, 2.

- Exitia machinare terrifica, horrida,  
 Nondum reperta. Facis? an haec faciet manus  
 Quod tu recusas? Dira coeligenum exulum  
 Feralis acies; nata punire impios
- 55 Et facere, quid me hostile circum sistitis,  
 Quid territatis? Iamne apud manes mea  
 Decreta poena est? venio; quam partem sui  
 Mihi saevus aperit carcer? hanc, ubi sontium  
 Pater ille, cuius non litanti dextera
- 60 Frater recentis quarta pars mundi iacet?  
 An illa poscit regio, nostrorum ducum  
 Ubi turba maior, quos super mole eminet  
 Socer infidelis, qui suo ferro incubans  
 Invidit hosti regiae caedis decus?
- 65 Placet ante cunctos ille, qui rapto patri  
 Solio superbus, perdidit moriens humum,  
 Ultrice rutilas arbore implicitus comas.  
 En digna sese monstrat ad letum via:  
 Sequor hunc; Iesum prae eo: supplicio paris
- 70 Anima anteverte sceleris eventum tui.

*Pontius Pilatus. Turba Iudaeorum.*

Horresco totus: nec quid aut sileam aut loquar  
 Decernit animus: liberant leges reum;

---

V. 59. Pater sontium h. e. Cainus, cuius dextera caesus Abel, generis humani quarta pars iacet.

V. 63. Socer infidelis sc. Davidi, Saul rex. Cf. 1 Reg. 31.

V. 65. sqq. Absalon rebellis Davidi filius. Cf. 2 Reg. 18, 19.

- Invidia damnat. Fateor, offensam timens  
 Plebis patrumque, crimen optavi datum:  
 75 Nullum repertum est; quicquid obiecit sua  
 Satis ipsa prodens odia coniuratio,  
 Silentio revicit. En illa incluta  
 Pharisea pietas: quia sub exesi fame  
 Pallore vultus et supercilio gravi  
 80 Vano, calentes ambitu ac cupidos opum  
 Animos retexit, fit nocens, spretor Dei  
 Sacrilegus: hinc tot illa scelerum nomina  
 Regnique crimen. Scilicet maris accolae  
 Inops inersque vulgus, et Galilaidum  
 85 Grex feminarum, spiritus facient duci  
 Tantos? ad istas Roma trepidabit manus?  
 At ipse regem se negat terris datum.  
 Regem fatetur, unde non ullas sibi,  
 Pugnasse dextras, cum lacertos stringeret  
 90 Popularis hostis: sed feris mortalium  
 Odiis patentes traditas partes sibi  
 Verum tuendi: studia quos eadem iuvant,  
 Paucos magistrae vocis imperium sequi.  
 Seu vera sunt haec, liceat impune eloqui;  
 95 Seu temere iactat falsa, quis mendacium  
 Capite expiavit? seu furit, poena est furor.  
 Sed et ipse, quem nunc annui cultrix sacri  
 Structum parenti traxit ad templum dies,  
 Qui iuncta fini regna Agenoreo tenet,  
 100 Famae stupenda facta narrantis fidem

V. 100. Significatur Herodes. Agenor, rex Phoeniciae, Europae et Cadmi pater.

- Frustra requirens, imperi civem sui  
Habuit satis sprevisse, nec ludibrium  
Damnavit ultra; dictus Herodi aemulus,  
Fulgente ab ipso cultus ornatu redit.
- 105 Sed innocentem bis repertum saevior  
Premit ira, metuens, credo, nequicquam scelus  
Quaerens in illo, ne suum amittat scelus.  
Animo semel praecepta proh quantam movet  
Vindicta rabiem! talis ereptam furit
- 110 Recipere praedam natus in silvis leo.  
Pudet, at metus subegit, aequum ut fraudibus  
Vellem tueri, iusque furarer dolis:  
Ceum contumacis impetum pelagi timens  
Obliqua fluctus navis oppositos secat.
- 115 Mos est vetusto, si qua Iudaeis fides,  
Veniens ab aevo, liberum quo turgidas  
Aestate ripas fugit Iacobi genus,  
Quoties renato vere Titanis soror  
Pleno refulsit orbe, populi gratiae
- 120 Unum e nocenti plebe donari caput.  
Ego iam soluta non merenti vincula  
Spe destinabam: sed meae clementiae  
Elusit artes vis sacerdotum effera,  
Quorum incitatu turba latronis petit
- 125 Vitam Barabbae; prima miscendo manus  
Semper tumultu, sanguine humano calens,  
Insontis odio factus insons, publicum  
Meruit favorem! Nunc et ancipitem metu  
Non vana carae visa turbant coniugis,
- 130 Quam nocte tota tenuit irrequies sopor:

- Meque illa iam per sacra, per superos rogat,  
 Ne iura violem, nilque peccantem hostium  
 Gratificer odiis. Ergone Hebraeos patres,  
 Et studia temnam traditae gentis mihi,  
 135 Et una vilis anima tot subito mea  
 Benefacta perdet? Clausa nunc his moenibus  
 Iudaea tota est: advenas quos ultimo  
 Ab axe misit orbis, haud capiunt domus.  
 Quid si arma vulgus sumit, et coeptas semel  
 140 Non ponit iras? scilicet iudex pius  
 Magnum merebor pace turbata decus!  
 Meliusne morti dabitur? at culpa vacat.  
 Quin ista magna est culpa, quod fieri potest  
 Materia belli; ne periculo succubent  
 5 Imperia, saepe valuit in crimen timor.  
 Spes una restat: terga iussis milites  
 Secuere flagris; si truci spectaculo  
 Se forte plebis satiet iratae furor.  
 En qualis adstat! sanguine et vibicibus  
 10 Rubent lacerti: vulnere exhaustum latus:  
 Humeros cruentos concolor vestis tegit  
 Mendacis ostri: proque serto regio  
 Utrumque tempus asperae sentes premunt.  
 Spectate miserum! *Turb.* Tolle, et hoc purga solum  
 15 Visu nefando: fige devotum cruci.  
*Pont.* Vestrumne regem? *Turb.* Nulla consortem sui  
 Patitur potestas; iuris humani arbitrum,  
 Quem Roma monstrat, colimus: unum Caesarem  
 Dominum fatemur: Caesari regnum eripit,  
 20 Regnare quisquis sperat. Atque adeo tuas

Res intuoire; quam fidem praestas hero,  
 Si te timendum praeside exemplum incipit?  
 Impune magni laesa maiestas ducis?

*Pont.* Crescit tumultus: saeviunt procerum simul  
 165 Plebisque voces: murmur incertum fremit,  
 Littorea qualis saxa ventorum. fragor  
 Primus pererrat, cum procellas parturit  
 Coeli latentis ira: diffidit polo,  
 Totoque trepidus nauta decedit mari.

170 Notus mihi iste strepitus, haec subitam mala  
 Poscunt medelam. Vos piatrices aquas  
 Huc ferte, famuli. Testor hos duos ego  
 Undae liquores, et meas testor manus,  
 Quas sordis expers imbre perfundit latex,  
 175 Nil sponte facimus: quod carens culpa perit,  
 Mea culpa non est. Iste vos teneat cruor.

*Turb.* Securus esto; quicquid huius pendere  
 Caedes meretur, sentiat nostrum caput,  
 Nostrique generis sera posteritas luat.

180 *Pont.* Ergo hic, ubi inter nobilis crustas soli  
 Surgit tribunal, iuris augusti locus,  
 Sedens profabor. Trahite damnatum cruci:  
 Servile rex Iudaeus exitium ferat.

*Chorus Iudaeorum mulierum. Iesus.*

Te te miserum plangimus omnes,  
 185 Tibi cum fletu lamenta damus:  
 Seu tu nigrae cura volucris

V. 185. Chorus habet versus anapaesticos.

V. 186. sqq. Seu tu Elias, seu redivivus Ioannes,  
 seu prophetarum unus.

- Raptus in altum flammante rota  
Sentis dominos rursus iniquos;  
Seu captivae quondam patriae  
190 Sero nimium credite vates  
Lachrimas fatis reddis iisdem;  
Seu qui nuper, post Iordanis  
Puro lotas flumine gentes,  
Nihil incestos veritus regum  
195 Culpare toros, morte luisti  
Saltatricis vota puellae;  
Seu priscorum quicumque virum  
Idem atque alius redditus orbi  
Merso vitiis consulis aevo,  
200 Sanctus certe; tua quod virtus  
Et facta probant: non tu posthac  
Denso comitum stipante choro  
Niveos mores et clara poli  
Regna loqueris: non te aspiciet  
205 Coecus sibi vix credulus ipsi,  
Vultu ignotum cernente diem:  
Non clementes fugiet tactus  
Omnibus herbis invicta lues:  
Non te vires praebente tuas  
210 Auctu tacito totidem panes  
Hominum totidem millia pascent.  
Vera exacti regula moris,  
Prope plus vita quam voce docens:  
Modo sectatrix quem turba premens  
215 Angusta nimis littora quæta est,



- Montesque sua plebe minores:  
Modo cui vestes, cui vincentes  
Pondera ramos substravit ovans  
Festo cantu nostra iuventus,  
220 (Quid non possunt fortuna levis  
Rerumque vices?) deserte tuis,  
Prodite saevo duceris hosti,  
Vindice nullo.  
Non ita dudum spes afflictis,  
225 Unaque cunctis medicina malis  
Vinctae loro cessere manus.  
Per quem muti potuere loqui,  
Nunc ecce taces. Repetit plagas  
Aperitque novo verberare sulcos,  
230 Nobisque suas venditat iras  
Romana cohors; en membra fluunt:  
Nulli proprius dolor est parti,  
Sed confusos abit in rivos  
Unum toto corpore vulnus.  
235 Fatine etiam tute minister,  
Poenaeque tuae portitor ibis?  
Quis migrantes habitare domos  
Consuetus Arabs, regnansve cava  
Rupe tyrannus tam dira iubet?  
240 Necet o utinam pressum ligni  
Feralis onus, membra fatiscant,  
Rumpatque labor tenui haerentem  
Limite vitam; votum fuerat  
Sic posse mori; quantis eheu  
245 Servare malis! Fers ipse crucem,

- Quae te quae miserande feret!  
*Ies.* Ne, Iudaeae, ne me nimium  
Plangite, matres; vestro generi,  
Vobisque istas Solymae lachrymas  
250 Servate, nurus, quibus exitium  
Triste minatur funesta dies.  
Venient annis tempora paucis,  
Cum foecundos uteri mulier  
Questa tumores, dicet solas  
255 Esse beatas, quas maternos  
Nulla liquores pignora poscunt:  
Cupiet tota cum rupe tegi  
Misera, et magnos sidere montes.  
*Chor.* Eheu dirae victima morti,  
260 Non nos iterum visurus abis.  
Non te leti porta remittet,  
Qualis nuper tibi clamatus  
Sensit sensus esse reversos,  
Venasque tua voce solutas  
265 Iterum ferme riguisse metu,  
Simul oblitum venit in orbem  
Nigro surgens Lazarus antro:  
Cum Sadoci domus errores  
Malesana suos certo vidit  
270 Teste refelli.  
Pauci raro munere coeli  
Potuere aliis reddere vitam,  
Se nemo sibi.

**Actus quartus.***Nuntius prior. Chorus Iudaeorum mulierum.**Nuntius alter.*

Tandem execranda, barbara, infanda, impia  
 Facinora fugi, nec satis fugi tamen:  
 Quodcunque vidi, sequitur, et totum scelus  
 Oculis oberrat. *Chor.* Testis an certus venis,

5 Supplicia vatis dira Galilaei ferens?

*Nunt. pr.* Si qua est sub oras gens relegata ultimas,  
 Quae coelum et astra mariaque et terras Dei  
 Ignara cernit, pellit ubi caedes famem,  
 Et mensa similes ponit epulanti dapes;

10 Non ista faceret. *Chor.* Neminem insontis viri  
 Igitur misertum est? nemo ad haec gemit mala?

*Nunt. pr.* Sane misertum est: sed magis fera non fuit  
 Saevitia quam dum parcit. Urgebat nimis  
 Exangue corpus pondere attritum suo

15 Infamis arbor, morsque iam steterat prope:

Sed lenis ille militum populus vetat  
 Miserum perire, socius aerumnae datur  
 Libyes creatus urbe Theraea Simon.  
 Non illum amata ruris angusti quies

20 Defendit: urbis vitia fugientem, premunt

Urbis furores: tractus ergo non suo  
 Succedit oneri, nequis ambigeret trahi  
 Et immerentes. *Chor.* Pandè iam totam simul  
 Faciem malorum; fare quis poenae modus,

---

V. 18. Thera, insula prope Cretam, cuius urbs Eleusis.

- 25 Quas vis dolorum rupit in voces; cupit  
Animus quod horret scire; ne parce auribus,  
Timor ipse finxit quicquid audiri potest.  
*Nunt. pr.* Quae pars ab urbe frigidis Boreae patet  
Proiecta flabris, cognitum bellis iter
- 30 Et certa semper cladibus nostris via,  
Haec ipsa dirum Golgothae tollit iugum.  
Non flore collem pingit herbescens humus,  
Non laeta obumbrat arbor: albens ossibus  
Taboque sordens squallet humano solum.
- 35 Iacent nocentum non sepultae corporum  
Putres reliquiae; quisquis aut ferro impius  
Iugulum parentis hausit, aut matri suos  
Foetus regessit, quisquis in fratris necem  
Legit venena, quisquis ignotum hospitem
- 40 In nemore solo pabulum posuit feris,  
Hanc morte sedem meruit; agnoscunt suos  
Tot scelera manes. Haec ubi infausta in loca  
Vir Nazarenus languidum erexit gradum,  
Praebetur aegri pectoris solatium
- 45 Qui lachrimosis editus myrrhae comis  
Latex amarus dulce condivit merum.  
At vix Iesus ore dignatus suo  
Inane munus, respuit poenae moras,  
Luctuque forti totus incumbit malis.
- 50 Iamque ecce ruptis pervios venis pedes  
Ferrum premebat: brachia in partes duas  
Diducta: gemino vulnere adstrictae manus.  
Dum tanta patitur monstra, dum tellus abit  
Surgente trunco, deque sublimi rubens:

- 55 Destillat imber, nulla tormentis viri  
Donata vox est, donec infixus solum  
Stipes momordit. Tum, velut coelo suo  
Sic propior, ora pariter atque oculos levat,  
Et posita inter tanta (quis credat?) mala
- 60 Miseratur alios, et magis flendos putat  
Quibus ista licuit facere, proque ipsis timet,  
Rensque veros falsus absolvit reos:  
Ignosce, clamans: magna delinquant, pater,  
Sed inscientes. Militum interea ferox
- 65 Et sueta praedae turba, non visu trucidis  
Poenae moveri: nescius flecti rigor  
Expulerat hominem; spolia nunc etiam petunt:  
Nec opperiri fata morituri vacat:  
Viventis et cernentis exuvias iuvat
- 70 Secare: magna pars voluptati ferae  
Spectator ipse est; ludit in parvo furor,  
Virique cultus pauperes in quattuor  
Ivere dominos; una textu simplici  
Quae se tenebat, dividi vestis negans,
- 75 Adiudicanda sorte, casus arbitri  
Munus pependit. Non minus poena fuit  
Et hoc, tueri compares poenae duos,  
Quos saepe sera nocte praedonum duces  
Timuit viator devio abstrusos specu.
- 80 Hos inter ipse positus ambiguum facit,  
Illisne maior debeat populus necem,  
An sibi salutem; signat illos caedium  
Numerosus index; tale de medio nihil  
Cum turba legeret, quaerit et scire expetit,

- 85 Quod culpa nomen, poena quem titulum ferat.  
Stabat super pendentis obliquum caput  
Triplices tabella vocis ostentans notas,  
Inscripta quales charta, quae Solymos docet  
Caeleste sacrum, crescit in dextrum latus,
- 90 Quibusque sollers Graecia in famam suas  
Dimisit artes, et quibus leges datas  
Mundus Latinae praeda virtutis tremit.  
His sensus idem: nomen et patriam ferunt,  
Ipsaque regem gentis Hebraeae vocant.
- 95 Postquam dolentis ore se pavit diu,  
Huc torsit oculos saeva gens antistitum,  
Et reperit aliquid tanta patienti mala  
Quod invideret; tollat adscriptum decus  
Praeses rogatur, ne vel ipsa vindicet
- 100 In morte regnum, seque privatum neget  
Occidere, verbo factus imperii potens.  
At ille durus perstat, atque hominis modo  
Donare vitam facilis, hoc tandem negat.  
*Chor.* Dum misera longos vita cruciatus trahit,
- 105 Quo populus adstat ore, qui circum sonus?  
*Nunt. pr.* Non una facies: dissonae voces strepunt.  
Pars moesta vultu ac corde defixo stupet:  
Pars morte lenta fruitur, et quantum potest  
Extendit iras; motuum discordia
- 110 Alit ipsa motus: namque miranda vice  
Tristes acerbos lachrimae risus movent,  
Risusque lachrimas. Fine Galilaeo procul  
Comites secutae limen ad templi sacrum,  
Modo quas ministras vita, nunc testes habet

- 115 Mors saeva amici, quo, licet solo, fidem  
Praestant, dolendo. Lacerat haec vestis sinus,  
At haec capillos, alia nudis ubera  
Plangit lacertis; illius longe cavis  
Resultat antris gemitus; hanc fletus rigant.
- 120 Stat ante cunctas moris exemplum pii  
Pudica mater, lachrimas cuius tenet  
Cernique prohibet dolor ineluctabilis.  
Quo vertat oculos nescit: an figat solo?  
Qua misera mente sanguinem aspiciat suum
- 125 Terra fluentem? levet in altum lumina?  
Dira videbit peste convelli ac trahi  
Quos peperit artus; cernere alterutrum timens  
Utrumque cernit, seque permittit malis.  
Propius parabat ire et amplecti arborem,
- 130 Sed haeret aegrum corpus, et medios gradus  
Pedes relinquunt. Ipsa vox frustra exitum  
Quaerit, potestque prope videri tristior  
Pendente nato. Claudit huic sanctum latus  
Bis sex sodales inter adamatus pio
- 135 Iuvenis magistro. Triste ut aspexit iugum,  
Animasque dulces non minus vita, sibi  
Dum vita mansit, sentit ille aliam crucem,  
Graviusque torquet ille spectatus dolor.  
Sed utroque tandem fortior longi moras
- 140 Rumpit silenti. Sume depositum meum  
Uterque: natum mater hunc pro me tibi  
Posthac adopta: tuque Zebedaei puer,  
Quae fuit amici: nunc tuam matrem puta.  
Haec fatus iterum flexit in poenam caput.

- 15 At parte in alia verticem miles quatit,  
Nostraeque gentis vulgus, et gentis patres.  
Tunc ille, clamant, qui sacram rueres manu,  
Idemque terna luce relocares domum?  
Ostende vires. Ipse si tanti facit,  
50 Suamque sobolem magnus agnoscit pater,  
Nunc opifer adsit, spesque confirmet tuas.  
Per te data aliis ecquid auctorem suum  
Salus refugit? rumpe ferrum et vincula,  
Descende trunco: petitur haec regni fides:  
55 Iam te sequemur. Nec satis scindi probris  
A stante turba fuerat. Est qui stipite  
Suspensus, animum nunc quoque homicidam probat,  
Nec fieri in ipsa desinit poena nocens,  
Ac sic profatur: Ille si credi cupis,  
60 Quem Deus Hebraeae gentis elegit ducem,  
Nos teque serva. Non tulit vocem impiam  
Culpae necisque socius, et tandem ferum  
Ponens latronem: Nondum, ait, disces Deum  
Et fas vereri, iusta quem legis sacrae  
65 Vindicta deprehendit? et peccas adhuc  
Iterum luenda? Nostra debent crimina  
Quodcunque patimur. Iste quid fecit mali?  
Versusque ad ipsum: Parce, te, misero, precor,  
Mihi rex, mihi que dominus, et laetum tua  
70 Cum te tenebit aula, sis nostri memor.  
Ille annuit benignus, eque ipsa cruce  
Largitur astra: Mecum, ait, mecum sacros  
Tenebis hortos, veris aeterni loca,  
Beatus hospes, antequam lucis parens



- 175 Aurora referat crastinum terris iubar.  
*Chor.* Quid hoc? repente subsilit motu solum,  
Et stare tellus nescit; auratos tegens  
Sol ipse vultus limite ignoto fugit.  
Et saeculorum lege contemta diem
- 180 Abrumpit aether, noxque luci debitas  
Invadit horas. Dira quas portant minas  
Prodigia? quanto est omnibus maius malum,  
Quod nec sui meminisse naturam sinit?  
Sed feriit aures cursus haud longe pedum.
- 185 Tu quisquis ille es, quem satis nosci vetat  
Caligo mundi, tam graves imple metus,  
Aut solve. *Nunt. alt.* Periiit: habuit eventum furor,  
Damnatis astris, quemque, si possit, velit  
Et terra fugere. *Chor.* Nil queror. Lucem tibi
- 190 Coelum remitto. Tu tamen, quando loqui  
Nobis relictum est, mortis effare ordinem.  
*Nunt. alt.* Ut crescere umbras iussit, et medio aetheris  
Cursu peracto longius Titan suos  
Respexit ortus, igneae sensim comae
- 195 Periere: nulla nube praeductum caput  
In se recessit; quarta restabat polo  
Iam pars diei, si tamen fuit hoc dies.  
Audita vox pendentis, haud qualem halitus  
Inter necem vitamque deprensus daret,
- 200 Sed fortis et sonora: Quid Deus o tuum  
Me derelinquis? Turba crudeli ioco  
Hoc ultimum fruitura, Thesbitae peti

---

V. 202. Thesbitae vatis i. e. Eliae prophetae. Cf.  
3 Reg. 17, 1.

- Auxilia vatis, ore mentitur fero,  
Iamque adfuturum quantus aut ignem aut aquas  
205 Coelo poposcit. Ille sed contra nihil:  
Tantum cruore exhaustus et fractus malis  
Sitim fatetur. Vase defusus latex  
Amarus avidos spongiae laxat sinus:  
Premit fluentem purus hyssopi viror,  
210 Quem levat in altum dextera adstantis viri  
Protenta arundo. Tincta ferali mero  
Ille ora rursus aperit et clarum intonat:  
Habuere finem cuncta: nunc animam hanc tibi,  
Tibi hanc ego animam magne commendo pater.  
215 Haec dum profatur, spiritus verbis comes  
Prorumpit una, nilque sensuros cruci  
Artus relinquit. Ille iam liber tenet  
Quamcunque sedem fortiter miseris Deus  
Adscripsit; at nos perduto orbis sidere  
220 Infamia agitant monstra: nos peragunt reos  
Superi inferique; namque et umbrarum vaga  
Cursat per urbem turba, quam sedis suae  
Incerta tellus intimo eiecit sinu:  
Laxata hiatu saxa deformi patent,  
225 Latumque functis fecit ad vivos iter  
Compage rupta tumulus: unum manibus  
Coelum sepulchrum est; rediit antiquum chaos  
Non legis aequae gnara, non patiens vicis,  
Sed qualis ante conditam lucem fuit,  
230 Nox atra populos intulit terris suos.  
*Chor.* Sed inter haec portenta quae circum crucem

- Mens plebis? Ecquis vultus astantum fuit;  
*Nunt. alt.* Lamenta fletu mixta foemineo sonant.  
 Tum siquis ipsi notus et vitae comes  
 235 In morte adhaesit, ingemit tenebris diu,  
 Piasque coelo tendit erepto manus,  
 Queriturque, tantum facere dum licuit nefas,  
 Mansisse solem; magna nec vitae satis  
 Sibi certa turba est: parsque se, pars mortuum,  
 240 Pars luget orbem; cecidit Ausoniae furor  
 Saevus catervae: pacis ignarae manus  
 Torpent, et arma gelidus excussit pavor.  
 Dux ipse centum solitus imperio viros  
 Frenare, iniqua iurat extinctum nece  
 245 Heroa, cuius ipsa se tellus neget  
 Perferre poenas horrido motu gemens,  
 Quem luce cassum lucis aeternae fuga  
 Coelumque moerens asserant coeli genus.  
*Chor.* Quis iste turbae cursus ad limen sacrum?  
 250 Nam causa in illis quaelibet credi potest,  
 Nisi sola pietas, hisne tam impuris Deo  
 Litare sperant manibus? *Nunt. alt.* Horrendum, nova  
 Prodigia et istuc vulgus attonitum trahunt.  
 Namque ille pendens trabibus auratis tapes  
 255 Multiplicis ostri, scissus in partes duas  
 Totus recessit: prodita est sacri fides,  
 Vacuumque Hebraeae gentis arcanum patet.  
 Fatalis illa gentium quondam tremor  
 Sacrata Mosi cista, cui denas datum  
 260 Servare leges, gemina quam volitans super  
 Umbrabat ales, quemque foecundo cibum

- In castra rore fudit exemplo novo,  
Docens quietem septima nubes die,  
Et virga cuius flore compresso ambitu  
265 Sibi victor Aron cidaris asseruit decus,  
Templi illa veteris decora quae fuerunt prius,  
Periere dudum: magno in adyto cernitur  
Nil praeter adytum: quicquid ignotum magis  
Timuere saecula, panditur: flammis micans  
270 Facibusque templum parte seposita sui  
Admisit oculos, sive relligio feros  
Pertaesam mores fugit et cerni dedit  
Penetrabile nudum, sive contempto loci  
Horrore sola mente vult numen coli.  
275 *Chor.* Positum poenis fine quem mors attulit  
Natura tandem valuit, et tellus parens  
Exanima placido corpora exspectat sinu?  
An nuda pendent membra, et aspectu impio  
Sacrae profanant vesperam noctis ducem?  
280 *Nunt. alt.* Animos feroces sera relligio subit,  
Ne non paratos praevia insignis sacri  
Deprendat hora. Pontium accedunt ducem:  
Laceros cruentis deripi crucibus rogant  
Artus, priusquam victima Aegypti memor  
285 Festaeque puras poscerent epulae manus.  
Reis duobus, media quibus vitae ac necis  
Haerebat anima, crura saevis ictibus  
Illisa, dirus ossium mugit fragor,  
Simulque tenues spiritus rumpit vias.  
290 Nec magis Iesu fata iam functo sua

- Cohors pepercit Latia, sed vita vacans  
Tremante miles lancea incursat latus.  
Patuere ferro viscera, et apertis aquas  
Venis micantes mixtus effudit cruor.
- 295 Sublata postquam corpora, et vacuae cruces  
Stetere, vultu turba non uno fugit,  
Pars moesta, pars attonita; quo ruitis viri?  
Mactandum ad agnum? vilis haec nimium hostia est:  
Mactastis hominem. *Chor.* Fallit ambiguus dies:
- 300 An triste vulgus tueor, et muliebribus  
Laniata palmis pectora, et flentes genas?  
At inde tardo miles Ausonius gradu  
Trepidans ad altos praesidis tendit lares.

*Chorus Romanorum militum.*

- O qui perpetua vectus in orbita
- 305 Curru flammifero tempora dividis,  
Ad cuius radios noctivagus chorus  
Vultu diffugiunt sidera pallido,  
Qua nunc parte poli luminis arbiter  
Interceptus abes? quae tenebris via?
- 310 Quis surgit medio vesper ab aethere?  
Nondum te Tyriis navita Gadibus  
Stridentem Hesperiiis fluctibus audiit:  
Non coelo rutilas surripuit comas  
Nubes imbriferis foeta madoribus:
- 315 Non interpositis Luna iugalibus

---

V. 304. Chorus constat metro Asclepiadeo primo.

V. 311. Gades urbs Hispaniae, colonia Tyrriorum.

- Fraternis hodie visibus obstitit;  
 Quae furtiva procul lumina colligens  
 Pleno circuiit cornua circulo.  
 An captum magico carmine Thessalae  
 320 Te vinxere nurus? quis Phaethon novus  
 Ignaris manibus frena regens equos  
 Egit signifero tramite devios?  
 Quod factum scelus est, quo meruit diem  
 Nondum nocte data perdere saeculum?  
 325 Ut cum visceribus viscera condidit,  
 Implevitque suis pignoribus patrem  
 Ieiuni soboles effera Tantalī:  
 Aut cum sacrificae filius Iliae,  
 Terrarum domini conditor imperi,  
 330 Cum vita pariter funera perdidit,  
 Divisus lacero corpore centies.  
 An praescripta polo tempora finit  
 Natalis superum qui fuerat dies,  
 Et quo stare prius desierant loco  
 335 Hinc nunc astra negant currere longius?  
 Quae natura tui poena placet tibi?  
 Quo moles rapitur tanta? quis exitus?  
 Seu terras iterum fluctibus obruis,  
 Seu flammis dabitur vasta licentia,

---

V. 327. Sc. Atreus, qui Thyesti fratri suo coctum apposuit filium.

V. 328. Iliae i. e. Rheae matris Romuli, qui a senatu centum virorum, quem instituerat, cum acerbius regnaret, in concilio est discerptus.

- 340 Ibit qui pelagis quod feret omnia?  
 Supremos cineres quis cinis hauriet?  
 Quodcunque est solitum quod novat ordinem,  
 Non est hoc hominis, non populi malum:  
 Aut mundus patitur triste periculum,  
 345 Aut mundi dominus. Rursus an impia  
 Titanum rabies fulmina provocat?  
 An Pythone malum saevius exstitit,  
 Lernaëaque draco peste feracior  
 Coelo vipereas opposuit minas?  
 350 Ecquis nunc patrio fletur in aethere  
 Pressus morte Deus progenies Dei,  
 Donatore meri largior Euio  
 Prosternente feras fortior Hercule,  
 Intonso medicus maior Apolline?  
 355 Nobis praecipue nox gravis incubat.  
 Gratus quippe Deo sanguis et innocens  
 His fluxisse locis creditur; hoc fuit  
 Quod tellus tremuit, quod puduit diem.  
 At tu summe parens aetheris artifex,  
 360 Iratus vitiis, nec rigidus tamen  
 Confessos venia pellerè supplices,  
 Humani generis crimine perditum

---

V. 340. H. e. quomodo ibit pelagis continens, quae ferre omnia debet.

V. 347. Python serpens natus ex putredine terrae post diluvium Deucalionis (Ovid. Met. I, 438), quem in Parnaso monte Apollo (Pythius) sagittis interfecit. Hom. Hymn. in Apoll. 300. 372.

V. 354. Apollo inventor artis medicae. Eius filius Aesculapius.

- Mundo redde diem. Par semel omnibus  
 Unum flagitiis quaere piaculum  
 365 Quod non Threiciae relligio Sami,  
 Intellecta feris non cecinit lyra,  
 Non glebae soboles fatidicus puer  
 Tyrrhenos monuit doctor aruspices.  
 Idem nostra cruor crimina diluat,  
 370 Quem nullo meritum crimine fudimus.  
 Hoc placatus ades sanguine mitior,  
 Et pro tot populis sontibus unicum  
 Insons sume caput; non potuit dari  
 Aris ulla tuis dignior hostia.

---

### Actus quintus.

*Iosephus Armathensis. Nicodemus.*

- Spectate cives: Pontii munus fero:  
 Ut condant hominem terra et humanae manus,  
 Prece obtinendum est; nescit Ausonium genus  
 Vel sponte recte facere, vel gratis male.  
 5 Omne est in usu facinus: his mortem imputant,  
 Illis sepulchrum. *Nic.* Parce vanis vocibus,  
 Iosephe, vel, si iusta tam dulce est queri,  
 Dimitte Romam, quaere propiores reos.  
 Quem plangis, hunc non Romuli occidit genus,

---

V. 365. Samothrace, v. Samothracia insula prope Thraciam, Cabiromum nobilitata sacris.

V. 366. Orpheus, mysteriorum auctor Eleusiniorum.

V. 367. Bacchus, Cereris vel Proserpinae (h. e. terrae) filius, Dionysiorum conditor.



- 10 Sed Abrahami. Vera quis senta explicet  
Oraculorum et legis e coelo datae,  
Quem mente tota maior inspiret Deus,  
Quis dux perennes certior monstret domos,  
Pilatus ista curat? an Latio innocens.
- 15 Sub teste cecidit? criminis falsi artifex  
Italum senatus, an sacerdotum fuit?  
Iudicio in isto Caesarine an Caiaphae  
Obtemperatum est? transferas culpam licet,  
Iudaea certe corda et ora, oculi quoque,
- 20 Homicidium fecere: quod superest nefas,  
Hoc est Quiritum. Quam bene Hebraeis Deus  
Manibus pepercit! hoc quoque Italo militi  
Invidit aliquis, et scelus mallet suum.  
Servire adhuc nos querimur? en caedem impiam
- 25 Impune licuit facere; quid? facere, inquit?  
Licuit iubere. *Ios.* Nicodeme, unis ego  
Devoveo diris Iliæ et Saræ genus.  
Pereant utrique. Tam diu quid fulmina  
Cessant et imber piceus et mare pestilens?
- 30 Quid Sodoma tantum meruit? Haud ultra tui  
Me, patria, miseret. Saevior Babylonio  
Victore victor veniat, et castris premat  
Urbem cruentam; bella si non sunt satis,  
Foecunda morbos seminet morbis lues,
- 35 Interque damna crescat; accedat fames;  
Nullos recuset impotens rabies cibos:  
Cunis in ipsis vagiens ferrum tremat  
Infans patrum: redeat in matrem puer.  
Dum verberantur moenia incussu gravi,

- 40 Quaeratur hostis intus, et discors sibi  
In se arma vertat populus, in templum faces:  
Cognata dirimat agmina obsessor ferus,  
Flammisque et ense Solyma vastet moenia,  
Trahatque domina compede Isacias nurus:
- 45 Nec vincla solvant septies anni decem:  
Populos per omnes miser et immiserabilis  
Captivus erret populus: hunc iuris sui  
Nulla ora, reducem nulla conspiciat dies.  
Haec firma manéant vota; nil moror hoc solum,
- 50 Quod ne premam ultra, nulla tam gravis est fuga  
Quam non capessam: vel si Hyperboreo procul  
Subiecta plastro littora extorrem vocent,  
Quae refuga fluctu Thetis ambiguo ferit.  
Erit ille patria qui patet vero locus.
- 55 *Nic.* Hic inter alios foedus humanum genus  
Insedit error; facta quis culpât sua?  
Aliena quis non? magna pars non crimina  
Damnat, sed homines, dispari sententia,  
Aliis severi indices, faciles sibi.
- 60 Nos, quia profana voce non addiximus  
Morti immerentem, iura nec contra et fidem  
Scripsit cruentum nostra decretum manus,  
Nobis placemus, magna ceu virtus foret  
Non esse magni conscium sceleris sibi:
- 65 At si fatemur vera, quis forti virum  
Defendit ore, quisve corrupta arguit  
Livore saevo iudicum suffragia?  
Quis commodavit legibus vocem suam?  
Sic victa pietas fasque, dum sanctum caput

- 70 Illi loquendo, nos tacendo prodimus.  
Cum nil timentes feminae illius palam  
In nomen irent, nos magistrum agnoscere  
Segnes pavori noctis umbram obtendimus.  
Iosephe, tandem nostra sese aperit fides,  
75 Sed in peremtum. *Ios.* Vera tu, fateor, mones.  
Sed ille rapiens redditum vesper diem  
Cura peragere iusta nos vigili iubet.  
Non longe ab ipso Golgothae infamis iugo  
Subter virentes arborum tegitur comas  
80 Purum recensque rupis excisae cavum,  
Nondum occupata manibus sacris domus.  
Tumulum senectae nuper electum meae  
Nunc melior hospes habitet; insignis viri  
Notet sepulchrum magnus hiscenti lapis  
85 Oppositus antro. Quis scit an mox sanctor  
Adveniat aetas, turba cum hanc sedem frequens,  
Et flexa regum capita, pro templo colant,  
Dignamque credant et mari et ferro peti?  
*Nic.* Aqua pura fontis, vosque odorifera e plaga  
90 Cari liquores; saeva quos tumuli fugit  
Tabes edacis, tingite hos vultus pios,  
Intrate penitus ora. Non Deus hoc sinat,  
Non fata, morti liceat ut quicquam amplius  
Istos in artus. Siqua relligio inferis,  
95 Non foeda tabes ossibus nudis fluet,  
Nec corpus illud ulla dissolvit dies.

*Iohannes. Maria mater Iesu.*

Veneranda virgo, certa progenies ducis  
Sub iura cuius ivit Euphratis vadum,  
Quicquid rubentes inter et fluctus iacet,

- 100 Utcunque casus asperi mentem premunt,  
Evince luctus, sume avitos spiritus,  
Regum ille sanguis: Fata te in tuto locant.  
Fortuna vires ipsa consumpsit suas  
Toties nocendo; post patrum raptas opes,  
105 Translataque olim sceptrata in externas manus,  
Quod te vetaret esse securam, fuit  
Res una, natus; ille te absolvit metu:  
Timere iam nil orba paupertas potest.  
*Mar.* Lugere vobis forte, Iohannes, novum est:  
110 Ego nata in hoc sum: ter decem annis amplius  
Non aliud egi; nulla me species mali  
Fefellit: ex quo casta coelesti satu  
Detumuit alvus, dira mihi, dira omina  
Cecinere vates: vidit haec Simeon senex,  
115 Imaque in anima vulnus aspexit meum.  
Cum lancinatos inter infantum greges  
Peteretur unus regio ferro puer,  
Nondum ille tantis fecerat miraculis  
Sese invidendum: perfidos nondum dolos,  
120 Et ficta quicquid turba Pharisei tegunt,  
Ipse arguendo traxerat caput in suum:  
Spretor sacrorum, civica armorum tuba  
Nondum audiebat: una adhuc erat illius  
Culpa, esse natum; non tamen me terruit  
125 Ferus ille dominus et suis etiam nocens:  
Non similis haeres, cuius instruxit dapes  
Cervix recisa vatis, et amoris impio  
Donatus oculos pavit incestos cruor:  
Non plebs recusans liberas voces pati,


- 130 Et mille manibus saxa iaculatus furor.  
Instare nullum credidi nobis malum,  
Quo maius esse poterat; exemplo carens,  
Quod nulla genitrix timuit, hoc solum fuit  
Ego quod timerem. Misera, num voces meo
- 135 Quaeram dolori, potius an lactus premam?  
O magne (namque hoc credo nunc etiam) Deus,  
Cur ad minora regna venienti mea  
Tibi placuit alvus? cur ego ad poenam tibi  
Electa mater? nulla certe foemina
- 140 Quae peperit hominem, quae virum fecit patrem,  
Tam saeva passa est; nulla progeniem parens  
Melius adepta est, nulla peius perdidit.  
*Ioh.* Quis maior aures planctus assuetas ferit?  
Quod corpus istud, Tyria quod velo tegit
- 145 Candente sindon? ille quis venas senex  
Adhuc fluentes imbre odorato rigat?  
Quis adstat alter? impetu quanto ruit  
Muliebre vulgus? Fallor, et moestos genis  
Subito micantes lachrimae vultus gravant.
- 150 An vera video? Mater, illi artus tui,  
Tuus ille sanguis; i, rape extrema oscula:  
Imple parentem: filii hoc restat tibi.  
*Mar.* Anima heu longis defessa malis  
In maiores suffice luctus,
- 155 Dum crudeles apud exequias  
Suprema dolor munera solvit.  
Liceat niveum tollere peplum,  
Carosque semel cernere vultus.  
Tunc ille miser? talemne tuus

- 160 Mihi te populus nate remittit?  
Talem Solyme spectare iubet,  
Solyme cordi dilecta tuo?  
Video fossum mucrone latus,  
Et traiectas vulnere palmas,
- 165 Et qui ferro patuere pedes.  
Melius melius Phoebe latebas:  
Quid ad haec nobis monstranda redis?  
Gens aetherei conscia motus,  
Vosque inprimis, quorum pietas
- 170 Partus olim venerata meos,  
Coeli inversas cernite leges:  
Illum mecum lugete, magi,  
Quem signavit nova lux gentium,  
Tenebrae occisum docuere novae.
- 175 Spes afflictae sola parentis,  
Quo non piguit vivere vivo,  
Nobis rediit modo rapta dies,  
Te demersum nox alta premit.  
Utinam planctus, utinam notas
- 180 Matris lachrimas nate videres!  
Ego sum thalamis intacta parens,  
Quae te verbo foecunda tuli,  
Onus ignotum, cum virginei  
Stupere sinus, mirique novem
- 185 Crevere tuo pondere menses.  
Ego sum, cuius iam maturo  
Ventre labores lare sub tenui  
Regis proavi patria vidit.  
Hoc tibi fluxit de fonte liquor;

- 190 Hoc sedisti sarcina collo  
Pelusiaticis advena regnis,  
Pharos exiliis cum fida tuis  
Veteris culpa probra redemit.  
Iudae soboles Memphide peior,  
195 Si iam finem cepit rabies,  
Et te, nostri miserere potest,  
Longas mortis mihi deme moras:  
Aut si natus nondum satis est,  
Adiice matrem.
- 200 O nate nate, quicquid hic oculi vident,  
Hoc quod pependit, quod mori potuit, meum est,  
Meumque totum: nullus in partem venit  
Genitor, nec alter vindicat quicquam tui.  
Ergo omnis uni pectori incumbit dolor,  
205 Quod te aluit et te gessit. Ingratus bona  
Nescivit orbis, damna nec sentit sua.  
Inops et indefensus obiisti necem,  
Et nunc iaces inultus; ex illis quoque,  
Te dante gressus qui receperunt suos,  
210 Nemo accucurrit: ipsa nec turba aureae  
Ignara lucis ante contactus tuos  
Ad te videndum venit: atque aliquis cui  
Per te redivit vita te patitur mori.  
*Ioh.* Vera ista quereris, vera; nos toto cohors  
215 Electa mundo filii comites tui  
En unde, quo decidimus? in nobis scelus  
Omne est repertum; noster est qui vendidit,  
Et qui eieravit: nec nota quisquam vacat:  
Fugere cuncti. Doctor o veri unice,

- 20 Amore nobis frater, imperio parens,  
Ignosce lapsis: ille ego ante alios tuus.  
Ego quem sacrato nox recumbentem sinu  
Hesterna vidit, si quid affectus habes  
Veteris, per illum, domine, te affectum rogo,  
25 Perque hanc parentem, cuius in curam tibi  
Ego dictus haeres; hanc ego ex aequo miser  
Solandus ipse solor, ut possum tamen.  
Iam parce mater luctibus iustis quidem,  
Sed temperandis, et tuis fulci bonis  
30 Animum labantem. Laudibus crevit tuis  
Antiqua vatum charta; te caram Deo  
Terras per omnes nulla non aetas canet.  
Senioris aevi decora, quam longe tibi  
Cessere, matres? nulla sic genuit parens,  
35 Et nulla tantum. Foeta in aetate ultima,  
Quae temere risi sensit oracli fidem,  
Et illa genitrix, cuius in Pharia puer  
Proiectus alga vincere undarum minas  
Iam didicit infans, prole non certans tibi.  
40 Exigua loquimur. Ipse te observat polus:  
Festae tenebras noctis irradians face  
Coelestis aulae turma parienti adstitit,  
Cunasque adorans igneus superum chorus  
Genitale cecinit carmen, et nixus sacros  
45 Imitatus aether astra parturiit nova.  
*Mar.* Fugiunt dolores; laetior praecordia  
Subit ille motus, quem pudico pectore  
Puella sensi, cum mihi interpretes Dei  
Sponpondit uterum, fataque extimuit diu



- 250 Tam magna, matrem gerere vix docilis, pudor,  
Maiores iam prospicio, et ante oculos meos  
Omne est futurum. Nate tu vadis pias  
Nunc inter animas maior: assurgit tibi  
Sanctus parentum populus, et coelum suo
- 255 Debet nepoti. Iam tuos mors pallida  
Sequitur triumphos, dum remolito novus  
Exis sepulchro; non diu terris tamen  
Spectandus, en mox totus ad patrem redis.  
Inde ex superna sede pacatis bonus
- 260 Das iura populis: mille te linguae colunt:  
Nec meta regno: trans et Oceanum tonat  
Phoebumque nomen: ferrum et hostiles nihil  
Nocent furores: vincis, ac magni duces  
Angusta pedibus sceptrum subiiciunt tuis.
- 265 Quin tempus illud meta saeculorum prope est,  
Cum nube in alta tot sedebis gentium  
Quaesitor, orbe cum reformato manet  
Nox una sonites, una purgatos dies.
- 
- 

***HUGONIS GROTH***  
**SOPHOMPANEAS**  
**TRAGOEDIA.**

---

THE  
JOURNAL OF THE  
ROYAL ANTHROPOLOGICAL INSTITUTE



## Argumentum.

---

**H**istoria exstat apud Mosem Geneseos capitibus XLIV et XLV., adiunctis quae ibi cōnexa: in Psalmo CXXV.: actuum Apostolicorum capite VII, apud Philonem vita Iosephi: apud annalium Iudaeorum conditorem Iosephum antiquae historiae libro II.: partim et apud Iustinum ex Trogo Pompeio libro XXVI.: exstitit et apud Astapanum ex Alexandro Polyhistore, et apud Demetrium, quorum loca videre est apud Eusebium praeparatione, ad Evangelium.

---

**Interlocutores.**

*Iosephus, qui et Sophompaneas.*

*Chorus Aethiopissarum.*

*Ramses curator domus Sophompaneas.*

*Iudas,*

*Ruben, fratres Iosephi.*

*Nuntius.*

*Simeon,*

*Beniamin, fratres Iosephi.*

*Pharao Aegypti rex.*

**Mutae personae.**

*Manasses Iosephi filius.*

*Comites et satellites Iosephi. Item regis.*

*Fratres alii septem Iosephi.*

**Scena est Memphide.**

---

### **Actus primus.**

*Ios.* Rursum fugata nocte formosum caput  
Sol promit orbi, qualis e thalamo novus  
Surgit maritus veste purpura nitens.  
Dies recurrens lege praescriptae vicis  
5 Dominum fatetur: et datum cerni iubar  
Omni ebore et auro rectius monstrat Deum,  
Intelligendae lucis habitantem plagam.  
Rediere pariter cura et immitis labor:  
Tantique regni quicquid a Meroe iacet  
10 Adusque littus, brachiis quicquid suis  
Definit amnis, ille caelitibus suo  
A fonte notus, corde sollicito sedet.  
Miretur alius quas dedit Libanus trabes,  
Maculisque varium marmor et silvas domi,  
15 Et arte factas tot dapes, et piscium  
Ignota Nilo genera, et a medio die  
Quae nomen etiam nunc sibi quaerunt feras,

---

V. 9. Meroe, insula Nili in Aethiopia, finis Aegypti  
in meridiem.

- Longeque ab Arabum nemore fugitivas aves:  
 Lanamque ramis Sere depexam manus,  
 20 Discriminavit docta quam Babylon acu;  
 Niveasque baccas Indici donum maris,  
 Circumque limen, corpus et circum, agmina.  
 Sunt ista vana, et aerumnis leve  
 Pretium ferendis. Grande curarum tegit  
 25 Onus hic tiaras: inter ea quae regiis  
 Parenda iussi, fulgor est, qualem exigit  
 Persona vitae; qui micans oculos tenet  
 Animosque plebis: utor hoc ego, non fruor.  
 Quanto fluebat vita liberior mihi,  
 30 Cum corde vacuo sequerer investis puer  
 Ab Abrahami pecore demissum gregem,  
 Ubi laeta Sicimum pascua attondent oves,  
 Et amoena gemino clauditur tellus iugo.  
 Cepere victum, non sibi magno placens  
 35 Ambitio mensae, floribus sed se inserens  
 Mandragora dulcis, et nihil quamvis gravi  
 Onerata foetu palma; pellebat sitim,  
 Non rutila Meroes vina, non Nilotica  
 Expressus humor fruge quem zythum vocant:

---

V. 19. Seres (Σήρες) populus Asiae extremae, unde vestes Sericae. Acu pingendi arte insignis Babylon. Baccæ i. q. margaritæ.

V. 32. Sicimum (a Σίκιμα Sichem) i. e. Sichemitarum.

V. 36. Mandragora (μανδραγόρας) m. planta incerta.  
 Cf. Gen. 30, 14.

V. 39. Zythus (ζύθος) cerevisiae genus. Cf. Her. II, 77.

- 40 Sed sponte saliens ex humo maioribus  
 Potata nostris vena; pro sistris erat  
 Compacta ceris canna, quae Syries modos  
 Aequans, canebat orbis artificem Deum.  
 Si tunc patris sub ore, germanos prope
- 45 Solos videntem, livor invenit tamen,  
 Potentiaeque, sera quae venit mihi,  
 Nocturna imago tam fera innocuum in caput  
 Concivit odia, nunc quid exspectem, advena  
 Memphiticae telluris, in fastigio
- 50 Adeo eminente positus ut cunctos premam?  
 Et est Phari gens aspera, et cives quoque  
 Cervice dominos saepe non facili ferens.  
 Quo maior est haec fraena moderari labor.  
 Peccant remissae, nec minus rigidae manus.
- 55 Vult mitis adici lenitas pondus sibi,  
 Modestiaeque comite maiestas eget.  
 Sunt ista per se gravia: sed gravius tamen  
 Accedit aliud. Cum ratem pelago sua  
 Fert aura, cursum regere mediocris valet
- 60 Puppis magister: artis eximiae est opus,  
 Cum dubia ventos inter incertos hyems  
 Flagellat undas, vique nimborum vadis  
 Commotum ab imis surgit in montes mare,  
 Reperire fluctus per procellosos iter.
- 65 Qualis fatigat saeva tempestas tuos  
 Aegypte fines, spem bis agricolae suo

---

V. 41. Sistrum est genus tintinnabuli in sacris Laidis.



- Mentita culmis fruge carituris seges,  
70 Periculosum semper imperiis malum.  
Retinere quippe nescit obsequium fames,  
Nullosque sentit vulgus impastum metus.  
Rerum parenti maximo grates ago,  
Laudesque summas, quod Phari trepidis volens  
75 Consulere rebus me voluntati suae  
Legit ministrum, fataque inscripsit meae  
Ventura menti; pensat ubertas prior  
Quod deest, et annos larga nunc steriles alit.  
Nec munere una vivit Aegyptus meo:  
80 Et Syria nostram postulat supplex opem.  
Hanc summus orbis dominus invenit viam,  
Missis ut olim somniis faceret fidem.  
Bis fame subacti genua ad ignoti mea  
Cecidere fratres: ipse miserandas preces  
85 Bis mihi per illos genitor allegat senex,  
Et quae parentis implet extinctae vicem.  
Ego illud astrum, cuius auratum iubar  
Hyades quaternae, Pleiades septem colunt:  
Inclinat et cui Luna cornigerum caput,  
90 Titanque radios ipse submittit suos.  
Ego, ira fratrum mihi quod intendit necem,  
Meque illa mercem fecit, et duram dedit  
In servitutem, deleo ex animo omnia,  
Ad lenitatem natus, a sancto patre  
95 Ad eam institutus, et malis exercitus.  
Sed, ne quod illis sedeat in praecordiis  
Male expiatum virus antiquum mali,  
Pia cura me remordet; huc sollertia

- Tota advocanda est, cordis ut pateant mihi  
100 Arcana, multa tegere quae nubes solet.  
Huc pertinebat et quod hesternae dapis  
Aetate minimus maximas partes tulit,  
Scire ut daretur ore et oculorum notis,  
Ferrentne fratrem sanguine ex toto meum,  
105 An veteris odii pectore haereret cinis,  
Necdum satis liquebat: instandum amplius.  
Servile fictum crimen, atque inde imminens  
Puero periculum, deteget siquid latet.  
Non recta semper sulcat adversum mare  
110 Carina: prodest saepe prolato pede  
Sinuare cursum, et vela in obliquum dare.  
Est et probandis usus interdum dolis.  
Spero, reperiam: sin minus, faciam bonos.  
Ades Manasse, si tibi quondam viro  
115 Pars se aliqua regni credit, Aegyptus tibi  
Sit patria: sic est merita; benefactis data  
Remunerare; proximum numen Deo  
Regem putato: prima sit legum, illius  
Obsequia iussis pendere, et rebus fidem.  
120 Tum fastus absit, mentis inflatae tumor.  
Res est potestas fragilis, et regum favor.  
Supermicantem ducibus in planum levis  
Tulit hora; paullum saepe ab imperio interest  
Ad supplicantum verba et alienos pedes.  
125 Si dignitas tua laesa, si damnum datum,  
Da facile veniam. Prona gens labi sumus  
Homines, quod olim primus ostendit sator,  
Furtiva vetita poma cum tetigit manu.

- Dat ipse se facilibus exorabilem,  
 Suaque lege quemque metitur Deus.
- 130 Suprema virtus atque virtutum omnium  
 Perpetua custos et triumphatrix necis,  
 Pietas habenda est; otium semper fuge,  
 Vitiis amicum. Vult honos sese coli.  
 Nam fulgor ex quo gentibus monstrat virum,
- 135 Ut magna non sit fama, vitari nequit;  
 Sed sit decora an turpis, hoc in te situm est.  
 At nunc eamus visere obscuros specus,  
 Quibus urbs recondit magna Cereales opes,  
 Mandata fidei nequa pars nostrae labet.

*Chorus.*

- 140 Facundis domini fessa prophasibus  
 Noctis damna die certa rependere,  
 Asnethe nitido sola iacens thoro,  
 Ne somnum strepitus turbet amabilem,  
 Nos stare aerisonas hic iubet ad fores:
- 145 Quas illi famulas misit ab ultimis  
 Nubarum populis, quos Niger alluit,  
 Rex Chusi genitus sanguine nobili,

---

V. 139. Chorus constat metro Asclepiadeo primo.  
 Prophasibus i. e. simulationibus.

V. 141. Asnethe, Putiphari, sacerdotis Heliopolitani  
 filia, Iosephi uxor. Cf. Gen. 41, 45.

V. 146. Chus, auctor gentis Aethiopicae. Cf. Gen.  
 10, 6. 7.

- Torta, non acubus, fluminis in modum,  
Sed Phoebi radiis conspicuas coma;  
50 Depressas patulis naribus, et cutem  
Signatas nimium contigua face;  
Crassis labra quibus sepibus obtegunt  
Candorem niveum dentis eburnei.  
Fortunata domus, quam parili fide  
55 Indivulsa regit copula coniugum.  
Fert vultu soboles patris imaginem:  
Gaudet casta suo teste puerpera:  
Nec vir barbaricae more potentiae  
Noctes multiplici foedere dividit,  
60 Litesque atque odium seminat in domum:  
Unam totus amat; pectore tam bono  
Externis locus est nullus amoribus;  
Quos pridem iuvenis vincere noverat:  
Cum servus domina liberior sua  
65 Flagrantes oculos mentis adulterae,  
Nudatosque sanus, verbaque mollia,  
At mox imperii iure minacia,  
Contempsit, veluti dura solet silex  
Spumosos pelagi spernere vortices.  
70 Visne, inquit, triplici me scelere obligem,  
Ut, matrona, tibi dedecus adferam  
Et frangam domino, quam pepigi fidem,  
Et sancita Deo foedera polluam?  
O qui siderei tramitis arbiter  
75 Iusta lege vices temporis ordinas,  
Ut nunc purpureis ver niteat rosis,  
Nunc messem segeti Sirius excoquat,

- Nunc vini laticem palmite coerulo  
Autumnus pariat, nunc sapiens hyems  
180 Tellurem gelido sidere temperet,  
Idem cur pateris colla nocentium  
In sublime caput ferre, bonos premi?  
Stuprum corde ferens foemina, corpore  
Insontis spoliū, saeva libidine  
185 Frustrata, iuvenis vincla paciscitur,  
Translatoque virum crimine decipit,  
Corrumpens animum iudicis osculo.  
Illum, quem triplici muniit aggere  
Formae rara comes candida castitas,  
190 Saevus carcer habet; sanctus et innocens  
Veros inter agit mixtus adulteros.  
Ast illic etiam, quanta sit, edocet,  
Leges connubii fallere, foeditas.  
Miratur iuvenis verba senilia,  
195 Morataeque decus frontis, et os probum,  
Atque iniecta oculis fraena pudentibus,  
Vinctorum populus; carceris occupat  
Consors officium iudicis: illius  
Vitam quisque videns, se peragit reum.  
200 Ut non tota fugit nos ratio Dei,  
Sic nec tota patet; non habet is suos  
Laxe, non nimium molliter; ut bonus  
Dux virtute sui militis utitur,  
Indicitque operas: sic pater omnium  
205 Vult durare malis quos amat, et cavet  
Ne marcore situm pectora contrahant.  
Verum non inopes interea tamen

- Solati patitur, dans animos suis,  
Sustentansque hilari spe patientiam.
- 10 Sic noster tenebras inter et horrida  
Ferro claustra domus, iuris erat sui,  
Servabatque alios; ante cupidine  
Intactus, trepidi tunc domitor metus.  
Qui pulchro dominam corpore ceperat,
- 15 Captivos animi cepit honoribus,  
Custodemque loci; plebs miserabilis  
Unius fidei creditur: accipit  
Hinc praesaga suis fascibus omina,  
Regnumque in medio carcere possidet.
- 20 Quo solis radii vix penetraverant,  
Lux divina venit, seque sub illius  
Puro corde locat: sontibus explicat  
Nocturnos monitus: commodat os Deo:  
Huic poenam, veniam nuntiat alteri.
- 25 Sic fluxere dies temporis asperi,  
Donec Rex pavidus noctis imagine  
Frustra Niligenas consuluit magos,  
Frustra, quid struerent fata novi, polo  
Inter sidereas quaesiit orbitas:
- 30 Vatemque immeritis suppliciis levans,  
Induxit manibus gemmea vincula,  
Et byssi niveo tegmine vestiens,  
Praefecit dominum gentibus alterum,  
Et dextrum solio constituit suo.
-

**Actus secundus.***Ramses. Iudas. Ruben.*

*Rum.* Et me tuae miserescit aetatis, puer,  
 Quem trahere magnos ad Sophompaneae lares  
 Manibus revinctum cogor; at ratio imperi  
 Non constat aliter, nosque lex iussis heri

5 Iubet ministros esse, censores vetat.

*Iud.* Si patere, Ramse, pauca pro puero loquar,  
 Si non sat illum liberat tali probro  
 Ingenua species oris, atque anni doli  
 Vixdum capaces, pende quod factum dies

10 Hesterna vidit; hoc quod adstrictis boum

Tergoribus aurum publica cusum nota  
 Abdiderat error vester, in Syria fuit,  
 Ubi vindicare nemo, nec poterat queri:  
 Retulimus ultro: munera addidimus soli

15 Exigua, fateor, balsama, et mortalium

Imitata digito poma, et haud uni malo  
 Medicamen herbas, quodque de myrrha fluit,  
 Apumque nectar atque amygdalinas nuces,  
 Si maius isto ferre potuissent onus

20 Nostrae quadrupedes, iam puto nos diceres

Non esse avaros, improbos multo minus.

*Ram.* Inanis, horas perdere in voces labor,  
 Res, quas refellit. Quod datum pretium, modo

---

V. 2. Sophompaneas (hebr. Zaphnatpaaneach, sal-  
 vator populi interprete s. Hieronymo) nomen Iosepho  
 a rege Aegyptiorum inditum.

- Pro Cerere, clausum sarcinis vestris fuit,  
 25 Omitto: plena talium nostra est domus.  
 At patera, pueri iuncta quae rebus fuit,  
 Est illa, dominus ipse quā vitis solet  
 Libare laticem, cum preces rerum patri  
 Pro se domoque fundit, et pandi sibi  
 30 Poscit futurae sortis e caelo notas.  
 Nam magnus illum saepe dominator poli  
 Omnes latentis conscium arcani facit.  
*Iud.* Si arcana novit, nos quoque haud dubie sciet  
 Esse absque noxa. *Ram.* Pectoris vestri sinus  
 35 Excute; verum rectius dicet tibi,  
 Quam tu ipse, nemo; sed cave te iudices  
 Ex parte; vitae tota, quanta illa est, tibi  
 Spectanda series; non repraesentat sua  
 Supplicia semper, lentus irasci Deus:  
 40 Sed vetera cernens vitia cumulari novis,  
 Gravitate poenae temporis pensat moram.  
 Impune scelera saeculi tulerant diu  
 Veteris gigantes, antequam caelum mari  
 Confudit undas, et suas caelo mare  
 45 Undas regessit, summaque in iuga montium  
 Salire nullis clausa littoribus freta.  
 Diu superba dicta et in superos minas  
 Iactarat aetas illa, cui concordiae  
 Rupere foedus vocis ignotae soni.  
 50 Post multa sero facta saeviciae trucis,

---

V. 30. Cf. Gen. 44, 5: scyphus, in quo augurari solet, ut scilicet putabant Aegyptii.



- Rum.*  
*Qu.*  
*M.*  
 5 *Ad vos recurrit tristis, et cor verberat!*  
*Ad. Monuisse memini saepe, ne tantum nefas*  
*Admitteretis; haeret hoc animo recens*  
*Miserum rogantis vultus: illae nos premunt*  
*60 Coelo receptae, fratribus surdis, preces.*  
*Ad. Alios monere facile; si propriam tibi*  
*Inspicere vitam cura, non deerit nefas.*  
*Rum. Quis oris iste turbidi inter vos sonus?*  
*Iud. Syriae repetimus clara quae nostri loca*  
*65 Tenuere patres, omnibus circum incluta*  
*Bonitate noti; dexteris magni quibus*  
*Iunxere reges, et probaverunt fidem:*  
*Quorum hospitale pectus et mores probos*  
*Grata celebrat laude, Iordanis vadum*  
 70 *Quae terra et undas inter Euphratis iacet.*  
*Rum. At non propago semper in laudes patrum*  
*Succrescit. Est cum degener proles probro*  
*Libidinoso, perfidis pactis, fero*  
*Facinore, turpat generis auctores sui.*  
 75 *Iud. O pars nostri sanguinis, aevi*

V. 53. Dothan (Dothain), quo loco Iosephus venditus a fratribus est. Cf. Gen. 37, 17.

V. 75. Sequuntur anapaesti. Cf. Sis. Act. IV, 168.

- Primo vernans in flore puer,  
 Donum infelix aetatis habes,  
 Nescire quibus mergare malis.  
 O dulce rubens gratia vultus,  
 80 Permixta velut purpura lacti,  
 Aut nascentis lux prima rosae:  
 Tuque o Libyco concolor auro  
 Coma, deliciae lenibus auris:  
 Quis te diri stipitis ictus,  
 85 Aut, si poterit mors dura fugi,  
 Horrida quae te specus exspectat?  
 Aut qua, nobis et patre procul,  
 Regione iugum famulare feres,  
 Heu non tales natus ad usus,  
 90 Regum sociis generatus avis?  
 Non te varia veste decorum  
 Laetus cernet cursare pater:  
 Non armentum pascere fessis,  
 Cum sol medium transegit iter,  
 95 Properata feres prandia nobis.  
 Et forte aliquis (namque malignis  
 Tellus animis non ulla caret)  
 In te rursus crimina finget,  
 Cum te cernent inopem, externum  
 100 Vindice nullo.  
*Ram.* Laudo, propinquo sanguinis vincolo tibi  
 Quod amas ligatum. Discrepant mortalium  
 In multa mores: scita sunt aliis locis  
 Alia, ut voluntas sceptrata tractantur, aut sua  
 105 Cuiusque patriae et gentis utilitas tulit.

Lex ista ubique est, quae nec in tabulis cedri,  
Nec in aere pendet sculpta, nec stat marmore,  
Sed corde in ipso est scripta communis manu  
Auctoris: illam qui fugit, sese fugit.

110 Ferae quoque ipsae genere consortes amant.

*Iud.* Ipsos dolores tangis, ut nequeas magis.  
Sed ecce densis praeses Aegypti venit  
Stipatus armis ad laris limen sui.

Quae nunc neganti, quod putant certum, fides?

115 Quae confitenti venia? vim sapientiae

Mihi demit omnem, nec sibi vultum sinit  
Constare culpae conscius veteris pavor.

*Ramses. Iosephus. Iudas.*

*Ram.* Deprensa noxa est; salva res; illum penes  
Sacrifica latuit patera, quem vinctum vides.

120 Unum retraxi: sponte grex fratrum it comes,  
Monstratque luctum vestibus ruptis suum.

*Ios.* Quae vos cupido misera, quae fiducia  
Ad hoc adegit facinus? an vobis ego  
Ignotus adeo, plenus afflatu Dei,

125 Cui monstrat animus quicquid abstrusum latet,  
Et alia vates perspicax prudentia?

*Iud.* Magnanime princeps, proximum regno caput,  
Ad tua voluti genua, quae iam possumus  
Reperire pro re verba? quem fandi modum?

130 Quo nos tueri teste, quos peragit reos  
Deus ipse? Sed tu gentium domitor doma,  
Quod maximum, iram: nec velis quantum potes.  
Munus tuum tuere: quam contra famem  
Vitam dedisti, rursus ex poena eripe.

- 135 Hominem facit res una contiguum Deo,  
Servare lapsos. Sume nos nexos tibi,  
Hunc patera sub quo sedit, et fratres decem.  
*Ios.* Mos ille multos tenuit et multos tenet  
Populos Eoi generis, ut poenas vetent
- 140 Intra nocentes stare, sed contagio  
Patres eodem, liberos, fratres trahant,  
Et quinque culpa non suae involvant domos.  
Me praeside aliud ius in Aegypto viget,  
Et ut per omnes vigeat aetates, precor.
- 145 Sibi quisque peccat: longius non it metus,  
Quam facinus: haeres nemo suppliciiis venit.  
In quo repertum est crimen, is servus meum  
In ius abito. Caeteri immunes malo  
Repetite, qui vos avidus exspectat, patrem.
- 150 *Iud.* Quanquam loqui me terret et noster status,  
Et oris illud specimen augustum tui  
Regi secundum, si vales in nos graves  
Suspendere iras, pauca non dura precor  
Ut aure capias verba, contentus, miser
- 155 Quae fundo, sed quod ad preces satis est, homo.  
Quo tempore ad te prima nos duxit fames,  
Interroganti nostra respondi tibi,  
Nos patre genitos qui supra humanae modum  
Aetatis annis vinceret saeculum senex.
- 160 Illi esse natum, nos decem praeter novo,  
In flore vitae, gaudium et lumen patris:  
Quippe, editum curricula cum circum ultima  
Senis iret aetas, deque genitrice unicum,  
Carente pridem luce quem quondam alterum

- 165 Idem pepererat uterus; hunc duci tibi  
Puerum imperabas, ut foret quem tam potens  
Benignitate gratiae impleres tuae.  
Ad ista nobis profuit contra nihil,  
Dixisse, vitae fila rupturum patri
- 170 Divortium animo pignoris cari suo.  
Nam tu negabas copiam nobis tui,  
Nisi advenitet ille, conspectus dari.  
Quae dura postquam verba percepit senex,  
Sedet silens lachrymansque, canitiem sacram
- 175 Et ora foedans pulvere ac turpi luto.  
Consumpta cum iam tota deficeret Ceres  
Quam ripa Nili dederat, et trepidi invicem  
Obverteremus ora, vicina fame.  
Iremus alias quaerere Aegypti dapes
- 180 Senior monebat usque; nos obtendere,  
Tua iussa non flectenda: si parvus domi  
Frater maneret, spem cibi nullam super.  
At moestus ille: filios peperit duos  
Nostro fidelis socia coniugio Rachel.
- 185 Horum prior de latere discessit meo  
Nunquam videndus; eius heu miseri truces,  
Ita nuntiastis, membra lacerarunt ferae.  
Si nunc ab oculis alterum rapitis meis,  
Et aliquid illi eveniat, (in multos enim
- 190 Humana casus vita perpetuo patet)  
Respicite canis oro quid fiet meis.  
Luctu peresus, tabe tristitiae fluens  
Abibo luce eiectus ad mortis loca.  
Nunc te per illum quaeso, si fas est, senem,

- 195 (Fuit et tibi olim genitor) atque animam illius  
 Quae tota puero pendet ex isto, levi  
 Fugitura motu, siquid inciderit grave:  
 Caussam senilis mortis adscribi tuis  
 Ne patere titulis, magne servator Phari.
- 200 Vicarium me sume servitii, precor.  
 Onus domorum est tener et invalidus puer.  
 Mea maior opera; me patri feci vadem.  
 Ne cogar illum aspicere violata fide,  
 Ne me gemitibus atque lachrymarum imbribus
- 205 Accuset, et cum fuerit in terrae sinum  
 Condendus, ipse crimen ibi condam meum.  
*Ios.* Nec cuncta quae tibi dicta, nec credo nihil.  
 Qui constituere properat, ingreditur viam  
 Ad poenitendum. Videro mox amplius.
- 210 *Iud.* Felix nimis Iosephe, si extinctus iaces,  
 Quod ista iam non patere nobiscum mala;  
 Si vivis, ipse quod tuas iniurias  
 Non sinit inultas aetheris magni parens.

*Chorus.*

- 215 Qua nascentes solis radios  
 Videt Aegyptus, tellus iuxta  
 Phoenissa iacet, quam gens hominum  
 Meritis partes novit in ambas,  
 Dubiam magis an prosit, an obsit.

- Pulchra inventis fama T'aaute  
220 Quicquid pelagus tellusque vident,  
Quicquid caeli mobilis orbes,  
Et qui Totum colligat aer,  
Quicquid Toti par mens hominum  
Reperire valet, quater id senis  
225 Omne legendum praebere notis.  
Sed gens eadem, quasi non morbi  
Satis atque ferae raperent hominem  
Quique obsedit latro Niliacas  
Crocodilus aquas, genus addentes  
230 Ad fata novum, rate coeperunt  
Fragili fluctus sulcare maris  
Nec conspicuum reddere littus,  
Sed qua medium pelagus terras  
Effugit, Austros Ursamque sequi:  
235 Non ut populis possent longe  
Ferre remotis quae naturae  
Pauca petentis postulat usus,  
Sed ut aequoreos tincta cruores  
Humeris regum lana niteret,  
240 Ut gramineum dites ornans  
Digitos vomeret gemma virorem.  
Facit haec auri malesana sitis.  
Haec, quae docuit spernere caeli  
Pontique minas, tenuique animam  
245 Credere ligno, dira cupido,

---

V. 219. Taautes inventor esse literarum fertur Sa-  
chuniathone ac Plinio testibus.

- Hominem in quae non crimina cogit?  
Hinc illiciti licitique procul  
Discrimen abit; nulla rapinas  
Prohibet pietas, placet ex omni  
250 Quaesita loco praeda, nec ipsis  
Parcitur aris.  
Felix aetas prima parentum:  
Cum divitiae fraga fuerunt,  
Et quos manibus consita nullis  
255 Sponte sapes protulit arbor:  
Lex una fuit, nescire nefas,  
Vitaque simplex, et casta satis  
Corpore nudo.  
Postquam vallum facta pudori  
260 Tunica, et iam vi pendere fruges  
Terra coacta est, fas ruperunt  
Sanguinis irae: praescidit aevi  
Cursum fratri fraterna manus.  
Non hic hominum constitit audax  
265 Labor: ima fodi sensit trepidans  
Viscera tellus, meliusque latens  
Duri chalybis vena reperta est.  
Non trux ultra singula carpsit  
Corpora caedes: ferrum magnos  
270 Una populos messuit hora:  
Et vis scelerum, belli titulo,  
Tanta secuta est, quantum haud ultra  
Tolerare valens, maris in se undas  
Terra vocavit: nec minus illo  
275 Aliud caelo mare delapsum est,



- Quali sese fremitu Pharius  
Cautibus altis deicit amnis.  
Sed nec succum profuit uvae  
In spumantes pressisse lacus.
- 280 Damna accepit tunc magna pudor.  
Natis patrum risa senectus:  
Peperit patri nata nepotes.  
Quid non reperit foeda voluptas?  
Tibi gens Mesoris multum et nostro
- 285 Gratulor aevo, cuius culpas  
Quam datur arcto fine coercet  
Dux egregius, vitium resecans  
Lege severa: sed et ipse suo  
Magis exemplo certat sanctos
- 290 Reddere mores.  
Placet hic morari; magna res coepta est: libet  
Videre tandem quem sit habitura exitum.

---

### Actus tertius.

*Nuntius. Iosephus.*

*Nunt.* Quae pars feroces maxime populos habens  
Rubrum vetat coire Carpathio mare,  
Tota est in armis; quisque ius dicit sibi,  
Spretoque magni regis imperio furit.

---

V. 284. Mesoris i. e. Aegyptia gens. Cf. Gen. 10, 6. 13.

V. 1. sq. H. e. Arabia Petraea.

- 5 *Ios.* Grave: sed frequens iam gentibus Phariis ma-  
Sed non medenti sufficit, quali lues [lum.  
Flammetur aestu, nosse, quam partem premat,  
Quibusque sese suscitet stimulis dolor.  
Noscenda morbi caussa; tu nobis quoque
- 10 Edissere, ex quo fonte manarit malum.  
*Nunt.* Prima a nomarchis causa, qui iussis tuis  
Inobsequentes, dum nimis lucro student,  
Pretioque magna farra trans finem vehunt,  
Parce dederunt ruris habitanti loca
- 15 Alimenta plebi: deinde mox minus et minus.  
Vitam diu protraxit aliena fame  
Opulentus emtor: tradidit panem manus  
Egena: tanta maior erat auri fames.  
Postquam per agros tota defecit Ceres,
- 20 Pecori invidere coepit, et stratum solo;  
Virgulta et herbas vulgus in ventrem tulit.  
Nec in eo videbat turba quid faceret mali.  
Nam vacua simul ac terra graminibus fuit,  
Periere nigra tabe lanigeri greges,
- 25 Bovesque, et hominum quidquid in pastus dedit  
Natura; miseri, ruris excubias canes,  
Ibimque, et alia foeda contactu quoque,  
Vertere in epulas; quis putet? multi aspides  
Venantur, et venena prudentes edunt.
- 30 Stat turpis ore pallor et fluitat cutis,  
Abactaque intus lumina atque artus hiant.  
Pressit querelas gemitus infelix diu.  
Tandem unus alterque otio soliti pigro  
Traducere aevum, laevaue ausi etiam prius

- 35 Iacere in potentes verba, dum vesper polo  
Obducit umbras, dum color rebus perit;  
Colligere coetus, atque ibi veteres novis  
Aggerere culpas: aut ubi thura, ut pios  
Faciunt miseriae, populus adolebat Deo,  
40 Captare turbam. Quem sibi esuries modum  
Haec sperat? aiunt; nostrane hoc patientia  
Exspectat, ut sit pugna quis cuius prior  
Discerpat artus, natus ut patris veru  
Coquatur, atque redeat in matrem puer?  
45 Potentiam timetis? haec nihil est, nisi  
Inane nomen, quod parit segrex pavor.  
Quicumque terret singulos, cunctos timet.  
Haec quisque semel audita, quoquo advenerat,  
Profert et auget. Parva pars ad te preces  
50 Suasere mitti, victa quorum auctoritas.  
Pars magna ut oestro tacta plus motoribus  
Insanit ipsis. Impetu quanto ruunt  
Per inane venti, montis et rupti latus  
Iactant, et alta robora excutiunt solo:  
55 Sic conglobata rapitur agrestis cohors,  
Sudes praeustas saxaque et fracti ferens  
Partes aratri; mille vox linguis sonat:  
Petenda Coptos, sede dominantum potens:  
Ibi panis; ibi vindicta. Caput exercitus  
60 Vires eundo; plurimi, qua transitus,

---

V. 58. Coptos urbs Aegypti superioris, frequens mercatu.

- Numerum stupent faciuntque. Cum ventum prope  
Et urbs in oculis, claustra portarum petunt  
Flammante taeda; traxit acre incendium  
Abies, et ingens Euris adiuvit faces:
- 65 Sparsus propinquas ignis invasit domus:  
Volitant favillae: piceus ut coelo globus.  
Dumque urbis illuc populus accurrens parat  
Remedia flammae, ruris hoc usa agmina  
Pavore, muri parte neglecta irruunt,
- 70 Statimque rapta publicis penetralibus  
Arma induuntur, et vibrant enses manu.  
*Ios.* Solos nomarchas ista seditio petit?  
An latius vagatur, et discrimine  
Sontes remoto miscet innocuo gregi?
- 75 *Nunt.* Rabies in ipsos prima rectores furens  
In frustra multos carpsit, atque horum nihil  
Tumulo reliquit; profuit paucis fuga,  
Quos nunc ferarum deviae latebrae tegunt.  
Mox horrea invasere; quae potuit Ceres
- 80 Servato recte temporis longi famem  
Arcere populo, rapta sine lege ac modo,  
Mali diebus attulit paucis moram.  
Primordia haec fuere; sed non vis stetit  
Qua coepit, ire in peius, ut morbi solent.
- 85 Quae clara pendent dona templorum tholis,  
Quae publici usus gaza, privatis sua  
Quos arca census servat, in praedam venit.  
Nec ignis avidas arcet inhiantum manus:  
Diripitur ardens Coptos; ingenuam quoque
- 90 Pubem, virosque nobiles captos trahunt,

Pretioque servos barbaro mittunt solo.

*Ios.* Quis ausus emere liberi iuris genus?

*Nunt.* Arabum regentes arva, bissemi duces.

*Ios.* Gens ista mores Agaris iniustos refert.

95 Sed in urbe capta nunc quis imperii modus?

*Nunt.* Non una mansit forma: ductorem sibi

Legere summo iure: displicuit cito.

Impositus armis alius, et vincta additis

Sociis potestas: sed nec hoc mansit diu;

100 Datumque turbæ regimen; ibi sententia

Clamore certant, imperatque audacia.

Contenta verbis nec manet discordia:

Vulneribus agitur: ipse conflictum trucem,

Motasque vidi mutuam in caedem manus.

105 *Ios.* Spondent paratam quæ refert victoriam.

Ramse, properiter quot potes turmas rape,

Cincturus urbem. Fecero iustæ brevi

Adsint cohortes, et per infernos specus

Qui moenia intra militem obscurum locent.

110 Nec deerit aries horrido incussu gravis,

Nec capite tecto vineæ serpens opus.

Per hæc potitus urbis, armatum gregem

Imbuere Phario sanguine aut præda cave.

Exspectet a me commoda et pretium suo

115 Miles labori: sufficit rex omnibus:

Ne civium dolore sibi quaestum parent.

Civile regimen da nec opulentis nimis,

Qui multa habentes semper in maius tamen

Sua vota mittunt, tamque nil parentium

120 Populo volunt licere quam nil non sibi:

- Nec contra egenis, quippe cor quorum exedit  
Inimicus aequo livor, insociabilis,  
Aliena cernens lumine infesto bona.  
Quod civitatem continet, medium est genus,  
125 Luxu remotum, sorde contempta vacans.  
Hinc, quae per omnes lance distribuas pari,  
Alimenta mittam. Quicquid aspiciens Cyprum  
Littus, rubentes inter et fluctus situm est,  
Qua parte Pharius limes extrema sedet  
130 Tellure, denso turrium obtentu tege.  
Venient favente tempora aetherio patre  
Meliora, cum gens sentiet vires Phari  
Nabataea, nostris quae frui gaudet malis.  
Tenebricosus servet imperio male  
135 Usos nomarchas carcer, atque illos simul  
Quibus inquinata caede rectorum manus,  
Quamvis nocentum, more non tolerabili  
Et hoste pacis. Illa terrebunt magis  
Supplicia, quae non ira constituet recens,  
140 Sed amica gravibus tarda consiliis mora.  
Veniam ferunto, qui satis delinquere  
Habuerunt tantum, iusserat quantum fames:  
Non quorum avarus sese in alienas opes  
Immersit animus. At quibus popularium  
145 Ludibrio quaestuque libertas fuit,  
Nunc iura poenis sentiant ipsi suis  
Quae reppererunt: terra viventes premat:  
Ibi per laborem tempora, erepta die,  
Dimetientes compedem duram trahant.

- 150 Sed et hi tamen pascantur: et quam facinore  
Lacere diro patriam, exemplo iuvent,  
Spectaculoque miseriae prosint diu.  
Fac ista cures. Quae domum spectant meam,  
Iam pauca ego intus fidae loquar.

*Iudas. Simeon.*

- 155 Proh, qualis iste, Simeo, vir! quam provide  
Cuncta ordinavit, quam peraequavit bene  
Supplicia meritis, iuris ac recti tenax!  
*Sim.* Talem diu iam video, pro vobis ego  
Dum servor obses. Saepe conspectus mihi  
160 Sedere, et aequus partis utriusque arbiter  
Audire patiens dicta: nec verbo levi,  
Nec ore motus prodere indicium sui.  
Valebat illo testium sub iudice  
Fides magis quam numerus: et testis locum  
165 Implebat ante vita quae fuerat rei.  
Legum studebat persequi normam, nisi  
Suaderet aliquid tristibus clementia  
Detrahare poenis, non tamen sic lenitas  
Nimis ut soluta demeret vitiis metum.  
170 *Iud.* Quid esse dicam, quod Sophompaneas, heri  
Nos hospitali largus excipiens dape,  
Hoc, quem dedit natura, disposuit loco?  
*Sim.* Mihi crede, quod tu, frater, eximium putas,  
Minimum est in illo; magna vis illum Dei  
175 Inspirat, et, quae non valet mens assequi

Mortalis, intus spiritu aetherio monet.

*Iud.* Quae se ista tanto porticus spatio explicat,  
Amplexa totam latere tergemino domum?

*Sim.* Istam petitis littore usque ab Ionio

180 Fieri columnis iussit in amicum suum

Rex non avarus. *Iud.* Intus aspicere an licet?

*Sim.* Licet, et iuvabit; namque et hic multo litas  
Colore tabulas, opera sollicitae manus,  
Rex iussit addi, quae Sophompaneae decus

185 Et acta monstrent hospitum conspectibus,  
Ut ipse famae vivus intersit suae.

*Iud.* Eamus ergo. Ne time: non, Benjamin,  
Te deseremus; non tuos fratrum chorus  
Effugiet oculos, ilicetque aderit tibi,

190 Simul atque magni praesidis cardo strepet:

*Sim.* Haec opera visu, quam potes, propero rape.

*Iud.* Quid ista sibi vult femina iratum rubens,  
Quae crine vulso lacera et humectans genas  
Chlamydem simul fugientis a tergo rapit?

195 *Sim.* Matrona forma simul et imperio potens

Stimulis negati saevit in castum stupri,  
Regeritque crimen, scelereque obvelat scelus,  
Mendacioque pignore hoc quaerit fidem.

*Iud.* Video nigrantem carceris saevi domum.

200 *Sim.* Hoc ille clausus crimen alienum luit.

*Iud.* Quis de racemo triplice tres uvas premens  
Geniale regis fundit in phialam merum?

*Sim.* Non gesta res est: sed Sophompaneae fuit  
Qui vinculorum socius, hanc somno datus

205 Imaginem conspexit; et, Phoebi iubar



- Simul extulisset tertiam coelo facem,  
Se rursum ut ante regiae poclis fore  
Mensae ministrum, didicit illo interprete.  
Vocem secutus exitus vatem probat.
- 210 Heu quam brevis memoria factorum bene!  
Ex carcere illo pristinum indeptus locum,  
Insignis opibus, gratia clarus, potens  
Honore, mansit cultae amicitiae prius  
Praesagiorumque et sui pacti immemor,
- 215 Donec suum bis signa per bis sex iter  
Sol explicaret, et Phari sapientibus  
Obscura regis quaereret vatem quies.  
*Iud.* Est alia tetra tristis in caligine  
Species. Canistra plena regalis tria
- 220 Mensae paratu lancinant rostris aves  
Epulasque dulces unguibus foedis trahunt.  
*Sim.* Et ista somni forma, quam vidit miser  
Captivus, olim regiae structor dapis:  
Sicutque vatis dixerat vox praescia,
- 225 Cum tertio purpurea curriculo diem  
Proferret Eos, horrida pendens cruce  
Avidas volucres artubus pavit suis.  
*Iud.* Septem superbas corpore eximio boves  
Niliaca profert unda, quas ripam gravi
- 230 Pede metientes graminum pascit viror.  
Sequuntur aliae, pigra quas genuit palus,  
Macie iuvencae squalidae, numero pari,  
Quae simul ad eadem repserant aegre loca,  
Illas opimas lurido rictu vorant.
- 235 Septem beatæ pondere in terram suo
-

- Vergunt aristae: flavus est illis color.  
 Totidem sed alios video contiguos solo,  
 Sitiente culmos mergite, exsuccos, leves,  
 Quos aestuosus solis exhaustit vapor.
- 240 Et virus horum nobiles spicas necat.  
 Quis iste in ostro talia aspectat iacens?  
*Sim.* Rex ipse; namque huic fruge felici uberes  
 Septem, atque septem segetis infaustae notat  
 Annos latente noctis effigie Deus
- 245 Sed nemo nodos potuit hos evolvere,  
 Nisi ille, quem rex carcere eductum horrido  
 Ob id secundum culmini fecit suo.  
*Iud.* Agnosco pictum byssino cultu: trahit  
 Eburnus illum currus: in laeva micat
- 250 Radiatus adamas, torquis insigne aureum  
 Dependet humeris: pronus in faciem iacens  
 Adorat illum populus, et laudes canit.  
 Sed quae illa triplici classe distincta agmina?  
 Succincta tunicis prima pars: pars altera
- 255 Sudat sub armis: carbaso pars tertia  
 A capite ad imos candida tegitur pedes.  
*Sim.* Quoscunque populos claustra regnorum Philae  
 Cohibent et ingens Nilus et Nili mare,  
 Hos docuit ille in genera partiri tria,
- 260 Et distributas singulis artes novis  
 Auxit repertis. En aratores habet  
 Sors prima, et operas vita quarum usu viget.  
 Monstravit ille spumeam vim fluminis  
 Attollere in sublime circuitae rotae

---

V. 257. Philae insula Nili in Aegypto superiori.

- 265 Non constituro mobilis vestigio.  
 En rursus alii, hospitibus admirabile,  
 Tractant farinam pedibus, et manibus lutum.  
 Secundus ordo miles; hunc alto otio  
 Agitare bellum docuit. Hi vallum ferunt:
- 270 Currunt in armis alii, et in palum graves  
 Meditantur ictus; pars equi non milibus  
 Urgent lupatis ora, et in gyrum trahunt.  
 Currus at aliis regere falcigeros labor.  
 Pars iusta castris spatia dimensi, parant
- 275 Munire fossis et superiecto aggere.  
 Hos contus ingens armat: his nervo sonans  
 Sinuatur arcus; hi securigera manu  
 Ferire discunt; cernis in dextram modo,  
 Modo in sinistram tota versari agmina?
- 280 Modo explicatur frons, modo in cuneum coit.  
 Dicata sacris tertia est hominum cohors,  
 Quam gaza regis oneris exsortes alit.  
 Nec hos, Sabaeos crede tantum altaribus  
 Adolere odores; quin Sophompanea duce
- 285 Quaerunt vagantes quid retro stellas agat,  
 Cur Cancri ad orbem longior soli mora:  
 Idemne semper ursa destiterit polo:  
 Quae caussa caelum siderum partu novo  
 Foecundet: et consilia rimantur Dei
- 290 Per omne Mundi, quanta natura est, opus.  
 Formas quoque illas pulveri inscriptas vides?  
 Ibi triquetrus disputant quantum ambitus  
 Contineat aequor: orbe sit quanto minor  
 Quae media fines linea attingit duos.

- 295 Tum quicquid egit fortiter bello Pharos,  
 Aut pace placide: quicquid Aegypto utile  
 Sanxere leges: Memphide et regnantium  
 A Mesore primo nomina, et populi truces  
 Motus in alta mole pyramidnm notant,  
 300 Rerum exprimentes signa, non vocum sonos.  
*Iud.* Quid illa sibi vult tabula, generosi ductis  
 Ubi plebs ad aulam pallida ac trepidans coit?  
*Sim.* Res magna regis agitur. Ut primum fidem  
 Segeti abnegavit annus, esurire exciti  
 305 Mancipia vendunt Cerere, quam rex horreis,  
 Dum larga messis fuerat, abdiderat suis,  
 Hoc vate monitus. Saevior postquam fames  
 Momordit artus, adferunt pretium boves,  
 Et quicquid herbis pascitur laetis pecus:  
 310 At mox et agros: deinde ius etiam sui.  
 Sic cuncta magnus arva quae Nilus videt,  
 Dementis sacrato dicta quae fuerant choro,  
 Hominumque venit turba sub regis manum:  
 Quos ille (namque id columen imperii fore  
 315 Dux aestimavit) linquere a proavis diu  
 Habitata iussit arva, et aliena in loca  
 Misit colonos. *Iud.* Proh viri sapientiam,  
 Sive illa ab usu, sive de coelo data est.  
 Sed ne illa nobis obsit, haud frustra mihi  
 320 Cor timet; ab ipso multa nesciri velim.  
*Sim.* Spatium quod ultra porticus tergum domus  
 Spectans recedit, nil habet, te quod iuvet  
 Inspicere; saeculis cuncta quae populo Phari  
 Venient futuris fata, mens ibi praescia

- 325 Dipsosuit; illa mersa nunc caligine,  
 Intelligentur cum fidem faciet dies.  
 Et iam diu nos pavidus exspectat puer.

*Chorus.*

- Nile, seu Siris potius vocaris,  
 Sive te nostri melius parentes  
 330 Astapum dicunt, vaga cuius unda  
 Fontis ignoto veniens ab ortu,  
 Vasta qua squallent loca se profundas  
 Abdit in terras, hominique nata  
 Rursus emergit, scopulique ab alti  
 335 Lapsa bis saxo violenta murmur  
 Iactat horrendum, bifidoque cursu  
 Lambit Aegyptum latere ex utroque,  
 Donec immensis procul evoluta  
 Ostiis findit mare; quid profabor,  
 340 Virgo, doctorum grege dissidente,  
 Saepe qui magni ducis advocati  
 Ad dapes aures tetigere nostras?  
 Quas tibi dicam nocuisse causas,  
 Quod Pharum quondam solitus rigare,  
 345 Imbris ut fusi nihil indigeret,  
 Sirio quamvis toties vocante  
 Vincere octonos cubitos recusas?  
 Solis an iunctis veniens ab astris  
 In modum crevit calor auctiorem,

---

V. 327. Chorus constat versibus Sapphicis. Siris (Σῆρις) nomen Nili Aethiopicum. Astapus (Ἀστάπους, ου) flumen Aethiopiae (album), nunc Abiad.

- Quem credidit periisse, non me vivere  
 Tantum, sed alta sede sublimem, inclutum,  
 95 Sedere, lateque opibus aggestis frui.  
 Potentiae omnes este participes meae.  
 Felicitatem referat acceptam mihi,  
 Cui debeo ortum, veniat et videat parens  
 Desideratum pectori natum suo.
- 100 Opima vestris pascua armentis dabo,  
 Herbisque Phariis crescet Isaci pecus.  
 Quam vestra, fratres! colla, non visi mihi  
 Totos per annos his decem, amplecti libet:  
 Tuasque similes Benjamin cerae comas
- 105 Contingere, innexumque cervici manu  
 Haerere utraque: gaudio manant genae,  
 Hilarisque fletus vocis occlusit viam.  
*Beniam.* Salve, Rachelis dividens mecum genus,  
 Reperte frater mihi nec optanti quidem:
- 110 Tuere me, puerum vir, afflictum potens:  
 Quali Pharum regis arte, germanum rege:  
 Et hos amoris, quaeso, non ficti indices  
 Permitte fletus collo ut infundam tuo.  
*Ios.* O mihi nunquam sperata dies,
- 115 Gaudia per te quam magna fero!  
*Beniam.* Iam me nec iter longum Sicimis  
 Vectum ad Nili poenitet urbes,  
 Nec percussum crimine falso  
 Vincla innocua gessisse manu.
- 120 *Ios.* Fratrum in te animus mihi non certo

Notus in hos me compulit astus.

Doleo tibi, quod mala, quodque metum

Tulit illorum spectata fides.

*Beniam.* Magnum est, fratres purgasse suos.

125 Isto pretio mihi cuncta placent.

*Ios.* Iam vita mihi dulcior, ex quo

Fratres licuit reperire pios.

Non illa mihi tam laeta dies

Quo deserui carceris umbram,

130 Quo me patrem rex ipse suum

Memphisque simul tota vocavit.

*Beniam.* Bona cum specto tua, mi frater,

Sentio laetos pectore motus.

*Ios.* Mea quae cernis, tua sunt, frater.

135 *Beniam.* Haec quam noster gaudeat una

Spectare senex!

*Ios.* Veniet, veniet: nec longa mora est.

Ibitis illuc cum magnifica

Missi pompa, ducis excelsi

140 Quae legatos fratresque decet.

Sed his fruendi gaudiis longum satis

Tempus sequetur; hora nunc mea me vocat,

Qua soleo regi dicere affatu brevi

Quae digna sciri quaeque portavit dies.

145 Adeste, nostrum quos amat comites latus.

*Iudas. Ruben. Beniamin.*

*Iud.* Quanquam carere me iubent omni metu

Pietas benigni fratris et constans fides:

Tamen innocentis vultus ipse habiti male,

- Animusque diri facinoris nondum immemor,  
150 Adeo stupori tradidit me exterritum,  
Ut verba post non multa, quae vix extudi,  
Nihil valuerim tempore in tanto loqui.  
Nunc te precamur, ille quem inprimis amat,  
Unius uteri germen, insontem, probum:  
155 Illum propitium fratribus praesta, et pium  
Placamen esto; te ille respiciens, tibi  
Favens, peracti fida bibat oblivia.  
*Rub.* Quae verba Iudas dixit, ea crede omnium.  
Si quid tibi unquam fecimus fratres boni,  
160 Id nunc repende: munus hoc facile est tibi,  
Magnumque nobis; da quod aeternum iuvet  
Miminish; sic te videat incolumis pater.  
*Beniam.* Nihil est opus, ceu video: sed nostram tamen  
Desiderari fratribus caris opem  
165 Non patiar: ita me instituit abeuntem pater.  
O nate, nullos oderis: sed ames tamen  
Summe, inquiebat, sanguine advinctos tibi.  
Hos ut retineas fac, nec officiis modo,  
Sed et ferendo. Patruus talis fuit  
170 Lotho Abrahamus: quippe quem captum ut fero  
Eximeret hosti, praelio obiecit caput;  
Et spolia regum quattuor retulit domum:  
Litemque fugiens finium, toto procul  
Ortu relicto petiit occiduum latus.  
175 Sic Ismaelem ventre servili satum  
Sibi gravem patienter Isacus tulit.  
Ut me quoque addam, cum truce ingenio minax  
Iugulo immineret frater Esavus meo,



- Totos per annos his decem erravi vagus,  
 180 Extorris, exsul, temporis longi ut mora  
 Lassaret iras; et redux, quanquam innocens,  
 Donis et humili lenii tumidum prece.  
 Haec monita patris optimi non memoria  
 Tantum fideli colere, sed factis volo.  
 185 *Iud.* Egregia certe pignora enixa est Rachel.

*Chorus.*

- Rumor candidus ad meas  
 Aures protinus advolans  
 Inventos modo Praesidi  
 Fratres nuntiat undecim.  
 190 Gaudet pontificum genus  
 Magni filia Putiphræ  
 Claram nosse viri domum  
 Ortam sanguine nobili:  
 Quorum olim veteres avi  
 195 Illis progeniti locis,  
 Euphrates ubi diluens  
 Glebae sumen, et alitis  
 Teli praeveniens fugam  
 Tigris, bis sociant aquas.  
 200 Illa sumserat ex humo  
 Limum, quem Deus ad suam  
 Ductum finxit imaginem,

---

V. 186. Chorus habet versus Glyconeos, qui constant ex basi (spondeo) et choriambo, quem sequitur pyrrichius vel iambus:  $\text{—} \text{—} | \text{—} \text{v} \text{v} \text{—} \text{v} \text{v}$ .

- 350 Et sitim tellus mea sentit altrix,  
Nec suas amni pluvias refundit?  
An tuos natum vegetare cursus  
Mercuri velox hebetavit astrum  
Stella Saturni pigra? num gelatus  
355 Occidens vernos Zephyros retentat,  
Qui tuum toto pelago retundunt  
Flumen, et cogunt superare ripas?  
An cadens in se vetera abnegavit  
In tuos cursus alimenta tellus,  
360 Dum quod Atlantis iuga pulsat omnem  
Ambiens mundum mare, per cavernas  
Abditas caeco vetat ire fluctu,  
Aut via labi prohibet latente  
Qui tibi furtim sociantur amnes?  
365 Ista ni fallor, nimium periti  
Quaeritis frustra. Deus orbis auctor  
Ipse, cum terris male mixtus humor  
Littore et ripis didicit teneri,  
Fecit et Nilum, propriaque vinxit  
370 Lege, quam culpas hominum perosus  
Mutat, et monstris mala saecula terrens,  
Tentat in rectum revocare gentes.
- 

**Actus quartus.**

*Iosephus. Iudas. Benjamin.*

**Ios.** Abripite puero vincula, ut respondeat  
**Liberius:** et vos corporis comites mei,

Et fida famuli turba, vosque o Nubides,  
Abstate. Sunt quae solus hospitibus loquar.

5 Vivitne genitor ille, quem dixtis, senex?

*Iud.* Vivum reliqui, regna cum peterem Phari.

*Ios.* Quot eius aetas annuos cursus habet?

*Iud.* Orbes peregit prope ter et decies decem.

*Ios.* Aetasne tam declivis a morbo vacat?

10 *Iud.* Moerore demto nullum habet morbi genus.

*Ios.* Hunc ergo puerum moeret abductum sibi?

*Iud.* Est alius etiam qui senem torquet dolor.

*Ios.* Licetne scire? nam senex pater et mihi est.

*Iud.* Dixisse memini; filium amissum dolet.

15 *Ios.* Quae saeva patri filium sors abstulit?

*Iud.* Id scire oportet cuncta cernentem Deum.

*Ios.* Testem invocasti rite, quem fugiat nihil.

*Iud.* Certum docere nemo nos hominum potest.

*Ios.* Permulta saepe ignota detexit dies.

20 *Iud.* O si ulla praestet hoc quod optamus dies!

*Ios.* Velletis illum forte restitui patri.

*Ind.* Sic liceat emere hoc morte, non faciam moram.

*Ios.* Adeone patris proximus cordi fuit?

*Iud.* Ut nullus ullum genitor adamarit magis.

25 *Ios.* Animo probo quod esset, et nulli invidens?

*Iud.* Et quia bonam spem dederat egregia indoles.

*Ios.* Quid visa vobis regna pollentis Phari?

*Iud.* Nihil illa cedunt optimis Syriae locis.

*Ios.* Etiamne regimen placet et imperii modus?

30 *Iud.* Miranda verò cuncta, te imprimis duce.

*Ios.* Velletis et vos his locis considerare?

*Iud.* Ob multa: primum ne ingruat rursum fames.

- Ios.* Et vos quid ergo cogit hinc discedere?  
*Iud.* Domi relictus, non relinquendus, pater.
- 35 *Ios.* An huc et ipse posset adduci senex?  
*Iud.* Illius est statuere: parere est meum.  
*Ios.* Amore forte filii huc posset trahi.  
*Iud.* Nam carus illi fuit et hic semper puer.  
*Ios.* Quod nomen illi genitor imposuit? rogo.
- 40 *Iud.* Iussu vocari Benjamin patrio solet.  
*Ios.* Dextrae potentis omen isto in nomine est.  
*Iud.* Quid hoc? Hebraeae percipis linguae sonum?  
*Ios.* Et ipse vestris adfui quondam locis.  
*Iud.* Huc quae tulit te caussa, si fas quaerere est?
- 45 *Ios.* Iniqua in me livor, inclemens fera.  
*Iud.* Non illa nostro pestis ignota est solo.  
*Ios.* Vendine et illic liberum corpus solet?  
*Iud.* Hoc mos et acri scita supplicio vetant.  
*Ios.* Sed multa fieri video, quae leges vetant.
- 50 *Iud.* Sed quae, nisi homines puniant, punit Deus.  
*Ios.* Iam dic quod illi nomen amisso fuit.  
*Iud.* Iosephus; hoc egregius imposuit parens.  
*Ios.* Vestri quid illud voce sermonis notat?  
*Iud.* Significat incrementa felicitis domus:
- 55 *Ios.* Res saepe respondere nominibus solet.  
*Iud.* Sed hoc inane nomen eventus docet.  
*Ios.* Ne temere desperate; nil durum Deo.  
*Iud.* Utinam, sed insperata, det nobis Deus!  
*Ios.* Dedit, et dabit. Respicite me, fratres mei.
- 60 Iosephus ego sum; nomen Aegyptus mihi  
Imposuit aliud; quam meam sortem auxerit  
Fautor Deus, videtis. Ex animo procul

Dothan, minaeque mortis, et tristis specus,  
Et Arabes, abeant. Somniis constat fides.

65 Satis hoc: nec aliud maius a vobis volo.

*Iud.* Generose praeses: non enim fratrem audeam  
Vocare, quia nos conscius culpae pudor  
In te arguit fecisse fraternum nihil:  
Iterum voluti, supplices, miserabiles,

70 Ad tua iacemus genua: non ut te fami  
Nostrae, sed ut te tumet opponas tibi.  
Ignosce; longis fessus aerumnis pater  
Hoc ipse, si vis, postulat: si vis, rogat.

*Ios.* Abiicite curas; poscitis sera prece

75 Quod impetratum est. Hoc quoque est nimium leve,  
Donare culpam; frater ut fratres amo,  
Cum Beniaminem video sincera fide  
Vobis amari, scire quod noster diu  
Per flexuosas quaerit ambages labor.

80 Ne cruciet hoc vos, exitus felicitas  
Meretur. Est cur gratias vobis agam,  
Per quos honores proximos regno tuli.  
Qui cuncta fecit, cuncta qui vigili Deus  
Oculo intuetur, nilque sine cura sinit,

85 Et eminus consilia disponit sua,  
Vobis futurum sospitorem ac patri  
Praemisit huc me. Quod Pharum torquet fames  
Alique Pharia fruge qui circum solent  
Populi, secundae tempus aestatis fugit.

90 Aliae supersunt quinque non steriles minus.  
Ite ergo, patri fata deflenti mea  
Portate laeti nuntium insperabilem,

- Patrum qui fieret pater,  
In quo gens hominum sui  
205 Census terminat ordinem.  
Tunc senos operis dies  
Clausit, rebus et ultimam  
Factis imposuit manum,  
Maius nil meditans Deus.  
210 Illi namque animum suo  
Flatu largus et os dedit  
Quod coelestia cerneret.  
Mox, ut progenies diu  
Multa in saecula viveret,  
215 Partem de latere eripit:  
E qua se exhibuit viro  
Pulchri foemina corporis.  
Hanc cernens, simul ut sopor  
Mollis membra reliquerat,  
220 Flammari sibi vir novis  
Sensit corda caloribus.  
Hinc est coniugii fides  
Omni foedere sanctior:  
Proles unde venit, patri  
225 Semper nomen amabile,  
Maternoque bibens puer  
Venam lactis ab ubere.  
Fratrum proximus est amor,  
Ortus semina quos ligant  
230 Quales comparibus suis  
Colludunt celeres equi:  
Aut commune iugum trahunt

- Nexu individuo boves.  
O si me impositum suis  
235 Pennis cinnama olentibus  
Coeli pura per aequora  
Phoenix avehat, unica  
Mundo semper avis, ferens  
In Solis nimia face  
240 Succensa Aethiopum loca,  
Fratres ut videam meos.  
Sed ecce ditis dominus Aegypti venit,  
Et Solis aequat igne praelato iubar.
- 

### Actus quintus.

*Pharao. Iosephus. Iudas. Chorus.*

- Tibi gratulatus, nunc et uxori tuæ  
Affinitatis decore, cumulatam domum  
Volo gratulari. Nulla par meritis tuis  
Potest referri gratia: auxilio tuo  
5 Curis levatus, libere regno fruor.  
Tibi salutem debet Aegyptus suam,  
Et ego quietem; cuncta quod non a viris  
Deserta squallent arva, quod terris nova  
Spes manet aratri, muneris totum tui est.  
10 Ideoque honores ad tuos addi volo,  
Ut more Eoae gentis, astriferae plagae  
In spatia venias nominis titulo tui,  
Grandisque meriti grande monumentum ferat  
Agricola taurus arce siderea micans,

- 15 Sicut propinquas arietis stellas tenet  
Inscriptus Hammon Mesoris antiqui pater.  
*Ios.* In me tot atque tanta conguessit tua,  
Rex magne, bonitas, ut magis demi velim  
Quam pondus addi. Cur adhuc aliquid tamen  
20 Cogar precari, caussa sunt fratres mei,  
Et, quem relicto fine telluris Syrae  
Optem huc venire fratribus comitem, pater.  
Agitare pecudes patrius est illis labor.  
Non procul ab urbe cui suum nomen sator  
25 Dedit diei, laeta graminibus iacet  
Regio, virensque pabulo semper novo:  
Gosena vocitant accolae Pelusii.  
Haec tota periit usibus mortalium  
Huc usque tellus, inde quod populi tui  
30 Displiccat animis cura versandi gregis.  
Haec vacua nostro prata si generi dabis,  
Promitto id ipsis utile ac Phariis fore.  
Iamque ecce ipsos, quod ego te verbis rogo,  
Gestu rogantes, corpora instratos solo.  
35 *Iud.* Vivat beatus dominus opulentae Phari.  
*Phar.* Surgite: dabuntur herbidi sedes soli;  
Et qui parentem, qui domum totam vehant  
Currus quadriiuges, quosque iter poscit cibos,  
Quaeque optima edit arborum partu ferax  
40 Niliaca tellus, dona longaevo seni.  
*Ios.* Patere hoc ut addam. Liberos homines vides,  
Qui sponte veniunt in potestatem tuam.  
Ne sacra patribus tradita et generis sui  
Mutare ritus, longa quos aetas probat,



- 45 Cogantur unquam. Tum, migrare his finibus  
Si libeat, aut quod aliquid acciderit grave,  
Aut quod vocet spes melior, id nemo vetet.  
Ita purus aer semper Aegyptum beet,  
Iustumque servet Nilus augmenti modum,  
50 Multaque matres prole tellurem impleant,  
Et sceptrā nunquam posteris abeant tuis.  
*Phar.* Iuro potentem cuncta moderari Deum,  
Meumque caput hoc obligo, et seros mei  
Generis nepotes, semper Hebraeis sui  
55 Arbitria ritus, exitus tutos fore.  
Hanc si quis olim rex Phari rumpat fidem,  
Nilus cruentas turbidas spumas agens  
Pelagus coloret; turpis animantum lues  
Nascatur, undis pariter et terrae gravis.  
60 Morbi furentis virus exanimet greges:  
Herbis viror decedat: urantur sata:  
Nec arbor umbras ulla, nec fructus ferat.  
Ulceribus homines torridis vexet dolor.  
Obsideat atra, quantaque infernae est plagae  
65 Caligo, coelum: noxque, non medio die,  
Noctem sequatur. Prole populata, domos  
Eat per omnes luctus: id si non sat est,  
Nereus quoque ipse legis exsorti vado  
Ruat, atque totos sorbeat mare.  
70 *Ios.* Non erit Hebraeos hospites nullum tibi  
Habuisse pretium, terra locupletis Phari.  
Nam dum pium Deoque dilectum genus  
Clemens fovebis, cuncta tibi votum fluent  
Supra, tuisque se dabit famulam usibus

- 75 Natura. Venient saecula, cum nostra incluti  
De gente reges Memphidos foedus colent,  
Inque Israelis sceptrum matre Aegyptia  
Quaeretur haeres; rursus in regnum Phari  
Stirpe ex Hebraea, moenia implentes nova,  
80 Aderunt coloni. Post ubi lapsus polo  
Tot ille vatum dictus ante oraculis  
Reparator orbis atque pietatis parens  
Mortalium res viset, hic tutos sibi  
Quaeret recessus, fidaque exilio loca.  
85 Leges Hebraeis ille communes meis  
Nilique populo ponet, et miscens sacra  
Docebit uno more venerari Deum.  
*Chor.* Ventet et ad nos tam grande bonum:  
Et coelestis melior Phoebo  
90 Calor Aethiopum corda perurat.
-

### **Addenda et corrigenda.**

---

Pag. 41. ad v. 174. annotantis verba: *vel* et quae sequuntur ad punctum usque, delenda sunt. — Pag. 134. ad v. 118. Respicit ad Sennacheribum regem Assyriorum, quem Adramelech et Sarazar eius filii gladio peremerunt in templo preces facientem. V. Reg. IV, 19, 37. — Pag. 139. ad v. 14. Male notus i. e. vix notus. Cf. Ovid. Met. XV, 380: male viva caro. — Pag. 140. ad v. 20. Perdidit h. e. patravit frustra (tantum nefas). — Ib. ad v. 23. Virtus sc. qua mira ac bene faciebam. — Ib. ad v. 34. deleta parenthesi adde: qui Sadocum, Antigoni discipulum, habuerunt sectae auctorem. Cf. Act. Apost. XXIII, 3. Cum his faciebant divites ac nobiles. v. Jos. Antiq. Jud. XIII, 10, 6. — Pag. 141. ad 2. Pro virtus lege virus. — Pag. 144. ad v. 150. Lege: Buccinae. — Ib. ad v. 151. Illa nocte, qua Pascha celebrabatur, templi portae non claudebantur, ut narrat Jos. Antiq. Jud. XVIII, 2, 1. — Pag. 145. ad v. 161. Pretiosius balsami genus ex ramis sponte stillat nullo vulnere, resinae modo. — Ib. ad v. 168. Cf. Deut. XXXIV, 5: Mortuusque est ibi Moyses servus Domini in terra Moab iubente Domino, et sepelivit eum in valle terrae Moab contra Phogor, et non cognovit homo sepulchrum

cuius usque in praesentem diem. — Ib. ad v. 169. Post solis occasum populi solent orientales ingredi itinera. — Ib. ad v. 173 adde notae fini: cum portu vicino nominis eiusdem, unde dicta Iamne gemina. — Ib. ad v. 174. Caparorsa (Καπαρόρσα) urbs Idumaeae ad occidentem Iordanis. *Ptolem.* — Ib. ad v. 176. adde: Nunc Coelesyriae, nunc Phoeniciae, nunc annumerata est Decapoli, cuius caput erat. Cf. Plin. Hist. Nat. V, 18. — Pag. 146. ad v. 168. Respicit ad vitri originem, quam narrat Plin. Hist. Nat. XXXVI, 26. Cf. ib. V, 20: Belus vitri fertiles arenas parvo litori miscens. — Pag. 147. ad v. 297. post Nilum adde: et mare mortuum. — Ib. ad v. 220. quae annotata sunt dele. Loquitur de libertate, quam adepti sunt Israelitae ipso exitu, relicta Aegypto. — Pag. 148. ad v. 229. Verius: Culta Tauri (sc. loca) h. e. regio Tauri montis habitata. — Pag. 150. ad v. 21. Lege: mendacia. — Ib. ad v. 33. Solo sc. Aegypti impositus vocanti Nilum, fertilitatem largientem, ut occurreret fami. — Ib. ad v. 40. Rabies sc. tumultus populi in deserto Arabiae seditio atque ejusque vindicta Exciderunt h. e. frustra fuerunt. — Ib. ad v. 44. Tac. Hist. V, 9: Romanorum primus Cn. Pompeius Iudaeos domuit, templumque iure victoriae ingressus est. Inde vulgatum, nulla intus Deum effigie, vacuum sedem, inania arcana. — Pag. 152. v. 100. Legendum esse arbitror languido. — Pag. 154. v. 141. lege sontem. — Pag. 158. ad v. 250. Victrices nempe Aristobuli regis Iudaeorum manus devicit Cn. Pompeius, Alexandri vero, Aristobuli filii, copias Gabinius Proconsul superavit ad Itabyrium montem. — Pag. 161. ad v. 48. Alludit ad seditionem atque interitum Dathanis et Abironis, quos terra vivos absorbit. Cf. Mos. IV, 16. — Pag. 163. ad v. 88. dele comma in fine versus. — Ib. ad v. 98. Renovavit vel redintegravit templum Herodes Magnus, cuius filius Herodes Antipas, tetrarcha Galilaeae, hoc ipso tempore Hierosolyma erat profectus ad festum. —

Pag. 166. ad v. 186. in annot. adde post Elias: seu Ieremias. — Pag. 170. ad v. 18. adice: ibi natus erat Batus, qui Cyrenen urbem condidit. Cf. p. 148. ad v. 223. Ss. Evangelistae Simonem vocant Cyrenaeum. — Pag. 174. v. 143. post amici interpunge commate. — Pag. 178. ad v. 247: luce cassum i. e. mortuum, ut lumine cassus vel aethere cassus apud Virg. — Pag. 182. ad v. 344. Dionysii Areopagitae haec verba fuisse, cum Heliopoli in Aegypto qua Jesus obiit die plena luna mirandum solis defectum contempleretur, narratur in ejusd. Epist. VII, §. 2. — Pag. 191. v. 221. post tuus commate interpungendum. — Ib. v. 235. significatur Sara, Abrahami uxor. Cf. Gen. XVIII, 10. — Pag. 198. v. 19. procul dubio legendum: manu. — Pag. 206. v. 22. et 23. post Inanis et Res delenda esse commata censeo. — Pag. 212. v. 172. legendum adveniret. — Pag. 214. v. 219. post Taautae interpunge commate. — Pag. 228. v. 329. lege parentes. — Pag. 230. v. 22. lege Si. — Pag. 235. v. 162. lege meminisse. — Pag. 239. v. 24. significatur Heliopolis. Pag. 228. ad v. 327 sqq. Respicit Nili descriptionem ap. Plin. Hist. Nat. v, 9: Nilus incertis ortus fontibus, ut per deserta et ardentia, et immenso longitudinis spatio ambulans, et quia fama tantum inermiquaesitus sine bellis, quae caeteras omnes terras invenere, originem, ut Juba rex potuit exquirere, in monte inferioris Mauritaniae non procul Oceano habet, lacu protinus stagnante, quem vocant Nilidem . . . Praeterea observatum est, prout in Mauritania nives imbresve satiaverint, ita Nilum increscere. Ex hoc lacu profusus indignatur fluere per arenosa et squalentia, conditque se aliquot dierum itinere. Mox alio lacu maiore, in Caesariensis Mauritaniae gente Massaesylum erumpit, et hominum coetus veluti circumspicit, iisdem animalium argumentis: iterum arenis receptus conditur rursus xx. dierum desertis ad proximos Aethiopas: atque ubi iterum senserit hominem, prosilit, fonte (ut

verisimile est) illo, quem Nigrin vocavere. Inde Africam ab Athiopia dispescens, etiamsi non protinus populis, feris tamen et belluis frequens, silvarumque opifex, medios Aethiopas secat, cognominatus Astapus, quod illarum gentium lingua significat aquam e tenebris profluentem. Insulas ita innumeras spargit, quasdamque tam vastae magnitudinis, ut quanquam rapida celeritate, tamen dierum quinque cursu non breviori transvolet: circa clarissimam earum Meroen, Astaboras laevo alveo dictus; hoc est ramus aquae venientis e tenebris: dextero vero Astusapes, quod latentis significationem adiicit: nec ante Nilus, quam se totum aquis concordibus rursus iunxit. Sic quoque etiamnum Siris, ut ante nominatus per aliquot millia, et in totum Homero Aegyptus, aliisque Triton: subinde insulis impactus, totidem incitatus irritamentis: postremo inclusus montibus, nec alibi torrentior, vectus aquis properantibus ad locum Aethiopum, qui Catadupa vocatur, novissimo cataracte inter occursantes scopulos non fluere immenso fragore creditur, sed ruere. Postea lenis et con fractis aquis, domitaque violentia, aliquid et spatio fessus, multis quamvis faucibus in Aegyptium mare se evomit. Certis tamen diebus auctu magno per totam spatiatus Aegyptum, fecundus innatat terrae. Causas huius incrementi varias prodidere, sed maxime probabiles. Etesiarum eo tempore ex adverso flantium re percussum, ultro in ora acto mari; aut imbres Aethiopiae aestivos iisdem Etesiis nubila illo ferentibus e reliquo orbe. Timaeus Mathematicus occultam protulit rationem: Phialam appellari fontem eius, mergique in cuniculos, ipsum amnem, vapore anhelantem fumidis cautibus ubi conditur. Verum Sole per eos dies cominus facto, extrahi ardoris vi, et suspensum abundare, ac rursus ne devoretur abscondi. Id evenire a Canis ortu, per introitum Solis in Leonem, contra perpendicularum fontis sidere stante, cum in eo tractu

absumantur umbrae. Plerisque e diverso opinatis largiorem fluere, ad Septentrionem Sole discedente, quod in Cancro et Leone evenit; ideoque tunc minus sicari. Rursus in Capricornum et Austrinum polum reverso sorberi; et ob id parcius fluere . . . Incipit crescere Luna nova, quaecunque post solstitium est, sensim modiceque Cancrum Sole transeunte; abundantissime autem Leonem. Et residit in Virgine, iisdem, quibus accrevit, modis. In totum autem revocatur intra ripas in Libra, ut tradit Herodotus, centesimo die. Cum crescit, reges aut praefectos navigare eo, nefas iudicatum est. Auctus eius per puteos mensurae notis deprehenduntur. Iustum incrementum est cubitorum XVI. Minores aquae non omnia rigant: ampliores detinent, tardius recedendo. Hae serendi tempora absumunt solo madente: illae non dant sitiente. Utrumque reputat provincia. In duodecim cubitis famem sentit, in tredecim etiamnum esurit: quatuordecim cubita hilaritatem afferunt: quindecim securitatem; sexdecim delicias.











